

**DEPUTY SPEAKER :** Awle, tunah chuan kan minister zahawm takin a rawn wind-up a, a Demand te pass a rawn dil bawk a, kan buk dawn anga, a Demand No. 25-na, Water Supply & Sanitation ₹115,92,58,000/- te, Demand No. 40-na, Industries ₹40,74,87,000/- te, Demand No. 43-na, Tourism Department ₹5,32,11,000/- avaiin vaibelchhe 161 nuai 99 singnga sangruk te hi House-ah remti apiangin ‘remti’ tirawh ule, ( remti) remti lo kan awm em? Remti lo kan awm lo maw?

Le, Pu S.Hiato, Minister zahawm tak Demand No. 25-na Water Supply & Sanitation ₹115,92,58,000/- te, Demand No. 40-na Industries ₹40,74,87,000/- te, Demand No. 43-na Tourism Department ₹5,32,11,000/- avaiin vaibelchhe 161 nuai 99 singnga sangkhat chu House in lungrual takin a pass ta a ni.

**Pu S. HIATO, MINISTER:** Pu Deputy Speaker leh member zahawm tak te, ka Demand min pass pui avangin ka lawm tak tak a ni, tiin lawmthu ka sawi e.

**DEPUTY SPEAKER :** Awle, hei zan dar 8:00 minute nga chauhin a la ri lova, kan sawi a, kan ngaithla bawk a, dawhthei takin a lawmawm a, vawiina kan business chu kan zo tawh a, naktuk July ni 22 zing dar 10:30 ah kan thukhawm leh dawn nia.

Sitting is adjourned at 8:00 P.M.

## LIST OF BUSINESS

**FOR TWELFTH SITTING ON FRIDAY, THE 22<sup>nd</sup> JULY, 2011**  
**( Time 10:30 AM to 1:00 PM and 2:00 PM to 4:00 PM )**

### **QUESTIONS**

1. *Questions* entered in separate list to be asked and oral answers given.

### **PRIVATE MEMBERS' BUSINESS**

2. \* Resolutions

---

\* Please see Bulletin Part – II No. 168, Sl. No. 1-14 dated the 19<sup>th</sup> JULY, 2011 for relative precedence of Private Members' Resolution to be moved.

VANLALNGHENGA  
Additional Secretary

.....

**DEPUTY SPEAKER** : “Thununna duhlotu chungah chuan pachhiatna leh mualphona a thleng anga, zilhhauna ngaisangtu erawh chu chawimawi a ni ang.” Thufingte 13 :18.

Zawhna leh chhanna hun a ni a. Zawhna kan la nghal anga, Starred Question no 151-na zawt turin kan member zahawm tak, Pu B.Lalthlengiana i lo sawm ang.

**Pu B. LALTHLENGLIANA :** Pu Deputy Speaker, Disaster Management and Rehabilitation Minister zahawm tak chhan atan ka Starred Question no 151-na:- May, 2011 chhungin polytarpauline supply order pek an awm em ? tih ka zawt e.

**NIHAR KANTI, MINISTER :** Pu Deputy Speaker, Hon'ble Member Pu B. Lalthlengliana zawhna, May thla 2011 chhungin polytarpauline supply order pek a awm em ? tih kha a chhanna chu : Awm e tih a ni.

**DEPUTY SPEAKER :** Zawhbelhna Pu B.Lalthlengliana i lo ko ang.

**Pu B. LALTHLENGLIANA :** He polytarpauline supply chungchangah hian tender chhanna a awm a. Amaherawhchu ISI leh ISO vel kha tuna an pekte hian an neih loh avangin tender chu cancelled a ni a, tender koh leh tur ni a a lan laiin tuna supply-tu te hi pek an ni a. Pu Deputy Speaker, P.C thalai press realease-ah hian MPC thalaite chuan Disaster Management and Rehabilitation department hnuiai polytarpauline tha tawklo lei tumna a awm mek tih thu an chhuah a, MPC thalaite chuan, danin polytarpauline lei tumnaah hian UD development programme contract asset procurement management guideline angin quotation chhangtute chuan ISI, ISO certificate thil tel tura tih an ni a. Mahse hemi chhangtu M/S Lalhmingmawii, Industry Zarkawt hian ISI/ISO emaw certificate a neih si loh avangin ISI/ISO certificate phutna chu paiha tender koh that leh tur anih laiin Pu Deputy Speaker, 6<sup>th</sup> May, 2011 ah hian Lalhmangaiha, Hmingmawii Industries, Zarkawt hmingin polytarpauline 5000, Nos 24X18 size (a) rate ₹ 770 in supply order an pe a. Nikuma tarpauline tha pangngai supply-na rate ₹ 717 a ni a. ₹ 770 a leina tur order an pek hi DPAB emaw, STAB emaw in rate hi an approve em ? Tin, tender chhuak lova khatianga sangnga lai mai lo pek kha a dikin ka hre lova, tin, Pu Deputy Speaker, he poly- tarpaulin hi hei hi a ni a, member zahawm tak Pu Duha khan a durh pup pup a ti, hei hi kan Minister zahawmtakin pocket thum theuh min pekah khan pali theuh boksis angin min pe niin a lang a, hei hi min pek zing ami a ni. Han en chuan a na deuh rut si a, a tha ka hriat avangin kan veng YMA pawh pahnih ka pe nghe nghe a, a tha lo ka lo pek avang hian ka haw veleh ngaihdam dil ka duh nghe nghe a ni. A chhan chu Pu Deputy Speaker, han en teh, han pawh hian a durh pup pup Pu Duhan atih kha hetiang hi a ni a, a nihin a ni lo hrim hrim mai a, term hmasaa Silpaulin pan lutuk supply chungchangah khan kan sawrkar aukhum kan ni a, amaherawhchu tun sawrkar beiseina kan neihsan tehlul nen a aia chhe zawk Member-te leh disaster thila hman tur atana supply hi Mizoram mipui leh kan ram leh hnam tan a thain ka hre lova, induhsakna chu sawrkara chuan a awm a, kan hre thiam vek a, amaherawhchu quality tha hianin duhsak rawh se. SPAB emaw DPAB emawin an approve rate hian pe rawh se, hetiang ang chhe lutuk nikum rate Rs 717/- anih lai a, 770/- a hetiang ang chhe lutuk induhsakna avanga inpek hi a thain ka hre lo. Kan ram, kan hnam kal zel atan hian a thain ka hre lo.

Sawrkar kan siam chuan duhsak chu kan nei, kan induh sak tur a ni hei hi chu, tupawh sawrkar ila kan tihdan pangngai a ni. Amaherawhchu kan induhsak dan hi dik sela, chuvang chuan Pu Deputy Speaker, kan Minister zahawmtak hian

engvangin nge tender lova hetiang quality chhe deuh rate approve si lova a supply tir hi eng dan hmangin nge supply anih tih kha ka zawt leh ang e.

**DEPUTY SPEAKER** : Zawhbelhna dang ala awm em ? Pu Thangte-a zawahah Pu TT. Zothansanga aw.

**Dr.R. LALTHANGLIANA** : Pu Deputy Speaker, a vanduaithlak khawpin ka hria a, ka'n zawk belh duh lai chu, heta tan hian sum engzatnge ruahman anih tih ka zawt duh a, tin, a supplier hnenah hian Bill, pawisa pek a ni tawh em tih ka zawt duh a, tin, khati takmaia chhia anih kha chuan action sawrkar hian lakk a nei tawh em ? tih ka zawt e.

**Pu T.T.ZOTHANSANGA** : Pu Deputy Speaker, ka lawm e. Kan Minister zahawmtak ka'n zawk duh chu, hei Tarpaulin pathum deuh theuh min han sem dan dan a, kan bial chhung ngeia kan sem theuh tur niin ka hria a, kha kha a ni em ? nichin khan Tuipui East bialtu khan a bial chhung nilovah pahnih chu a han pe nghal ringawt mai a, kha kha Minister ka'n zawt teh ang.

**DEPUTY SPEAKER** : Le, a chhang turin Pu Nihar Kanti ilo sawm ang.

**Pu NIHAR KANTI, MINISTER** : Pu Deputy Speaker, hmanniah pawh Demand-ah kansawi fiah tawh a, chhiatrupna thlen hmaa inrinlawkna, inbuatsaihna leh a thlen hnua chhawmdawlha hi Disaster hna a ni a, chuvangin enghunah nge disaster hi a thlen dawn tih tumahin kan sawi thei lo a, mahse englai pawhin inbuatsaih ngai a ni tih kan hre vek a. Nichina member zahawmtak Pu B. Lalthengliana zawkna, tender loh a ni em? a ti a, a chhanna chu dan angin restricted tender koh a ni a, a dik lohna engmah a awm lo a ni. Pu Deputy Speaker, (Interruption)

**Pu B. LALTHLENGLIANA** : Lawkin, restricted tender an ko a nih chuan a tender copy chu min pe thei sela, keini lo hriat dan kha a lo diklo zawk a nih chuan ka inadmit ang a. Amaherawh chu restricted tender koh a nih pawhin engatinge, nikum rate anga pek a nih loh, Rate harsa a awm em ni ? Tin, hetiang quality chhia hi supply tir kher tih ka'n zawt leh duh a ni.

**Pu NIHAR KANTI, MINISTER** : Pu Deputy Speaker, rate chungchang erawh chu dan angin kan ti a ni. Disaster phei chu State Executive Committee approved-in kan ti a. Pu Deputy Speaker, helaia member zahawmtak takte hi ruling emaw, opposition emaw sawi lovin a positive zawnga thil kan ngaihtuah a ngai tawh a ni. Entirnan, disaster chu tu chungah pawh a thleng thei a, tunah pawh hian a thleng that thei a ni, tuman kan dang thei lo, kan hre vek a ni. Mizoram hi Dridmic Zone-V a ni a, danger zone-ah kan awm avangin englai pawhin kan inbuatsaih a ngai a ni. Tin, ISO chungchang hi, ISI neih loh

avangin kan sorkar hian thil chhia chu lei a tum lo tur hrim hrim a ni.  
(Interruption from Members)

**DEPUTY SPEAKER** : Chhang zo phawt rawh se, member te khan lo tibuai lo lawk rawh u. A zawhna lam in chan a ni a, a chhanna lam Minister chan a ni a, han chhang fel ve phawt rawh se.

**Pu NIHAR KANTI, MINISTER** : Pu Deputy Speaker, tarpauline leina chhan chu tarpauline hi kan Mizoram mi ngeiin an siam a ni a, chuvangin Mizoram Preferential Purchase Rules, 1994 in State chhung amite chu a duhsak tur a ni a ti a, danah pawh kan hmu a ni. Chubakah Polytarpouline hi chhiatni leh thatni atana hman atan a tha em em a ni a, chhiatna engpawh lo thleng se inchunga han zar atante pawh thil tha em em a ni a, chuvangin Silpaulin chhia supply tih chu hria ila MLA tinah ka sem miah lovang. Chuvangin rilru thianghlim takin ka sem a ni Pu Deputy Speaker. (Interruption)

**Pu B. LALTHLENGLIANA** : Min rawn chhan atan, kan Minister zahawmtakin a sawi kha, The Industrial Promotion Policy and Preferencial Store Purchase Policy of Mizoram tih hi tunah chuan misused a ni a, a chhan chu Supreme Court of India order-ah hian “The process of stitching and fixing eyelets.? would not amount to manufacturing process since tarpaulin after stitching and eyelating? continues to be on the cotton fabrics. Therefore, there can be no levy of Central excise duty on the tarpaulin made up” a ti a. Tuna mi ang hi chu Pu R.C. Khuma’n puan a thui a, puanthan phai atangin a la teuh a, kekawrah te, kawrah te kan thuitir a, chutiang ang chauh chu a ni. Chuvang chuan, hemi Preferential Rules nen hian inhmebel theih loh.

**Pu NIHAR KANTI, MINISTER** : Pu Deputy Speaker, engpawh ni se industry an ni em, ni lo em tih chu ka finfiah thei lova. Amaherawhchu, Mizoram sorkar hnuia registered fel thlap a ni. Industry a ni emaw ni lo emaw tih chu thudang ni se, entrepreneurship dik a ni tih chu kan ngaihdan a ni a. Keimahni mi leh sate hi encourage an ngai a, eizawnna atan pawh a that ka ring.

Pu R.Lalthangliana zawhna a man engzatnge tih kha pakhat man chu ₹ 770 a ni a. A pumpui chuan ₹ 38.50 lakh a ni a. Pawisa pek tawh a ni em tih kha la pek loh a ni. Engmah dik lo a awm loh avangin action lak a ngaiin ka ring lo a ni, Pu Deputy Speaker.

**Pu B. LALTHLENGLIANA** : Min rawn chhan nghal atan, rate 770/- kha approve-na a awm a nih chuan kan Minister zahawmtak hian rate approve-na SPAB emaw DPAB emaw kha min pe thei sela ka lawm khawp ang.

**Pu NIHAR KANTI, MINISTER** : Aw le, Pu Deputy Speaker, ka lo en dawn nia.

**DEPUTY SPEAKER** : A tha. Kha rilru thianghlim takin a rawn sem a ni.

**Pu LAL THANHAWLA, CHIEF MINISTER** : Pu Deputy Speaker, a chhang tha khawp mai Minister khan, a chhang felfai a. Mahse, han puih zawk duhna ka nei a. Kan kalphungah hian local entrepreneur-te hi a theih chin chinah chuan encourage kan duh a ni. Tuna an sawi pawh kha ka hnenah a lo kal a, "Ka chhang ve thin a vawi khatmah ka la hmu ngai lova. Tunah hian siamsa 5000 ka nei a, hei hi a sample a ni" a rawn ti a. "Kan kalphungah kan encourage duh zawng tak in ni a, tiangho hi. Hlimen te pawh an lo kal a, theih ang angin kan lo tanpui a. Chuvangin, dan chhungah tanpui dan che kan ngaihtuah ang a, i lo nghak deuh dawn nia." kan ti a, Minister hnenah pawh kan inbiakna ka hrilh a ni. Tin, an factory te pawh hi register ve thlap a ni, tiin min hrilh a, a registration no. te engkim min hrilh a ni. Chumi chhungah chuan a ni a. Tin, sample ang inpek loh hi a tam khawp mai a. Tunah pawh a za tel, a sing tel karah khan a dik lo a lo tel palh a nih chuan kha chu a pawi khawp mai a. Bank atangte pawhin pawisa sang note a za tel, cheng 100 note chutiang chu kan dawng fo a, kan hmu ve zeuh zeuh a, amaherawhchu note chhia, note lem, note bung deuhte hi a awm ve fo a ni. Chutiang chu a awmve palh thei a, chuvangin dan dik thlapa tih a ni a, tin mi pakhatin kum hei leh chen monopolise hi break dan, tihtir loh dan hi kan ngaihtuah a, mahselangin compete-tu an vang angreng a, tuna local intreprenuer kha compete theitu tur, rawn tel ve theitu tur nia a lan avangin encourage pawh kan duh a ni. Amaherawhchu, a tlak loh na na chu kan encourage dawn lova, chuvangin a tlak anih chuan kan encourage zel ang a, a tlak loh chuan kan encourage lo ang. Tin, a thalo na na hi chu kan lei kan lei ve dawn lova, Pu Deputy Speaker, hun hmasa lama Damdawiin khawl lian pui pui vaibelchhe tel tam tak hmantlak si lohte ang kha ala nih loh avang hian a la nep viau zawk nghe nghe a, chuti chung chuan a diklo chu kan duh lova, kan tidik nghal ang.

**Pu B. LALTHLENGLIANA** : Khalai tak kha Pu Deputy Speaker, ka zawhna kha min la chhanglo.

**DEPUTY SPEAKER** : A chhang chiang tawhin ka hria.

**Pu B. LALTHLENGLIANA** : A chiang a, kan House Leader zahawmtak sawi a chianga kha, tualchhung thilsiam lei duhlo hrim hrim a ni lo. Amaherawhchu sample a rawn show ang kha a supply lo tih a chianga, hei hi midang tam tak pawhin an tih thin dan a ni a, sample thehluh ang hi an supply lo fova. House Leader-in a sample ang an rawn supply lo anih chuan kan lo endik nghal ang tih lai kha ka zawh tum ania, a rawn sawi a, a tha e.

**DEPUTY SPEAKER** : Zawhna pawh a nih chiahloh chu, engpawh nisela kha kan House Leader-in a sawi tawh a, a changtu Minister-in a sawi a, thilthalo chu tih tawh loh tur tih thlengin an sawi a, a that loh chuan kan ti tawh lo ang an ti a. Kha bak kha chu a awm tawh chuanglo, chuvang chuan tuna an supply-te

pawh Minister sawi ang khan rillru tha tak puin Member-te pawh inzat vekin min pe a, thalo a ruka thiltih chu niselang chuan MNF chanah khan khatiang kha an telh lo mai tur ania, mahse rilru tha tak puin an rawn telh vek zawk a ni. Chuvang chuan rilru bawlhhlawh awm miah lova kan House Leader-ten an sawi ang khan heti laia Local miten thil an siam ve han puihna a ni a, chuvang chuan kha kha an vawikhatnate pawh a nia, duhthute pawh alo samlo aniang e. I duhtawk ang aw khati lai kha chu tichuan Starred Question 152-na Member zahawmtak Pu P.P.Thawla'n han zawt rawh se.

**Pu P.P. THAWLA :** Pu Deputy Speaker, Higher and Technical Education Minister zahawm tak chhan atan- ka zawhna Starred Question 152-na chu:-

- a) Post Matric Scholarship hi mi pakhat tan engzat zel nge pek an nih?
- b) Scholarship Board Member-te mi engzatnge an nih? Ruat thar thin an ni em?
- c) Post Matric Scholarship hi Centrally Sponsored Scheme pawisa hman a ni ve thin em?

**DEPUTY SPEAKER :** A chhang turin a changtu Minister Pu Lalsawta i lo sawm ang.

**Pu LALSAWTA, MINISTER :** Pu Deputy Speaker Member zahawmtak Pu P.P.Thawla zawhna chhanna (a)-na Post Matric Scholarship hi mi pakhat tan engzat zel nge pek an nih tih chhanna chu, Post Matric Scholarship pek zat hi zirlaite course azirin pek dan a danglam a, mi pakhat tan kum khatah ₹ 1850 atanga ₹ 30,000 tleng pek an ni, tih a ni a. (b) chhanna chu- Scholarship Board Member-te hi mi 10 (sawm) an ni a, ruat thar thin a ni. (c) chhanna chu - Ni ve thin e, State Merit Scholarship tih loh, Scholarship dang zawng zawng hi Centrally Sponsored Scheme atanga pek an ni a. State Merit Scholarship-te, Research Fellowship leh Incentive Cash Award-te hi State Plan Fund atanga pek an ni, tih a ni.

**DEPUTY SPEAKER :** Zawhbelhna, Pu P. P. Thawla, a dawtah Pu Lalduhoma.

**Pu P.P. THAWLA :** Pu Deputy Speaker, College pangaia kal ho tan Scholarship hi Hosteller leh Hosteller lo hi pek dan a danglam em? tih leh Scholarship Board Member-te hi term neiin an ni nge tul an tih hun huna ruat mai nge? tih ka'n zawhbelh leh e.

**Pu LALDUHOMA :** Pu Deputy Speaker, Scholarship kherlo, zirlaite financial assistance chi hrang hrang kan pek a awm a, a biktakin Technical leh Professional Course lamahte hian. Chuta an senso chu an rawn reimbursed thin a, hei hi an hmu kim thin lo nia an sawi hi a dik em? kan lo hriat thin dan hi? Tin, State dangah chuan an kalna Institute-ah khan a State-te khanin cheque-in

an pek sak mai a, reimburse ngai lovin tihte a ni a, chutiang chu kan ti ve thei ang em? Keini chu zirlai nu leh paten an sum atangin an pe phawt a, chu chu an rawn reimburse ta a, chutah pawh chuan an reimburse theih zat nia an ngaihthe kha beih fe te a ngai a, an hmu kimlo thin a. Chu chu a lo dik anih chuan enge a chhan? sum lama indaihloh vang nge? Engtia tih tur nge? A damdawi enge awm dawn? tih ka'n zawt a ni.

**DEPUTY SPEAKER** : Ngawi rawh aw, pakhat a la awm thei e. Pu Nirupam Chakma.

**Pu NIRUPAM CHAKMA** : Pu Deputy Speaker, hei, Scholarship Board hian tunhma chuan Internet Website an nei lova, tunah chuan Internet Website nein Scholarship hmu turte, dil hunte, engkim an tarlang tawh a ni a. Hei hi hmasawnna ropui tak a ni a. Tin, Board-a thawkte chungah pawh lawmthu ka sawi duh a.

Ka zawh tum tak chu Pre-Matric Scholarship hi engzatnge pek thin a nih? tih kha supplementary zawhna a ni.

**DEPUTY SPEAKER** : Awle, tunah a changtu Minister zahawmtak Pu Lalsawta ilo sawm ang.

**Pu LALSAWTA, MINISTER** : Pu Deputy Speaker, zawhbelhna kha Days Scholar, Hostel-a awmlo, Scholarship dawn zat leh Hostel-a awm Scholarship dawn zat hi a inang lova, a inthlau ve khawp mai a, a let deuhthaw a ni a, a tam em em mai a, chi dang dang hi. Nakinah lehkha zawkte pawhin rawn pe ta ila, a tha maihei a, chi dang a tam lutuk avang hian sawi dawn chuan sawi tur a tam a. Engpawhnisela, a zawhna kha chu Day Scholar Hostela awm lo hi a tlem a, Hostela awm hi a tam deuhva. Tin, a scheme hrim hrim hi, scheme a awm teuh a, Matric, Pre-Matric te, tin, Post Matric te, tin Professional-a zir tawh chinte, khatiang ho kha a awm teuh mai a khangah khan an scholarship hi a inang lo, a inthlau sung mai a. Mahse, khangah khan Maximum a awm deuh zel a, tin, reimburse theih chiah pawh khan maximum a awm deuh zel a, a thenkhatah erawhchuan tuna NIT kan han neih tawh ang chi hengah te hi chuan 'Listed Institution' an ti a. Anmahnin heng Institution bikah hi chuan kha reimburseable kan han tih ho chi kha, medical reimbursement-a pawm theih chi ang deuh hlek hian an pawm theih ang chi kha a sang khawp a. Tunah pawh hian kan NIT zir, Mizoram quota-a kalte, hengte pawh hian hmun thenkhatah chuan Nagaland-ten Pu Duhoma, member zahawmtak rawn zawh pawh kha a ni nghal thei bawk a nga, an hmuh lauin keinin kan hmu lo an han tih ang chite pawh hi, an dil loh vang leh re-imburse tura an rawn tih loh vang a ni a. Hei hi tih theih a ni a, khatiang a nih khan chuan a limit ang zawng pawh khan an chungah ro a rel vak lova. A pawisa kha tam angreng tak tak pawh kha kan pe thei a ni.

Tin, tuna kan ngaihthlak ang, zawhbelhnaa mi khatiang ang cheque a pek chungchang kha reimburseable a nih khan chuan anmahnin receipt

an rawn thehluh mila pek tur anih avang khan chegue-a a inang diat diata pek theih kha an ni lova. An rawn thehluh mila pek tur a nih avang khan, amaherawhchu, scholarship emaw, stipend emaw a nih kha chuan, a amount kha a inang that dawn a nih kha chuan cheque-a pek theih kha a ni ang a. Amaherawhchu, hetah hian fimkhur vena chu kan nei a, Scholarship hi zirlaite tan a nih rual hian a lo la double tawk leh a fel tawk lo hi a lo awm ve zeuh zeuh thin avang leh, tute hming emaw, lehkha zir mang lo, mahse, Scholarship lo dil ve tawpte awm theih a nih avang hian kan fimkhur khawp a. Hmanhmawh thlakte a nih loh phei chuan cheque ang zawng transaction kha chu tunah tak hi chuan kan ngaihtuah duh vak lova. A Institution-a thawn tawp, Institution-in a lo sem sak ang chite pawh hi kan duh dan deuh zawk chu a ni tlangpui a.

Tin, member zahawmtak Pu Nirupam'an a webside-ah te hmuh theih a ni a tih kha kan Webside hi min ensak fo turin zirlai nu leh pate thleng pawhin ka'n sawm duh a. A bengvar thlak khawp mai a, a department pui Higher & Technical Department zawk hian a Scholarship Board lampang ai hian an la nei puitling tawk lo zawk a. Tunah hi chuan kan Webside hi tangkai takin an hmang thei zawk a. Tin, Pre-Matric Scholarship hi kan pe tho a, tunah hian Centralise Scholarship kan han buatsaih takah hi chuan Pre Matric Scholarship-te leh Post Matric Scholarship kan tih angte pawh hi Higher and Technical Education Department-ah hian awmkhawm turin ruahmanna kan siam a ni, Pu Speaker.

**DEPUTY SPEAKER** : Awle, Starred Question 153-naah kan kal ang a, a zawt turin Member zahawmtak Pu T.T. Zothansanga ilo sawm ang.

**Pu T.T. ZOTHANSANGA** : Pu Deputy Speaker, ka lawm e. Ka Starred Question No. 153-na, Hon'ble Minister, Excise & Narcotics-in min chhan turin ka zawhna chu hei hi a ni. Mizoram zu in phalna nei engzatnge awm? tih a ni.

**DEPUTY SPEAKER** : A chhang turin Minister zahawmtak Pu J.H. Rothuama ilo sawm ang.

**Pu J.H. ROTHUAMA, MINISTER** : Pu Deputy Speaker, Member zahawmtak Pu T.T. Zothansanga zawhna chhanna chu hetiang hi a ni. Mizoram zu in phalna nei mi 2007 an awm a, Ex-servicemen 1838 leh Civilian 169 an ni.

**DEPUTY SPEAKER** : Zawhbelhna Pu T.T. Zothansanga

**Pu T.T. ZOTHANSANGA** : Pu Deputy Speaker, ka lawm e. Ka zawhbelhna chu hei hi a ni. Zu in phalna hi Doctor prescribe niin ka hria a, doctor apiangin an prescribe apiang mai hi pawm zel mai nge, doctor bik an

awm em? tih ka zawt duh a. A chhan chu anticipatory bail ang deuh hlek a, a tithei apiangin an lo va lak theih kha em ni ? khalaiah khan doctor bik kan nei em? tih kha ka zawnha pakhat a ni a. Tin, a pahnihnaah permit nei ten khawi atangin nge zu an lei thin? Tin, a pathumnaah Sorkarin MLTP Act chungchang ah ngaihdan thar a nei em? tih a ni.

**DEPUTY SPEAKER** : Zawhbelhna dang a awm lo maw ? Pu Nirupam Chakma.

**Pu NIRUPAM CHAKMA** : Pu Deputy Speaker, zu zawrh kha hmanni deuh khan i rawn rawt deuh ti tihin ka hria. District Council Area hi Mizoram Liquor Total Prohibition-in a huam lova, exempted area a ni a. Silchar-ah kal in bottle pahnih Chawngtea ken tur ni ta sela an thei angem?

**DEPUTY SPEAKER** : A chhang turin a changtu Minister zahawmtak Pu J.H. Rothuama ilo sawm ang.

**Pu J.H. ROTHUAMA, MINISTER** : Pu Deputy Speaker, a zawhbelhnaah khan a doctor bik, a prescribe tur bik siam a ni em? an ti a. Chu chu ka hriat ve chinah a prescribe tur doctor ruat bik an awm ka hre lova, damlo an inentir a an mamawhna ang khan doctor-in alo prescribe mai niin ka hria a. Tin, hetiang doctor-ten an prescribe anga an pek hi nichinah khan kan sawi tawh a, ex-servicemen 1838 leh civilian 169 an ni.

Tin, District hrang hrangah hetiang hian phalna pek an ni a. Aizawl District-ah 1072, Lunglei District-ah 279, Serchhip District-ah 135, Champhai District-ah 184, Kolasib District-ah 168, a vaiin 1838. Tin, an lak dan kha chu Ex-service-te hi chuan an sipai Canteen atangin an lei mai thin a. Civilian-te erawh hi chuan doctor-ten an chawh a, an mamawh a nih chuan Excise & Narcotic Department Store, Aizawl atangin Confiscated IMFL te an lei thin. Tin, MLTP Act, 1995 Section 30-nain a phal angin Mizoram chhunga Security Force-te hnena Excise & Narcotic Department-in a hnuai ami ang hian district hrang hrangah Liquor Licence a pe bawk.

- (1) Aizawl district-ah 6
- (2) Lunglei district-ah 3
- (3) Serchhip district-ah 1
- (4) Kolasib district-ah 1

Tin, Section 29-nain a sawi angin foreign dignitaries leh tourist te Mizorama an cham chhung atan, zu special permit pek an ngaih chuan Excise & Narcotic Commissioner-in a pe thei a ni. Tin, member zahawmtak, Pu Nirupam-a zawhbelhna kha zu chu 6<sup>th</sup> Schedule Area-ah chuan kan va khuahkhirh lo niin ka hria a. Amaherawhchu, anmahniah thalai ho, helai YMA kan tih ang, thalai an nei ve vek a, chu chuan anmahniah khan an khap ve thliah thliah a. Tin, Aizawl chuan Silchar atangin rawn phur chho ta sela, Aizawl chuan khap a nih avang khan kan man thei,

kan man mai ang. Anmahni area an thlen hunah chuan an man lo a nih pawhin thudang.

**DEPUTY SPEAKER** : Thlawn khum vang vang a ngai dawn a nih chu. Le, tunah chuan Starred Question 154-na zawt turin member zahawmtak Pu K. Liantlinga i lo sawm ang.

**Pu K. LIANTLINGA** : Pu Deputy Speaker, ka lawm e. Ka Starred Question 154-na, Hon'ble Minister, Horticulture ka zawhna chu hei hi a ni. Horticulture Department hnuiah hian officer post ngaia awm kum 10 chin engzatnge awm min hrilh thei em? An hming leh post awmna nen tih a ni e.

**Pu H. LIANSAILOVA, MINISTER** : Pu Deputy Speaker, member zahawm tak, Pu K.Liantlinga zawhna, chhanna chu :-

- (1) Pu L. Lalhmingmawia Pachuau, HDO as ADHO, Lunglei
- (2) Pu F. Lalthlamuana, HDO, Directorate of Horticulture
- (3) Pi M. Vanlalzami, HDO, Directorate of Horticulture
- (4) Pu T. Liankunga, HDO, Directorate of Horticulture
- (5) Pu B. Thanhawla, HEO, DHO Office, Serchhip
- (6) Pu Birdhan, HEO, DHO Office (Hq), Lunglei
- (7) Pu K. Lalengiana

District Headquarters-ah Pu K. Lalengiana HEO, Directorate of Horticulture-ah, Pu V.L Rawna, HEO, Suangpuilawn circle-ah, Lalramthara HEO, Directorate of Horticulture-ah, Pi Lalrinawmi Rentlehi, HEO, Pu Manthanga Tochhawng, HEO, Aizawl DEO office-ah, Pu R. Lalrintluanga, HEO, chung chu an hming leh an awmna posts a ni e.

**DEPUTY SPEAKER** : Zawhbelhna Pu K. Liantlinga.

**Pu K. LIANTLINGA** : Pu Deputy Speaker, ka lawm e. Officer-te post ngaia awm lova thla hnih khat lek lek, kum hnih khat lek leka sawnte pawh hi an tam mai a. Heng ang kum sawm chuang lai mai post ngaia awm ang chi hi chu a nihna takah chuan, kan va dem chhiatna pawh ni lovin corruption-te pawh hi a awlsam duh viau mai a, induhsak biknate pawh a ang hlein ka hria a. Central Service Rules-ah pawh khan sawn hun awm a ni a, Mizoramte pawn kan adopt-a kan hmang mek a, hetiang ang em em a post ngaia awm tam hi a reshuffle theih ang em? tih kha ka'n zawt duh a. Tin, Directorate bikah khan khatianga awm khan an nihna thuneihna power kha an lek duh em em mai a, division lamte kha chu thuhran ni ta sela, a bik takin khang post nga post ruk vel Directorate-a kum sawm panga nge sawm pariat an awm pawh kan hre tawh lova, khami chunglam chinte kha chu sorkarin tha taka angkhata officer-te a enkawl theihna atan hian sawn theih ngei ni se a theih em? tih kha kan Minister kha ka'n zawt duh a.

Tin, a pahnihnaah chuan hmannia ka Unstarred Question No. 17-naah khan approved firm hi sawmpanga min rawn pe a, chungte chu tuna Technology Mission hnuiah hian heng ang ho zawng zawnge hian eng ang nge seedlings leh thildangte an supply tih hi ka hre duh a, chu chu ka'n zawt duh bawk a ? Tin, heng farm hoah hian Technology Mission Grant-in-Aid lokal kha Public sector-ah leh Private sector-ah hman tur a ni a, Private sector-ah khan farmers-te develop-na tura tih a ni a, tu tute hnenah hian nge an pek a, a amount engzatnge an pek tih kha ka'n hrechiang duh a. Tin, supply kum 2006 atanga tun kum 2011 chhung khan heng farm 15 te atang hian seedlings leh thildang an supply amount kha min hrilh theih chuan a lawmawm hlein ka ring a ni ? Pu Deputy Speaker, ka lawm e.

**Pu H. LIANSAILOVA, MINISTER :** Pu Deputy Speaker, a zawh nawnna kha ka'n chhang ang a, kan Officer-te hi Directorate-ah kum 10 chin awm 5 an awm a ka rawn sawi ang khan posting norm hi chu kan nei hlawm na a, amaherawhchu transfer hi mimal dinhmun ai mahin Department-in a that puina tur public interest a ngai a, chuvang chuan tuna kan Officer Headquarter-a la awm deuh ngar ngara la sawite hi Department-ah Officer-ten uluk taka an ngaihtuahin norm anga han kal tul hle mahsela Department interest en in an la awm a tul rih e ti a an la awm tir, proposal la awm rih lo a ni a. Posting chungchang pawh Department-in a ngaihtuah zel a ni.

**Pu K. LIANTLINGA :** Pu Deputy Speaker a sawi mek lai khan, Directorate laiah khan enge an special bikna thiamna bik an nei em ni ? Officer rual an ni a, an hna awmah chuan an thiam tur a ni a ; officer thenhat induhsak bikna leh puan hnuai thil a awm a ni lo maw tihte kha ka'n zawt duh a ni ? Midangte pawhin han reshuffle ve sela.

**Pu H. LIANSAILOVA, MINISTER :** Pu Deputy Speaker, Headquarter-a la awmte an awm zelna chhan hi puan hnuai thil a awm lo tih chiang takin ka'n sawi mai duh a. An la awmuina chhan erawh chu Department hmalakna kal zelah la tul riha hriat a nih vang leh an lo awm tawhna hna bikah khan experience an lo neih tawh avangin Directorate lam atanga Officer Committee hian la awm rih se an tih angin proposal transfer-ah hian an la rawn ti tel lo mai a ni a. Tin, reshuffle ni lovin transfer hi chu a pangngaiin kumtin thlir nawn a ni a, transfer siam hian a hun turte pawh ngaihtuah a ngai deuhva, programme kal lai te, tin, transfer turte tan chhungkua leh an fate zirnain a tawrh loh deuh tur hun lai hi thlir thin a ni a.

**Pu K. LIANTLINGA :** Pu Deputy Speaker, thiam bik tih lai kha, ka'n zawh duh chhan chu, induhsakna bik a awm nge awm lo ka hre lova, kan Minister khan LB nursery leh Maria nursery leh Green finger nursery hi chu han zir chiang deuh se chu a tha ka va ti em ? a neitu leh tu te ta nge an nih tih leh an supply dan kha ka hrechiang duh a ni.

**Pu H. LIANSAILOVA, MINISTER :** Pu Deputy Speaker, kan zawhna zawttu khan ngaihmawh tak neiin a rawn zaws niin ka hria a, chuvang chuan ka chhanna kha transfer leh kan Officer-te han dah kual chungchangah hi chuan kan Department hmalakna atana tangkai tur leh kan transfer norm enin kal zel a ni e tiin ka chhang a ni e. Tin, Nursery anih ka ring a, Approved Firm a tih kha. Nursery hi a Act tha tak kan nei tawh a, Central-in a rawn siam bawk a. Chumi hmanga Nursery-te hi siam leh buatsaih tura a ti thei deuhthe tih tir an ni a, TM hnuai atang pawh hian chutiang tihna tur chu fund a awm thin a. Amaherawh chu, tukinah hian ka lo in ring lova, a zawhna hian khatiang kha a ken tel loh avang leh rinthu deuhin chhan tur anih avangin min hrethiam sela. A tlangpui thu erawh chuan heng kan Nursery Registration lo nei tawhte hi a Department-in an enpui chin a awm a. Tin, thlai Department-in kan mamawh tur angle pawh a bika ching tura beisei an ni a. Chu chu Nursery kan tih chhan chu a ni a. Tin, Department-in loneitute hnena kan pek tur thlai tu te Nursery nge tih pawh hriat hleih loh, vai ram atanga duh duhin an rawn phurh chhoh ang kha kan ti tawh lova. Chuvang chuan kan hmuhpui, kan officer thiamten an hmuhpui leh hriatpui ngei Nursery dan anga lo siamte atangin in pek tawh nisela tih hi kan sorkar hnuah hi chuan kan kalpui ta a. Chuvang chuan ka sawi fo thin angin thlai tiak leh a chi man tu tute emawin supply an ti vut vut ang kha kan ti ta lova. Chuvang chuan thlai chi leina atan hian a scheme-in a ken ang chiah lo chu mamawh bak kha lei a ni tawh lo bawk a. (Interruption)

**Pu B. LALTHLENGLIANA :** Pu Deputy Speaker, khawngaih takin kan Minister-in min hrilhfiah atan. Kan Minister khan Nursery neite chauh hnena pe turin kan ti a tih kha a tha ka ti a. Amaherawh chu, khatiang anih lai khan tun ang July thla thleng hian thlai tiak phun tur phurh luk luk hi a tam riau mai a. Tun ang huna phun hi a nung thei dawn emaw ni le ? Chuvangin Mizo pa chuan April, May vel hi thil phun huna an ngaih deuh thin kha a ni a. April leh May vela phun thei tur hian hma in la thei tawh angem ? tih ka zaws a ni.

**Pu H. LIANSAILOVA, MINISTER :** Pu Deputy Speaker, tuna a han sawi kha kan mithiamte hian poly pot anih chuan August thla chhung thleng pawhin, September ni 15 thleng pawhin an enkawl that chuan ala phun theih a ni an ti a. Tin, tunlai....(Interruption)

**Pu B. LALTHLENGLIANA :** Pu Deputy Speaker, khawngaihin khalai kha. Hei huan ka siam ve nasa a, poly pot-a siam hlir ka phun a. June thla chawhnu lama ka phun hi a nunglo tlangpui a. A chhan chu tui leih reng tur chuan kan lo thei lova. Ka chhinchhiah dan chuan a hmalama ka phun hi a nung a, a hnulama mi hi a nung lo tlangpui. Chuvang chuan tui leih reng theite tihnun kha an hria a ni mai thei. Helai hi chu kan officer-te pawh hian zir chiang sela, a hmalam tih hram kha ala tha fo in ka ring a.

**Pu H. LIANSAILOVA, MINISTER :** Ni e, mimal experience hi tha tak a ni a. Amaherawh chu, kan mithiamte hian ICR te nen pawh an sawiho leh zirhona atangin August thla chhung thleng, tin, thlai thenkhatah tui pek that theihna hmunah

phei chuan September thla ni 15 hmalam thleng pawhin poly pot hi chu a him a ni an ti a. Tin, poly pot hi chu tunlai hi chuan kan tih dan tlangpui a ni nghe nghe a. Tunlaia phurh kual vel tih erawh chu ka hre lo.

Tin, seedlings hi heng kan approved firm nursery atangte hian lei tura kan beisei leh kan kawhhmu a ni a. Amaherawhchu, kan thawktute zingah mimala lo ti an awm nge ka hre lova, a awm pawh an awm tawh, a thiam deuhte hian chhungte nena tang hovin khawilai laiah emawte chuan an lo siam a ni thei e.

Tin, T.M. hnuai atang hian nursery chutianga district tina an rink, an loneitute progressive farmers-te hnenah siam tir an ni a. Tunah hian kan hmang tangkai lo deuh na a, kan chhawr tangkai thuaiin ka ring a. Tin, NLUP atanga kan mamawh phei chu nursery atanga awm thei tur zat chhiar thlapa tih a ni a. Kuminah hian NLUP atangin Sawhthing tiak nuai I vel kan mamawh a. Tin, a chingtu turte kan thlan atang hian 4000 vel an nih avang hian, a tiak tha kan phun dawn hi chuan za diat diata an phun atan kuminah hi chuan sem rual a tha ang tih hi kan kalpui dan a ni a. A field-ah hi chuan engtiang chiah nge tih hriatchian a har a. Tin, NLUP-ah chuan mimal anmahni pawisa atanga hman tur anih avangin remchang an tih ang ang lo neite pawh an awm thei niin kan hria a. Chu chu ka chhan theih dan ni mai selangan, ka lawm e.

**DEPUTY SPEAKER** : Le, zawhna dangah kan kal leh anga.  
Starred Question No.155 na zawt turin Member zahawmtak Pu B.Lalthlengliana ilo sawm ang.

**Pu B. LALTHLENGLIANA** : Pu Deputy Speaker, Land Revenue & Settlement Minister zahawm tak chhan atan ka Starred Question No.155-na  
(a) New Secretariat ram chhungah mimal ram nei an awm em ?  
(b) Bawngkawn Brigade ram chhunga dan anga ram neite engtikahng hma lak phalsak an nih ang ? tih ka zawt e.

**DEPUTY SPEAKER** : A chhang turin a changtu Minister zahawm tak Pu J.H. Rothuama ilo sawm ang.

**Pu J.H. ROTHUAMA, MINISTER** : Pu Deputy Speaker, ka lawm e.  
Kan Member zahawmtak Pu B. Lalthlengliana zawhna kha New Secretariat ram chhungah mimal ram nei an awm em ? A chhanna chu, New Secretariat panna Pu Hranghlira(L) ram bulah hian Pu Vanhlira hminga LSC siam sak a ni, tih a ni a. Tin, a zawhna pahnihna kha Bawngkawn Brigade ram chhunga dan anga ram neite engtikahng hma lak phalsak an nih ang ? tih a ni a. Bawngkawn Brigade ram kan tih hi Community Project ram thin a ni a, Sipaite hian Brigade hmunah an rawn hmang mai zawk a ni. Hei vang hian dan ang taka ram nei nia kan ngaihte hian thudik zepin Sorkar an lo bumin ram pek a lo ni mai zawk a ni.

**DEPUTY SPEAKER** : Pu B. Lalthlengiana, a dawtah Pu Lalduhoma.

**Pu B. LALTHLENGIANA** : Pu Deputy Speaker, zawhbelhna, Minister zahawmtakin a sawi kha ka hnial pawh a ni lova. Amaherawhchu, thil sawi neuh neuh hi a awm thin avangin Sorkar a fimkhur zawkna turin hei hi ka rawn zawt a ni a. Government Complex-ah khuan a tir atanga a fel loh avangin mi tam takin a luohtute zingah pawh a ni ang, ram chhungah LSC hialte pawh an lo nei thei thin a, chutiang bawk chuan sawlai saw a chingpen ang tih ka hlau a, thil sawi rik ret ret a awm hian thil lo tihfel derte a awm thin avangin fimkhur thuah Minister khan department lamah te pawh lo enchiang leh sela thani ka hria a. Tin, tuna mi pakhat an pek kha Secretariat Complex ram demarcation chhungah a ni em? lo ni ta se ani kha engatinge pek a nih? A pawn anih chuan thuhran a ni a, demarcation chhung anih chuan anni kha engatinge pek a nih? tih kha ka zawt leh duh a.

Tin, Bawngkawn Brigade ramchhunga dan anga ram neite engtikahnge hma lak phalsak an nih ang tih kha. Rambuai hma atanga ram lo neite kha an awm a, Durtlang kawng chhoah te khian, chungho chu sipaiin an luah avangin enkawl thei lovin an awm a term khat dawn lai revenue ka enkawl avangin engemaw chen ka hria a, amaherawhchu, rambuai chhoh lai vel khan mi tam tak ram lo nei ru chu an awm. Amaherawhchu, a tira neite an awm a ni, chuvangin Brigade ram kan tiyah sawn ram neih dan inanglo tak tak an awm avangin classified a ni; ram buai hma atanga lo nei tawh ho hma in lak tir thei dawn tawh em? tih kha ka zawt a ni. Ka'n zawh nachhan ber chu midang nilovin, a tira original dik tak rambuai hmaa nei ho kha hma engtinne in lak theih dawn tih kha ka'n zawt duh a ni.

**Pu LALDUHOMA** : Pu Deputy Speaker, ka zawh tur hi kan Minister zahawmtak hnenah hian ka thlen tawh a, a hre tho na in zawh hi ngai ka ti tho mai a. Ka bial chhung Ramrikawnah khuan a lun lai tak mai, Taxi leh Bus stand laiah khuan sorkar hmasa khan kopangah khuan mipakhat inhmun a lo pe a ni. Han en reng reng hian inhmun inpekna awm hi a ni mawlh lova, vantlang kawngpui kam a ni a, khami kawngpui chhak lam kha NEEPCO ho ram a ni. Tichuan, an pek chuan kut a thlak ta a, mahse NEEPCO ho an rawn thawk a, an phal ta lova, an tihtawp sak a ni, tichuan a enkawl zui ngam ta chuang lova. Khatiang alo nih takah chuan tiin MUP in In sak nan an duh a. Tichuan Revenue ho pawh khan hmun dang kan zawn sak emaw kan cancel emaw mai ang an tih tak avangin MUP khan NEEPCO kha an dil ta a, vantlang thil tur anih chuan kan ram rawn tihek lutuk lo hian sa ta mai che u, an ti a, an lo phalsak ta a. Road Protection hnenah phalna ziakin an la leh thlap bawk a. Tichuan, MUP building tunah khuan kan sa a, ka fund atangin, hawn kan duh tawh a ni. Khatiang engkim, fel chho tawha kan ngaih hnuah, tlai khawhnuah, building kan sak vek tawh hnuah, min rawn stay leh ta a. Chu chu kan Minister zahawm tak hnenah hian ka thlen a, min stay-na kha min hlih sak se kan duh a, khulaia inhmun neitu khu hmundang an pe duh anih leh pe sela an cancel sak duh anih leh cancel sak sela, in sak kan peih tawh a, hawn thuai kan duh tawh si a, min tihfel sak thuai thei em?

rang deuhhlekin tih kha ka zawt duh a. Engemaw chen kan lo nghak cheu anga, in tihfel lawk loh chuan kan hawng dawn a ni, in tih tihin min ti mai dawn nia, kan hawng hrim hrim ang.

**Pu J.H. ROTHUAMA, MINISTER** : Pu Deputy Speaker, helai Secretariat Complex panna hi, New Secretariat Complex ramchhung a nih chiah leh chiah loh ka hre bik lo a, amaherawh chu helai hi chu a case hetiang hi a ni. Helai hmunah hian Pu Vanhlira hnenah House Pass No – 1015 of 1986 pek a ni a, a area pawh 112 sq metre a ni. He house pass hi LSC turin a dil a, chu a dil chu LSC siam turin ni 28/11/2005 ah teh sak a ni a. Khatla VCP in 21/2/2006 ah No Objection Certificate a sign sak a, hemi chungchangah hian sawrkar thutlukna siam turin sawrkarah thlen a ni a. LSC siam sak mai chu sawrkarin a rem ti lo a, cancel turin thutlukna a siam a, Vide.No.K-24.0.1/12/00 Revenue 26/6/2007, he sawrkar thutluknaah hian Pu Vanhlira rokhawmtu Pu H.Zonuntluanga chu lungawiloin Court-ah sawrkar a khing a, case no pawh civil suit no.43 of 207,2007 a ni a, Senior Civil Judge-in ni 9/11/2009 ah thuremna siamin House Pass No–1015/86 chu LSC tura lo teh tawh ang hian ni 45 chhunga LSC issue turin thutlukna a siam a, LSC chu Court Order anga Issue a ni ta a ni.

Tin, a pahnihna Bawngkawn hi chu kan hre theuh a, a rawn zawttu khan a hrechiang em em a, cabinet pawhin vawi 2, vawi 3 khel tawh a ni a, an ni hunah pawh khan lo khel tawh a ni a, amaherawhchu kan han sawi tak ang khan a ram saw Brigade ram kan ti mai a, Brigade ram aia nei hmasatu an awm a, Brigade khan a rawn hawh mai a ni a, chumi chhungah chuan pass hi pek a tam hle maia, pek thuah pawh a tam a, ngun takin hei kan chhui tir a, Joint Director survey hoin a bika hming hmerin, sawlai hmun saw engemaw chhung an chhui tawh a, chu chu Cabinet-in keini hunah hian ni 18<sup>th</sup> June-ah khan kuminah kan en leh a, chuta kan thutlukna thenkhat a rawn zawh taka kha, khi mi Durtlang kawng ho District Council hun chhunga Pass an lo pek tawh, tin Court pawhin thiam alo chan tir tawh, amaherawh chu sawlai area chhung a nih avanga khawih theih loha dah kha Cabinet meeting chuan sawmi kawng dung chho a ram nei ho, Pass lo nei ....

**DEPUTY SPEAKER** : Aw ngawi lawk rawh aw, kan question hour a tawp a, han chhang zo lawk rawh se aw, le chhang rawh le.

**Pu J.H. ROTHUAMA, MINISTER** : Pu Deputy Speaker, khawih zui phal sak nise tih a ni a, tin chu chauh niloin Brigade peng kan tih thleng tunhmaa ram lo nei tawh tu ho sipaiten an luah sakte leh khawih theih lo a an lo dahte pawh kha an Pass kha enhian sak a, khatianga Pass diktak nei ho kha chu thlah zalen nisela tiin Cabinet hian a rel bawk a ni. Tin, sawlai saw ngun takin an chhui chho meka, hemi kan Cabinet meeting hnuah pawh Commisioner hoin lo en dik se tiin thutlukna kan siam avangin an lo va en leh vek tawh a, chu chu report pawh kan dawng tawhin ka hria a.

Tin, chubakah chuan kan Commissioner ho hian sawlaia NGO Bawngkawna mite nena inko khawmin NGO te leh Village Council tunah chuan Local Council kan tihte nen nguntakin saw lai ram saw an thlir leh tawh a, chuta

tang chuan hmalak turin rel a ni a, amaherawhchu pass lo nei pangngai deuh takte pawh an awm ve avangin compensate ngai turte pawh an awm ang tih a rin theih a, chu chu compensation pawisa thleng pawh hian kan Chief Minister zahawmtak hian engemaw chi chu ngai dawna a lan avangin a compensate tur pawh Delhi lamah zawn la ni se a ti a, hei hi Delhi lamah kan la buaipui hman lova. Amaherawhchu, a rang thei anga chin fel kan duh a, tin Brigate ram saw, hmarlam Area-a awmte sawn college hmunah te sawrkar hmun pawimawh tak takah an mamawh a, an dil thin avangin mimal hnena pe lova sawrkar ram, sawrkar hmun pawimawh atana dah turin sawrkar chuan thu a kalpui mek a ni.

**DEPUTY SPEAKER :** Aw le Zawhna chu kan duhtawk mai anga, a chhan loh che u pawh khan vawn kha in tum tho a i duh tawk mai ang.

**Pu J.H. ROTHUAMA, MINISTER :** Ni e, a sawi tawh a kan la ti hman lova, tun session chhunga sawi hi a nia, kan la intir thla anga, kan la zuk en a nge.

**DEPUTY SPEAKER :** Duhtawk ang aw. Vawiin hi zirtawpni a ni a, kan Dan bung 27-na 1-na angin Private Members' Business kan tih ni a ni a. Private Members' Resolution hi Thawhlehni khan kan Ballot tawh a, a copy Bulletin pawh kan rawn sem tawh kha member-ten in nei a.

Tunah chuan Resolution No. 1 kan la anga, Pu C. Ramhluna Resolution, “13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se” tih hi a move turin a resolution neitu Pu C. Ramhluna i lo sawm ang.

**Pu C. RAMHLUNA :** Pu Deputy Speaker ka lawm e. Hei vawiinah hian kan private resolution pawimawh tak mai Aizawl mipuite hamthatna tur leh ruatl Lang taka sawrkar zara hamthatna inang tlang taka kan chan tlan theihna tur atana “13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se” tih ka rawn move thei hi ka lawm hle a. Lehlamah chuan min hria a, kei chu ka bial chu Chhim lampang daih a ni a, mahsela Pathian enkawlna avangin Aizawl-ah In leh Lo te neiin kan khawsa ve a, chuti chung chuan Aizawl mi niin saw lampang mi nihna pawh ka chang tel tho va, nimahsela, vawiina ka rawn din chhan chu Aizawl mipuite hianin sawrkar zar hi rual tlang taka an chan tlan theih hi a than ka hria a. Chuvangin, he resolution hi ka rawn pulut a ni a.

Vawiinah hian kan rilru ngaihtuahnaah te hian hetiang hian awm sela thani ka hria a, Party pakhatin he thil hi kan putluh tak avanga do hrim hrim tumna emaw, sawisel hrim hrim tumna emaw hi rilruah awm lo sela a thani ka hria a. Aizawl khawpui hi Municipal area zau pui mai a ni a. Chumiah chuan remchanna avangin ward 19 lai siam a ni a. Chumi chu mipui mi hrang hrang kan awm khawmna a, Mizoram mipuite hi chu kan hriat angin homogenus deuh kan ni a. Kan ngaihdante a inang tlang a, kan chet dante a inang tlang a. Kan khawsak dan te

pawh a inang tlang a, kan rilru leh ngaiantuahnate pawh a inang tlang khawp mai a, chuvang chuan hetiang thil hi kan ngaiantuahna ah awm sela a thain ka hria a. Party leh Party sawi lova vawiinah hian kan thil putluh hi Aizawl mipuite thatna tur atan leh rual zawka sorkar zar kan zo theihna tur a ni tih hria a he ka resolution hi min sawipui tur leh ngaiantuahna min hmanpui turin a hmasain ka han sawm che u a ni.

Mizoram hi ram mawi tak mai a ni a. A ram hi a ngaw a, a tha a, tin, chubakah chuan greenary hi kan nei tha a. Vawiinah pawh India ramah chuan ram green tha ber, Forest cover nei tha ber niin tunah hian puan kan ni a. A lawmawm hlein ka hria a ni. Ramdang atanga lokal pawhin kan ram hi mawi an ti a, nuam an ti em em a ni, chu chu alo kal apiangin an sawi thin a ni a. Chumi ruala mawi an tih leh chu kan society hi a ni a. Kan society hi a homogenous a, indaidanna te hi a awmlo em em a.

Tin, chubakah chuan kan sakhuana hianin mi hi a phuar tha em em mai a. Chuvang chuan hemi tak pawh hi a chhungirl tako mita an han hmuh hian mak an ti a, min appreciate em em a ni a. Hei hi tuna lo awm thar that pawh hi a ni lova, Mizoram chu tunhma atangin kan hria a. Lal nei kan ni a, Lalin ram a awp a, ram bik a nei a, chumi chhungah chuan ro a rel thin a. Amah puitu turin khawnbawl upa te a nei a, chungte chuanin Lal kha an finchhuah a, tichuan ro an rel thin a ni a.

Anmahni khawchhungah bikte phei chuan miretheite pawh theihpatawp chhuahin an tanpui thin a. Mirethei kudawhte pawh hi awm an phal lo thin kha a ni a. Nimahse Lal system kha kum 1954 velah khan alo tawp ta a, tichuan village council inthlanna kan lo nei ta a, democracy alo lut ta a. Tichuan Chief-tainship hi boin India ram democracy kha Mizoramah khan putluh kha alo ni ta a. Tichuan village council-te inthlangin party party-in kan lo kal chho ta a. Hei hian engemaw chenah kan society-te pawh hi min effect ni te pawhin a lang a. Nimahsela chumi pawh chu kan sakhuana hian nasa takin min la phuar khawm a, vawiinah hian mirethei an awm pawhin khuaah theihpatawp chhuahin NGO te leh V/C atangte pawhin tanpuinate theihpatawp chhuahin an pe thin a ni tihle pawh kha kan hria a ni. Chu chu kan ram dinhmun a ni a. India ram zau zawk erawh chu han thlirin mipui an tam a, kan ram anga inhmangaihna leh inlainatna tha hi a awm loa ni tih pawh kan hre vek awm e.

Vawiina kan han putluh hi a bul intanna chu a hmasa berah chuan Kan Prime Minister duhawm tak, thi ta, Pu Rajiv Gandhi a kha a ni a. Tunhmain municipal system chu India ram hmun hrang hrangah alo awm tawh ngei tih kan hria a. Nimahsela he municipal system-ah hian kan hriat leh kan hmuh dan angin mipuite hian anmahni enkawltute, roreltute lakah hian approach/access an nei tha lova, roretuton anmahni duh thuin ro an rel a, mipuite hi anmahni duh angin, tha an tih angin, enkawl an ni tih an in hria, chu chu kan Prime Minister zahawmtak Rajiv Gandhi khan a hmuin Municipal system hi India ramah hian tihchak a tul a ni tih kha a hria a, chumi avang chuan Prime Minister a nih chhung khan theihpatawp a han chhuah ta a, tichuan hei constitution amendment-te pawh kha alo ngai ta rum rum a, 74<sup>th</sup> Amendment, Act, 1992-ah khan siam alo ni tih kan hria a, tichuan article 243-(a) ah chuan Thingtlang mipuite rorelna siam a ni a, 243(b)-ah khan anmahni hruaitu tur Panchayat Village Council kha thlan tur a ni leh a, tichuan, Article 243 (c)-ah chuan an khua a mipui ho zawng zawng khan anmahni aiawh tur, Local Council kha an thlang tur a ni e tih a ni ta a, hei hi Mizoramah phei chuan kan la nei chiah lova

Panchayat system hi; nimahsela Village Council system kan neih avangin he kan village council system hi Government of India pawhin tha tawk a ti a, tha a ti a, chuvang chuan kawng hrang hrangah hian village council hi a rawn hmang a, a rawn pawm a ni tih kha kan hria a ni.

Tichuan, Constitution 74<sup>th</sup> Amendment Act, 1992-ah khan Article 243(q) ah khan Municipal Council siam theihna hi State tinah pek alo ni ta a, he danin thuneihna min pek ang hian Mizoram sawrkar pawh khan Municipality Act, 2007 chu kan lo siam ta a ni a, he dan hian Village Council chhung kha a huam lova, tin, chubakah chuan Autonomous District Council pawh kha a huam lo a ni tih kha kan hria a ni. Tichuan, section 8 of Municipality Act, 2007 chuan State Government-te chu thuneihna a pek angin Municipal Area chhung chu Ward hrang hrang 19-ah then alo ni ta a, he ward tina polling station leh elector hi June 8, 2010-a alan danin hengte hi an ni a. Ward khatnaah chuan polling station 10, a awm a, voter hi 8899 an awm a, ward hninhnaah hian polling station 12 kan nei a, tichuan voters hi 11957 kan nei a, tin, ward pathumnaah hian polling station 10 kan neia, tichuan voters hi 9506 kan nei a, ward li na ah hian polling station hi 10 kan nei a, 9853 voters kan nei a, ward nganaah hian polling station hi paruk kan nei a, tichuan voters hi 6010 kan nei a, tin, ward sarihna- ah hian polling station hi pakua kan nei a, voters hi 9566 kan nei a, ward pariatnaah hian polling station pasarih neiin voters 6123 kan nei a, ward kuanaah hian polling station pakua neiin voters 8614 kan nei a, ward sawmnaah hian polling station pasarih neiin 6566 voters kan nei a. Tin, ward 11-naah hian polling station hi 11 neiin voters hi 8640 kan nei a, ward 12-naah hian polling station 10 neiin voters 10336 kan nei a, ward 13-naah hian polling station hi 6 neiin voters 6504 kan nei a, ward 14-naah hian polling station hi 9 neiin voters 9148 kan nei a, ward 15-naah hian polling station hi 9 neiin voters 8791 kan nei a, ward 16-naah hian polling station 9 neiin voters 9346 kan nei a, ward 16/17-naah hian polling station 10 neiin voters 8699 kan nei a, ward 18-naah hian polling station 14 awmin voters 13291 kan nei a, ward 19-naah hian polling station 8 neiin voters 8494 kan nei a ni. Tikhan a rual thei ang bera ngaihtuahin, tichuan wards 19 laiah Aizawl khawpui hi then alo nita a ni tih hi kan hria a ni. Tichuan Article 243K in min pek angin leh sub-section 345 of Municipality Act 2007 in a remtihna angin Governor of Mizoram State Election Commission kha alo buatsaiah ta a. Tichuan anni hian thuneihna Constitution leh kan danin min pek ang khan inthlanna kan nei a, inthlanna kha nikum November ni 4 khan buatsaiah a ni ta a.

Tichuan kan hmuh tak chu tunah hian INC in Councillor 5 neiin, ZNP in Councillor 5 neiin, MNF in 5 an nei a, MPC in 4 neiin ward 19-ah khan tikhan party hrang hrangin Councillor kan lo nei a ni tih kha kan hria a ni. Pu Deputy Speaker, a nihna takah chuan Municipal Area hi tha deuh zawk leh efficient deuh zawk leh effective deuh zawka enkawl an nih theihna tur atan he Wards hi siam mai a ni zawk a, a nihna takah chuan Municipal hi hemi political body anga va en ren run tur pawh hi a ni chuang lo a ni. Aizawl khaw pumpui kha Municipal Area-ah min then a, tichuan a tul angin hna thawh mai tur a ni a, chuan he kan council ho hian anmahni area theuh zelah effective management of the area an neih theihna tur atan hetia thlan chhuah hi an ni mai a ni tih hi vawiinah hian kan hriat hi a tul a. Helai ward pakhata MNF party emaw ward danga PC emaw, ward danga Congress party-in emaw ro a rel tak avanga helai kha hlamchhiah a helai kha duhsak bik nihna

tur anga he wards hi then a ni lo a ni tih hi vawiinah hian kan rilruah hian lian sela a thain ka ring a ni. Tichuan 13<sup>th</sup> Finance Commission-in recommendation tha deuh mai a siam ta a, grant chi 2 hi a pe ta a, local body-te hnenah hian, a pakhat chu general basic grant a ni a, a pahnihna chu general performances grant a ni a. Tichuan, Basic Grant atanga fund an hmuhte hi hemi an fund an hmu hmasak pawh kha UC an pek that theih dan azir khan a subsequent release of fund kha lo kal zel tur kha a ni tih tunhma atang pawh khan kan hriat tawh thin kha. Helaiah hian condition pakhat an siam chu, Urban Local Body-te hian Annual Development Plan khawpui chhung chei nan an siam ang a. An tum ber chu khawpua cheng mipuite an nun siam that, an dinhmun siam that, khawpui cheimawi kha a ni tih kan hriat reng a thain ka hria a. Grant an pek theihna hrang hrang an han sawite pawh hi solid waste management hi PPP mode-a enkawla, hemi atan hian machineries-te, equipment-te erawh chu lei phal a ni lo thung a. A chhan chu heng hote hi chu 12<sup>th</sup> Finance Commission-ah khan an lo lei tawh tura ngaihna kha an nei a ni.

Tin, a pahnihnaah chuan khawpui chhungah bawlhhlawh luankawr sewage drainage zau zawk siam te a ni a. Khawpui chhungah khan lakes-te leh tuikhurte venhima a theih ang chin china a khuhnate siam thata compound wall fencing-te siam a, terrace te, bundhs te a theih ang anga han siamte a ni a. Chubakah chuan khawpui cheimawi nan thingphunte hi an ngaipawimawh em em a ni. Khawpui chhungah hian Urban Forestry, ramngaw siam a remchang ang angah, helaiah, helaiah, helaiah tia khawpui cheimawina tur atana ramngaw siam kha an tih tur a ni e an ti a. Chubakah chuan, mipuite an enjoy theihna tur atan park tha tak takte siama, thing mawi chite phun a ni a. Open space-te khatiang ho kha enkawl that leh vawnhimte a ni tih kan hriat reng atan a tha a. Delhi-ah kan kal theuh a, Kolkata-ah te pawh kan kal a, Bangalore-ah te pawh kan kal a, kan hmu a, khawpui lai takah te pawh park mawi deuh deuhte a awm a, urban forestry an uar em em a. Chu chuan ram a timawi a ni. Bangalore ngat te phei chu Green City an ti mai a, thingphun a nasa em em mai a. Inah hian chhawng thumna vel atang hian han en ta ila thing a ni deuh put mai a ni. Khatiang ang kha an rilruah a awm a. Chuvang chuan, keini pawh hian khatiang ang kha tih ve theih dan hi awm se la tih hi an rilruah min neihpui a ni Govt. of India hian tih hi kan thinlungah awm sela a thain ka hria a.

Tin, a dang lehah chuan grant an pek theihna chi khat leh chu Municipal School building, Municipal area chhunga school building tha lote, chhiate a lo awm a nih chuan siamthat a, an school mamawh angte pawh a tul ang anga pek hi a ni e tih a ni a. Chuvang chuan, Govt. of India-in Municipal ho hnena Local Body Fund a lo pek hi an ngaipawimawh em em a. 13<sup>th</sup> Finance Commission chuan condition pakhat a siam phei chu Municipal Council ho hnenah hian Local Body Grant hi a rang thei ang berin State Government hian a pe tur a ni. An hmu atanga within 5 days-ah an pe tur a ni. Electronic Transfer-in an ti ang tihte a ni a. Municipal Council hian Account an nei ang a. An account-ah khan within 5 days-ah an pawisa kha va deposit nghal tur a ni tih te a ni a. Chuti a nih loh phei chuan a pung nen kha pawisa kha pek tur a ni e, an pek loh chin ang ang kha tihte a ni a. Chutiang khawp chuan an ngaipawimawh a ni tih kha Pu Deputy Speaker, ka han sawi duh a ni.

Tichuan, vawiinah hian ka han sawi duh chu, Municipal Council inthlan hma khan engemaw zat chu pawisa kha pek a lo ni tawh a ni tih kan hria a, chuan second installment alo kal khan a pawisa kha Municipal Council hnenah

khan pek nilo khan State Sorkarin an la inbuatsaih tawk lo deuh a ni ang e tihna rilru puin an ti anih ka ring a. Pawisa kha an mahni hnenah pe lo khan Work Order-te kha an siamta a ni tih kha kan hria a. A Work Order kha an sem a ni ringawt mai a, chu chu anni pawhin hrehawm an ti a, an tih tur nia an hriat ve si a sum khawih silova work order ringawt a semtu han nihte kha Council pawh khan hrehawm kha an ti ve khawp mai a. Chuvangin an mawhphurhna leh an tih tur nia an hriat tihtir an han nihlohnah khan tlemin vuina rilru an nei ve a ni tihte pawh kha kan hriat atan than ka hria a. Tunah hian sum dang a rawn thleng leh ta a, chu sum chu tunah hian sem alo nita a, an mahni hnenah thun alo nita a, ka hriatsual loh chuan kan chhut chhin a, cheng nuai 457 leh sing 8 sang 5 hi tunah hian Municipal Council ho hnenah khan pek an lo nita a ni tih kha kan hria a. Tichuan tunah hian hei an han sem ta a, an mahniin an sem niin a lang a, an semnaah pawh hian anihna takah chuan an mahni Municipal Council Body khan an ngaiantuah tlang ang a, an mahnin tul an tih leh tha an tih ang khan an sem tur nia an ngaih laiin kan Council hotute rilru tlema tina deuh tu chu engmah hriattir a ni vak lova, Development Fund kha 20 lakhs theuhin an mahni ward chhungah khan lo siam sela, an ti a. Mahselang chumiah pawh chuan alo siam tam fal deuhte pawh an lo awm deuh nia hriatnate kha an mahniah khan an nei a, thenkhat kha 20 lakhs aia tam siam suh u tih laiin thenkhat kha chuan 30 lakhs-te pawh khan an lo siam ta a. Tichuan a sem te pawh kha an vaia hriatpuinaa sem nita lo khan Chairman-te, Vice Chairman-te leh Councillor pakhat emaw telhin mi pathum vel khan he sum hi an lo sem nia hriatna kan nei a. Tichuan tuna an han sem dan hi Pu Deputy Speaker han chhiarchhuah lawk ka duh a, i phalnain hetiang hi a ni a, Ward No. 15-ah chuan hei hi Chairman ward a ni a, nuai 34 leh sing chuang a ni a, tin Ward No. 7 ah chuan hei hi Vice Chairman Ward a ni a, nuai 31 leh sing 5 a ni a. Tin, Ward No. 2 ah chuan hei hi Executive Councillor pakhat ward a ni a, nuai 28 leh sing 8 a ni a, Ward No. 10 ah chuan nuai 28 leh sing 7 leh sang 5 a ni a, tin, Ward No. 17-ah chuan nuai 27 leh sing 5 a ni a, Ward No. 11 ah chuan nuai 24 a ni a, Ward No. 14-ah chuan nuai 24 a ni a, Ward No. 19 ah chuan nuai 23 leh sing 9 a ni a. Ward No 13-ah chuan nuai 23 leh sing 3 a ni a. Ward No. 12 ah chuan nuai 23 a ni a, Ward No. 18-ah chuan nuai 22 leh sing 4 a ni a, Ward no. 1 ah chuan nuai 21 leh sing 1 a ni, Ward No. 5-ah chuan nuai 21 a ni a, Ward No. 3-ah chuan nuai 21 a ni a, Ward No. 9-ah chuan nuai 21 a ni a, Ward No. 8-ah chuan nuai 21 a ni a, Ward No. 6-ah chuan nuai 2 leh singnga a ni a. Ward No. 5-ah chuan nuai 2 leh singnga a ni a, Ward No. 16 -ah chuan nuai 2 leh singnga a ni a. Ka han sawi duh chu heta a landan mai hian a politic zawng pawhin han sawi ta ila, Ruling party leh ZNP tena a dawng tlem berin a dawn hi nuai 23 a ni a. MNF leh MPC in an dawn san ber chu nuai 22 leh sing 4 a ni a. Tichuan, Ruling Party-in an dawn tlem ber kha nuai 23 a ni a, a hniam ber pawh kha lehlam pangin an dawn san ber aiin a la sang anih chu, chu chu a ni a. A hniam ber chu nuai 20 leh sing 5 a ni, nuai 20 leh sing 5 dawng hi pathum an ni a, nuai 21 dawng hi pangnga an ni bawk a, pakhat hian nuai 22 leh sing 4 a dawng bawk a, kha kha a sang ber a ni a, hemi a sang ber pawh hi lehlampang dawng hniam ber ai pawh khan a la hniam ta zawk a ni tih kha ka'n sawi duh a ni.

Chuvang chuan, Aizawl khawpui hi khawpui pakhat angin kan en a tulin ka hria a, hemi Ward then dan erawh hi chu political constitution anga heliaih hian chang tlem se, heliaih hian chang tam se tih ang feeling nei lovin, Aizawl khawpui hi chei tum theuh a ni a. Chuvang chuan, anmahni area theuh kha mawihnaikata an chei chuan Aizawl khawpui a lo mawi mai dawn alo ni a. Chuvang chuan, hetianga nuai 10 tehmeuh maia a sang ber leh a hniam ber

inthlauhna nuai 457 Ward 19-a han insema alo awm ta hi Pu Deputy Speaker, thil diklo niin a lang a, helai tak hi ka'n dinchhuahpui nachhan chu a ni.

Hemi hian a kawhhmuh chu Aizawl khawpui mipuite hi kan inthen dan hi, kan hmuh dan leh kan endan hi 1<sup>st</sup> Class Citizen, 2<sup>nd</sup> Class Citizen. 3<sup>rd</sup> Class Citizen ang deuhin mipui hian ngaihdan min nei ang tih hi a hlauhawm khawpin ka hria a. Tih emah chuan khawi Ward-ah pawh hian en ta ila, mipui kan in mixed dan hetiang hi a ni a, inthliar hrang thei hi kan nilova, a Party ang pawhin kha Ward-ah khan Party tin kha an awm vek tih hi kan hriatreng atan a tha a ni. MNF Party mi kan awmfal bik lova, Congress Party kan awmfal bik lova, ZNP kan awmfal bik lova. Kha Ward chhungah khan Party kan awm khawm vek a ni tih hi kan hriat a tul a, kohhran ang pawhin kohhran hrang hrang kan awm khawm vek a ni tih kan hriat a tul a. Chuvang chuan, Pu Deputy Speaker, helai tak hi kan hriattlan atan a thain ka hria a, vawiina kan thil sawi hi Aizawl mipuiten min thlir reng tih kan hriat a tha. Aizawl mipui hian he kan Aizawl khawpui chhungah hian inrual tlang tak leh pheikhai rual taka hmalak hi an duh a ni tih hi kan hriatreng atan a thain ka hria a, chumi rilru ngaihtuahte chu nei rengin vawiinah hian kan ngaihtuah atan a thain ka hria a ni. Tin, mitamtak ngaihdanah chuan Municipal Council hi Autonomous Body an nih avangin an pawisa insem tur chungchang thuah hian keini hian enge sawitur kan neih sorkar hian tih hi kan ngaihdan tam tak a ni maithei a. Mahse, hei hi Pu Deputy Speaker, kan ngaihdan tur niin ka hre lo. Municipal Council hi chu a creature a ni a, he House hian Municipality Act 2007 hi a siam tawh a, a creator chu he House hi kan ni a. Chu creator chuan he Municipal Council ho hnenah hian hetiang hian ni rawh se, kan tih hi chu sawi theih dan kan nei thei a, tin, tihte pawh hi an ti ve ngei ang tih pawh hi ka ring tlat a ni. Chu chu kan ngaihtuahnaah pawh hian awm sela a thain ka hria a. Tin, hetiang ang taka kan ti thei a nih chuan Pu Deputy Speaker, Aizawl khawpui hi Mizoram a ni mai a, Aizawl khawpuii thil an tih hi chu thingtlang khaw hmun hrang hrangah hian an hre nghal deuh zel a ni.

Vawiinah hian thingtlang kuaah Party Party tih inthliarnate pawh a awm a ni maithei e. Nimahsela, keini hian Municipal Council atang hian equal distribution anga hma kan la a, induhsakna awmlova, rualkhai taka hma kan la a, sum leh paite kan sem thei a nih chuan he kan thiltih hianin thingtlang kua pawh a effect anga, kan society pawh hi nasa takin min hruai tha ang tih hi ka ring tlat a ni.

Chuvang chuan, vawiinah Resolutin hi Aizawl khawpui tan mai chauh pawh a lo ni lova, Zoram pumpuiin an hmel hriat a, an hriat chian a, hetiang hian Aizawl khawpuiah pawh, tihan thil an lo ti a nih hi tih an lo hriat a, thingtlang khuain enkawlna pawh rual tlang zawka an kal theihna tura hmanraw tangkai tak a nih theih ka beisei a. Chuvang chuan Mizoram thatna tur kan ngaihtuah a, chumi kan ngaihtuahnaah chuan he thil hi thinglungah lut sela, thain ka hria a ni. Aizawl khawpui siam kan tum a, Aizawl khawpui chei mawi kan tum a, chumi chei mawi kan tumnaah chuan rilru intihnatnate emaw, indah hrannate emaw, inlak hrannate emaw hi awmlo sela. Amaherawhchu, kan mamawh ang theuhin vawiinah hian he Aizawl khawpui hi lungrual tak leh pheikhai rual taka kan kaltlan theihna turin sum leh pai Thirteenth Finance Commission-ina min pek ang taka sem tlan a nih theihna tur atan vawiinah hian he resolution hi ka rawn pulut a ni a. Chumi rilru leh ngaihtuahna chu nei reng a, dinglam pang amite pawh hian kan Resolution

hi min support a, min pawmpuia lungual taka he thil tha hi kan tih chhoh theihna turin kan ngaihtuahnate senga hmang turin ka rawn sawmin ka rawn ngen duh bawk a ni e. Ka lawm e.

**Pu LAL THANHAWLA, CHIEF MINISTER :** Pu Deputy Speaker Municipal Council inthlan lai khan tuna Member zahawmtak Party-te khan Municipal Council hi State thuneihna hnuaria mi a ni lova, sum pawh hi direct funding a ni a, Central thuhnuaria mi a ni. Chuvangin State-in thuneihna an nei lo an tih kha kan buaipui ber kha a ni a. A, a lo dik love a tihna em ni? Member zahawmtak khan.

**DEPUTY SPEAKER :** Awle, kan sawi tlang dawn mai ang a. In sawi dan tur chu a chiang deuh nghal mai a, lehlam tan dan tur pawh. Engpawh nisela, hemi resolution hi engemaw municipal chungchang House-ah te resolution an lo admit mai le, tih te pawh in thinlungah alo awm maithei a. Hei hi municipality chungchang a ni lova 13<sup>th</sup> Finance Commission-in khawpui cheina atana sum a rawn pek chungchang anih avanga admit kan ni tih kha in lo hre dawn nia, Member ten, a hmasain. Awle, kan sawiho dawn anga, minute engzah den den nge kan inpek leh dawn? Minute 5 nge ? Member-ten han sawi teh u, nakinah khan in khamkhawp lo leh viau hlawm ange, minute 5 a tawk maw ?

**Dr. R. LALTHANGLIANA :** Pu Speaker, ni e, minute 5 hmangte pawh an awm anga, a aia rei hlekta pawh phalsak ta ila, minute 10 erawh pel lo tlang ta ila, a tha mai lo maw? Minute 10 kha pel lo ta ila kan zavai paw'n kan sawi lo maithei bawk a, kan hah rei deuh hlek tawh bawk a, khatiang deuh khan kal ve ta ila.

**DEPUTY SPEAKER :** Anih leh minute 5 ti ila, chuan a tuah zualpui chu kan inrethiam dawn nia. Aw, tunge sawi hmasa ber ang le. Awle, Pu Zodintluanga ilo sawm ang.

**Pu ZODINTLUANGA, MINISTER :** Pu Deputy Speaker, ka lawm e. Kan Member zahawmtak Pu C.Ramhluna Resolution "13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se" tih kha a rawn move a, a rawn move lai tak khan Pu Deputy Speaker, uluk takin ka lo ngaithla a, Pu Rajiv Gandhi-in mipuite hnena thuneihna semzai te, Urban local body-ten anmahnii ro an inrel theihna tur atana India Constitution pawh tihdanglam hial ngai khawp a 74<sup>th</sup> Amendment a awm thute a rawn sawi a.

Tin, Urban Local Grant, 13<sup>th</sup> Finance Commission-in guideline fel tak a a rawn tih, a rawn thlen atanga ni 5 chhunga Urban Local Body a pek tur a nih thute a rawn sawi khan a lawmawm ka ti a. Amaherawhchu khatiang ang khawpa mipuite hnena thuneihna semzai tur anih thu chiang taka a rawn

sawi laia Urban Local Body Grant hi Aizawl Municipal Ward tinah rualkhai taka pek thin ni rawh se, a tih lai kha he House zahawmtaka a rawn pulut leh mai si hi mak ka ti a. Hetiang ang rilru hi engtinng a put theih mai aw, ka'n ti a, ka'n inngaihtuah khan, ama sawi tho mai, nichinah kei chu sawti lam atanga rawn kal ka ni a, kei chu Aizawl mi ka ni lova a rawn tih khan, sawti lama dan tha lo tak an lo hman thin kha Aizawl rawn putluh a tum ta em ni? ka ti a. Lai Autonomous District Council-ah chuan an Grant kha equal share an ti a, MDC zawng zawngah an inseem tawp mai a ni. Chutiang chu a tha lo kan ti a, vawiinah Congress party-in sorkarna Lai Autonomous District Council-a kan neih atangin kan titawp a, tha tawh lo kan ti a ni. Heng Grant angle hi chu a need – based-in a kal a nga, a mamawhna angin a kal mai tur a ni a. Khatiang ang pawh vawiina Aizawl Municipal Council-a kan Grant-te equal share angreng deuha ward tina rawn sem an tum mai hi sawti lam atanga dan tha lo tak, keini party chuan tha lo kan tih tawh rawn putluh niah ka ngai a, hei hi tha lo ka ti takzet a.

Tin, kan Urban Local Body-ten fund kan neih angle hi Pu Deputy Speaker, equal anga chumi ward-ah chuan hemi hi dah ang u tih mai mai chi pawh a ni lo. Need-based a ni a, Aizawl khawpui chhungah hian a mamawhna angin, entirnan, bial lian deuhte leh bial hnufum deuh, khutah Sakawtuichhun te leh Tanhrilah te mamawh tam tak an neih laiin Dawrpuiah te Zarkawtah te chuan an mamawh a lo tlem ve deuh thei a ni. Aizawl khawpui kan cheina turah hian a need-based-in annin an ngaihtuah ang a, Aizawl Municipal Council-a kan hotuten anmahni thuneihna kan pek angin hetiangte chu an ngaihtuah mai tura ka ngaih laiin he House zahawm taka an thuneihna lak sak ang khawpa anmahni hnathawh tur ang, chutiang chuan ti rawh u ti tur ang khawpa he House-a a rawn pulut mai hi pawi ka ti a. Kan Member zahawmtak khan he Resolution hi chu in withdraw thei sela a lawmawm hlein ka ring a ni.

Mizoram hian Urban Local Body pakhat chauh kan la nei a, chu chu Aizawl Municipal Council, AMC kan tihi a ni. AMC kan neih hma hian 13<sup>th</sup> Finance Commission atangin Urban Local Body atan hian grant-te a rawn kal thin a. Chung chu kum 2010-11 ah kha chuan AMC lo pian hma hi chuan a Nodal Department, Urban Development & Poverty Alleviation Department-in a lo kengkawh thin a, 1<sup>st</sup> instalment pawh hman a ni. Tin, Aizawl Municipal Council a lo pian tawh hnu khan a hman bang la awm kha anmahni hnenah thehluh nghal a ni. Tin, kum 2011-12 atana Urban Local Body pawisa rawn kal zawng zawng kha, Pu Deputy Speaker, anmahni ro inrel theihna tur atan anmahniin a tha an tih leh khawilaiah nge Aizawl hian develop ngai an tih zawng zawng atan Sorkarin kan pe a ni. Chutiang chu a nih avangin he 13<sup>th</sup> Finance Commission U.L.B (Urban Local Body) hnena an rawn pek danah pawh recommendation fel fai taka rawn siam sa an nei a. Chung chu hlawm hnihil han then ta ila, pakhatnaah chuan core service kan ti a. Khawpui chhung tui mamawh, solid waste management, sewage, street light leh civic amenities, civic service, kawng, step etc. te hi a huam a ni. Tin, non-core service kan tih, salaries, wages, administrative cost, information, education and communication, creation of data base tihte hi hman dan tur chiang tak a rawn siam a ni.

Hetiang a nih avang hian Urban Local Body fund hi ward tinah equal share-in i kalpui ang u, tihi a pu Deputy Speaker, thil tihi theih loh a ni hrim hrim

a. Tin, nichina kan sawi tawh ang khan, sawti lamah equal share an tih kha tha lo kan ti a. Vawiina helaia fund rawn kal equal share ang tho a dah leh tum kha a tha lo kan ti a. Councillor-te tana ward development fund ang maia hman tura rawtna angah a ngaih theih hial a ni. Chuvang chuan Aizawl Municipal Council kan neih tawh hnu, ammahnia rorel tura kan dah ngam tawh a nih chuan ammahnin tha an tih leh awm an tih anga tih tir mai hi a him tawk a. Kan hriat theuh angin Pu Deputy Speaker, helai House-ah ngei pawh AMC te hi hna thawh tur in pe lo, an tih tur an ti har lutuk, dawr ruak nghak ang maiin in siam, te an ti a ni. Chutiang khawpa ammahnin pawhin hna thawk thei khawpa duh an neih laia, vawiina an thu neihna laksaktu leh ammahnin hna thawhna tur pawh helai rorelna sang bera chawh rual a, resolution an rawn pulut hi chu an rilru leh ngaihtuahna a chiang hlein ka'n hria a ni.

Tin, kan hriat theuh angin tualchhung sorkar, vawiinah, ammahnin a thu neihna nei turin leh ammahnin area-te develop-a thu neihna nei turin sorkarin kan ngaihtuah mek a. Department hrang hrangte pawh an kuta dah theihna turin ruahmanna kan la siam zel zawk a ni a. Anmahni an intodelh theih a, ammahnin khawtlang tan leh ammahnin ward chhungte cheina tur, Aizawl khawpui cheina tur ammahnin kuta a awm hi Pu Deputy Speaker, a la him berin ka hria a. Chuvang chuan vawiinah kan Resolution, 13<sup>th</sup> Finance Commission-in pawisa min rawn pek ang chi equal share ang a, Councillor ward hrang hranga ward development fund angreng a hman tumna resolution hi Pu Dy.Speaker, kan member zahawmtak hian in withdraw thei hram sela, heng hi chu ammahnin local body an nihna ang a, ammahnin tha an tih leh rem an tihna ang a, anni base-in khawiah nge an hmanna tur ang chi chu ammahnin kuta dah mai a him zawk a ni tih hi Pu Deputy Speaker, ka rawn sawi ve duh a ni e. Ka lawm e.

**Pu K. LIANTLINGA** : Pu Deputy Speaker, hun min pe a, ka lawm e. Hei vawiina kan Resolution, '13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal ward tinah rual khai taka pek thin ni rawh se', tih a ni a. He Resolution hi han en thuak chuan a tha thuak mai a, a awm viauin a lang a. Amaherawhchu, han en chet chet a, ngun taka han thlir a, Constitution-te nena thil han thlir a, zau zawka ngaihtuahna leh democracy sorkarte ngun taka a kalphung han thlir chuan he Resolution hi a puluttu hian a ngaihtuah chiang lo a ni awm mang e aw, tih ka rilruah a awm a. Hei, Democracy hnuiah chuan Panchayati Raj, Village Council kan tih angte, Local Body an awm a. Tin, Urban Local Body a awm leh a. Tin, District Council-te, State-te leh National level-ah te a awm a. Khangah khan thuneihna sem sawm, (Decentralization of Power), India Constitution Amendment-te pawh siam a ni a. Chung avang chuan tunah hian heng Municipal Council-te kan han nei thar ve a, kan nei thar chauh a, an thuneihna zuk chhuh sak a, over rule tum lehna hi chu Constitution a kalhin ka hria. Tunah hian District Council-te pawh saw, an Fund chungchang hi helaiah hian rel ta ila, Constitutional body an ni a, 6<sup>th</sup> Schedule-ah, kan tihtur a ni lo.

Tin, Village Council Administration-ah te pawh kan in rawlh tur a ni lo. Kan LAD Minister zahawmtakin a ministry hnuiaia (Panchayati,) Village Council-te sum a semna te pawh kha kan han en a, khaw len dante, khaw tet dante a inang lova, chungte avang chuan ngun taka kan ngaihtuah a ngaiin ka hria a. Tin, an thuneihna, Constitution Act-in a pek ang kha, kan zuk palzut sak dawn a ni tih a ticihang hlein ka hria a. Tunah hian Municipal Council hi Aizawlch chauh kan nei a.

Pu Chairman, ngun taka kan ngaihtuah a ngaiin ka hria. Lungleite, Saihate, Chhimtuipui, Lawngtlaiah ngeite, Mamit leh District hrang hrangah hian Municipal Council han nei leh ta ila, chungah chuan a nih leh 13<sup>th</sup> Finance Commission emaw, State Finance Commission-a pek hi inang khat vekin sem ni rawh se, han ti leh ta ila. Entirnan Crore 8 sem dawn ta ila, Aizawl crore 1, Mamitah, Serchhipah 1 crore ti ta zel ila, Aizawl khawpui chu a lo berah pawh hmun ngaa thena hmun khat Mizoram population awmna a ni a. Kan State Finance Commission-in emaw Central Finance Commission-in a rawn pek emaw kha kan dah len a ngai a ni, kan State Capital anih avangin, chutiang ang chuan helai thuah hian kan dan leh dunte, India ram dante taka en a ngaiin ka hria.

Tin, Central Finance Commission pawh hian State hrang hrangah hian a sum pek dan hi a in chen lo. State lian deuhah hian chuan a pe tam a, state te deuhah min pe tlem deuh a, khatiang ang khan thil tam tak a awm a, rual khai taka tih theih kha a ni lova. Chuvang chuan a thawhna tur hmunte, a village area angah pawh khanin, a suburb lai deuh leh a penhleh deuh laite pawh kha a awm a ni, khang develop ngai zual tak takte kha a awm a, khawpui lailiah te hi chuan a ngai lo deuhva. Tin, tunah hian Aizawl khawpui hi AMC Counselor-ten an enkawl dawn a, anmahni jurisdiction-a an counselor-te nen hianin ngun taka kan han en chuan, tuna a tlem leh a tama han tih pawh kha, vawiinah hian Congress leh ZNP MLA bial a ni, MPC Pu Thena bial pakhat nen, a dang Congress bial pariat a ni a, ZNP bial pahnih a ni a. Hetiang angah hian ngun taka kan ngaihtuah chuan Mizoram cheina turah leh siamna turah pawh hian MLA Constituency-ah pawh Development Fund leh thil dang hi a rual vek hran lo, a pawimawh zual leh a tul a awm a, entirna tawi te pek ka'n duh a Pu Chairman, ka bial chhungah hian. Ka bial chhung khu opposition bial kan ni a state level-ah chuan, amaherawhchu a hmunte kan lo neih that a, a remchan avangin Mini-Sports Complex, vaibelchhe sawmpanga man min rawn pe a ni, a lawmawm em em a ni, opposition bial a ni, kan lawm a ni. Amaherawhchu, tunah hian bial tinin angkhatin sem ni ta sela Development Fund lo kalah khan harsatna kan tawk dawn a ni. Ka bial chhunga bypass road chungchang pawh hi ka sawi duh a, Chief Engineer-te ka sawipuinaah pawh kan bial hi World Bank road-in min pawh a, chutah chuan bypass road hi Lunglei kalpawhna kha a ni a, Aizawl chhuah lam zawng zawng hi kan chhuak duh a ni, tiin kan han nawr a, chutah chuan, e, a ni tak maw an ti a. Chite lui kal kaina atan cheng vaibelchhe khat leh a chanve, ₹ 1,50,00,000/- (nuai za sawmnga) min ruahman sak a, tin, a lei dawh nan ₹ 2,50,00,000/- (nuai zahnih leh sawmnga) min ruahman sak a. Tin, ITI atanga pawh nan ₹ 1,20,00,000/- (nuai za leh sawm hniih) opposition bial ni mah se tam tak grant hi alo kal a ni. Kha kha tunah hian ang khatin min chawk rual dawn ta se keini bial ang chuan chan kan nei lovang. Chuvang chuan a pawimawhna leh a tul dan anga fund hi sem sawm anih avang hian; State Sawrkar hian AMC thu neihna hi lak sak lovin, an mahni rel ang ang hian sum leh pai state sorkarin a pek tawh hi chu rel thei sela pawisa state-in a pek tawh chin hi chu rel thei sela a tha mang e, chuvang chuan he resolution hi han en chian hian pass chiah ka ngai lo a ni, tih kha ka sawi duh a ni.

**Pu P.C. LALTHANLIANA, MINISTER** : Pu Chairman thui tak sawi ka tum lova, kan resolution hi a move-tuin an sawi tak tak chuan 2010-

2011 a an hnena thuneihna kan la pek pum hlum chiah loh paw a tih thute, tun 2011-2012 a thuneihna kan han dah lawmthu a sawi ruala an thuneihna kan pek tawh hnu a helaia kan han ngaihtuahpui leh tur anga an han pulut leh si hi hriatthiam pawh a har viau a ni.

Engpawhniela, Pu chairman thil hrang hrang pawisa dawn dan in thlau anga a rawn sawi kha kan lo thlir ve mai mai a, tun 2010-2012 a dawng hnem ber nuai 34 a tih hi 2010-2011 a dawng tlem ber atanga chhiar 3-na nuai 30 chuang an dawn laiin a bialah khan 2010-2011-ah nuai 19 chiah an dawnga khatih lai khan ava rual lo e a ti bik lo chu a ni a, a dawn tam lamah 16-na a ni. Chuvangin vawiina lo lang tam deuh hi chu a awm ve hle niah ka ngai deuhvva. Tin, Pu chairman vawiina dawng han tih ho hi kan en mai mai a 2011-2012 a sum sem dan ang hian a kal zel ang tihna pawh a ni chuang lova, 2010-2011 a AMC ward tinah lo sem a ni tawh a, vawiin ward 18-na nuai 22 lek dawng resolution move-tuin an tih kha 2010-2011 ah chuan vawiina dawng tam berin nuai 19, 2010-2011 ah a dawn lai khan, ward 18 na hi chuan, nuai 40 a ward-ah a dawng a ni. Nuai 24 a tlem pawl tia an sawi ward no. 14-na, nuai 24 chauh dawnga in sawi khan nikumah nuai 34,8000 a dawng a, tin nuai 23 chuah tankuma dawng tlem a rawn sawi no.12-na khan nikumah nuai 41,9000 a dawng a, tin, tun kuma nuai 29 chauh dawng tlem an tih khan nikumah nuai 4,23,000 a dawng a, a tam ber dawttu a ni a, a tlem ber pawl an tih khan nikumah nuai 3,73,000/- a dawng a ni. Vawiina dawng tlem ho anga lang nuai 20 leh tlem bawr ho hi, nikuma a dawng tam ho vek an ni a. Khatih lai khan a dawng tlem ho khanin a rual khai deuhin an ti bik lemin ka hre lova. Hei a statement engkim 2010, 2011 leh 2012 pawisa pek dan a awm a. Vawiinah a dawng tlemte a dawng tam deuhah an lo tang ve deuh a, a dawng tamte a dawng tlemah an lo tang ve deuh a ni mai a. Chuti tehchiama he House-a Resolution ang em em a House-in han rel chi a ni dawn em ni aw ka ti deuh a. Chuvang chuan a puluttu hian AMC te thuneihna an kut zala awm kha a duh bawk a. Anmahni thil lo tih a ni bawk a, keinin hetah kan tih loh lo rel vak hi awmzia a awm vak lova. A withdraw anih bawk si loh chuan buk mai ila, kal zel tur nge tur loh tih leh kan pawm leh pawm loh te. Chuvangin, helaia sum sem dan vawiin statement ringawt atanga thlira hleih neih lutuk ang a tih a, nikuma an dawnte pawh hi thlir ta ila, nikuma a tam tam te kha an lo ni ve bawk a ni tih hi kan hriattlan hrim hrim atan Pu Chairman, ka'n sawilang duh a ni.

**C H A I R M A N** : Hun i hmang thiam khawp mai. Pu Lalthansanga ilo sawm ang.

**Pu LALTHANSANGA** : Pu Chairman, hei vawiina kan resolution hi a rawn move-tu hian rualkhai taka pek thin ni rawh se, a rawn ti a. A rawn inthlahrung hlein ka hria a, pek thin ni rawh se, pek ni rawh se han tihte hi chu nise han sawi khawm awm chi deuhah pawh ka ngai chiah lova. Pek thin ni rawh se ti a dim tak maia a rawn dah hi a ti tha hlein ka hria a. Hei he House-ah hian ka han sawi thin a, reorelna hi rualkhai thei ang berin kal thei sela kan ti a. Hei kan budget reng reng pawh hi han en ila happy index hi a ni deuh vek mai a. Mipuite lawmna tur atana a tlangpuia kan han siam hi a ni deuh a. A infrastructure lampang ai mah pawh hian happy index lampang hi ami aw kan kawh deuh hlek tih tur deuh hian kan kal a. Chu chuan vawiin- ah kan budget-ah hian Additional Resource Mobilisation hi kan deficit

nasa em em thin a ni a. Chuvang chuan hetilai angte han en chuan kan budget hi Local Body Grant han in pekah te pawh hian kan hun kal zel turah hian i dinglama thute, i veilama thute pawh hi inthut chhawk deuh mai mai zel a ni a. Chuvang chuan, hetia resolution ni thin rawh se han tih a, inthlahrung tak maia anmahni Autonomous Body an nih ang ngei pawha mahnia han kal tur anga engkim mai anmahni kuta rorel tur ang anih lai khan, he House atanga anni hi siam an nihna ang khan kan Councelor-te hi an lawm loh chuan Aizawl mipuite aiawh lawmlo an nih tlat avang khan hei hi kan mover-in a rawn putluhna rilru ni deuh hlekin ka hria a. Chuvang chuan rualkhai taka kan lawm hi a tha mai awm mange. Vawiinah hian he House hian chu rilru nen chuan he resolution hi ti zawng hian, a tha alawm mawle ti a, ni rawh se han tih lai hi, khamiah khan tha kan tih tlan te pawh kha a tha mai awm mang e aw tih ka rilruah a awm deuh hlek.

Hei tun tum AMC inthlanna result han chhuakah te pawh khan kan khawpui rilrute ala tha hlein ka hria a. Tumah thlei bik neilovin party tin-te inrualkhai dan danin min han dah a. Chuvangin, rorelna pawh hi rual khai taka kal tur hian min duh hle niin ka hria a. Chutiang angte chu kan rilruah awm reng sela. Chumi thinlung chu hre rengin he Resolution-te pawh hi kan sawiho thain ka hria a. A changa han tam deuh te, a changa han tlem deuh te, heti lai pawh hi a awm tur chu a ni ngang mai a. Mi base-a han tih te pawh hi a tha hle ang tih-te pawh hi ka ring a.

Hei keini Zarkawt Vengah te sawn mamawh lo deuh hlek angte khan kan Minister khan min han sawi a. Zarkawt Committee-ah hian Chairman ka ni ve a, a hautak hle mai a, kan han fang thin a Pu Deputy Speaker, Zarkawt Veng niawmlo tak mai hi a ni a. Kan drainage te reng reng saw a out dated vek mai a ni. Chuvangin, hna hmasaah han tih turah te pawh hian dah nise cheng nuai 900 leh tih vel lai hi keini Aizawl 'E'-te chuan kan han hmu dawn ni te pawhin a lang a. Chutiang sanction-te pawh chu a han awm a. Lehlamah chuan West-ah te chuan cheng nuai 600 emaw lai a ni a. A inthlau mange aw East leh West ti zawng pawha an ngaih theih rual khanin, tuna Zarkawta in han kal a, in hriat loh laiah sawn luikawr a awm a, P.C. Ministry khan a siam a ni a. Kan han en a, kan han titha dawn a, kan Pu ber kan House Leader-te kawt vel kha a ni a. 1980, 1982 vela an siam tawh kha slap leh a siam reng renge saw a lo tha em em mai a, Y.M.A. hovin kan han sawi thin a, hetiang em ema tha hian a lo siam theih em ni a kan ti hial a. Saw saw kan han titlang leh a tichuan a chungah sawnin Motor te hi an lo kal ta a ni a. Chutiangte pawh chu ka'n sawi nachhan chu thil kha kan hun hmasaah te pawh tha tak tak kha an lo ti a. Nimahsela, kha kha a hnawh tlat kha chuan a thalo te a ni a. Tin, sawi tawh ang khan tunah sawn kan luikawr hnawh te pawh saw kan titlang zo manglo a ni.

Chuvangin, Zarkawt vengte hi veng changkang deuh tih anga han sawi hi chuanin kan mamawhna saw a NASA zual a. A chhan chu, kan tui hmante leh tuihawkte hi a tam deuh bik a. Tin, chu chu veng mawng lampangah te hian a luang thla leh nghal a. Tuten emaw septic tank-te an lo sah a, a lo put a nih vah chuanin a thlang lam ten min rawn haw em em a, a veng mualphoin kan mualpho a ni a. Chutiangte chuan mi base kan han tih angte pawh hianin hemi ward-ah hian heti zat han tih te hi chuan kan vengte hi a mamawh NASA hlei hlei kan ni mai a. Zarkawt kawn lai takte saw tui luan kawr bo deuhte an awm a. Sawtiangte saw tlaklam nge chhuah lamah kan luantir ang tihte saw NASA takin ngaihtuah a ngai a.

Tin, chumi rual chuan Aizawl khawpui kan han tih lai hi Chanmari, Zarkawt, Dawrpui phei lai te hi a ni a. Vawiinah kan faite hi a ngai nasa zual em em a. Hetia kan zuk sawi ai hian mi vei vak hi an tam a. Chutiang angte pawh chu zirtirna hi nasa lehzuala kan pek a ngai heti lampangah chuan, veng mawng lama ngai lo ang kha kan vengah te hi chuan a ngai hle a ni, chutiang ang thlengte chuan kan ngaihtuah hi a ngai nasa em emin ka hria a.

Tin, he kan AMC hian a rorelna hi integrity zawng hian kal hram hram sela, anmahni councilor ho zingah te pawh hian chu ngaihtuahna spirit nen chuan kal sela, integrity zawnga an kal hi chuan Aizawl khawpui mipui hi vawiinah hian kan rirlute hi heti zawnga khami ward-ah kan awm vang emaw, hemi ward-a awm vang emaw ti zawnga kan ngaihtuah hi a hlauhawm a, chutiang angte chu a piang thei a, chumi ven nan chuan kan resolution rawn puluttu hian chu ngaihtuahna chu thinlung atang chuan a rawn ti ni te hian ka hria a. Chuvang chuan he resolution hi min passpui ngei ula, anmahni rorelna autonomous body, function lampang nilovin chumi ngaihtuahna chu integrity spirit avang zawka he resolution hi rawn pulut a ni tih Pu Deputy Speaker, min hriat sak hram hram turin i dinglam amite pawh ka'n ngen takmeuh meuh a. Hei ka thenawmte lah chuan khati lo zawng khan an ngai na a mahse a chang hi chuan i dinglam leh veilam amite hi policy thuhmun a inrem tlanga sorkarte siam tlang a, thawkho tawh thin kan ni. Keini party hi malsawmna kan ni nasa em em a, dying party hi kan tidam leh thin a ni. Congress party term hnihna kha chu keimahni vang khan a han dam phawt mai a, MNF te mahni a sorkar thei viauah an inngai a, an sorkar thei ta silo kha kan han sorkar tir ta zel kha a ni a. Chuvang chuan, keini party hi khawi lampangah pawh hian kan ngaihdan hi a inang reng a, ngaihdan pakhatin kan thlir a ni tih kha kan ram thatna tur atan chuan engpawh hi kan support thei a ni tih kha Pu Dy. Speaker ka'n sawi tel duh a ni e, ka lawm e.

**DEPUTY SPEAKER :** I sawidan atang khan lehlam lehlam i support-te pawh a ang khawp mai tunah pawh khan. Zarkawt lam khanin an mamawh tam zia kha i rawn sawi bawk si a, semrual kha i support chiah lovin a lang a, a lehlamah khan a resolution kha i support leh bawk si a, chuvang chuan, khawi lam lam pawh kha i tang thei tih kha a chiang a, a lawmawm e. Engpawhnisela, Pu Lalduhoma i lo sawm ang.

**Pu LALDUHOMA :** Pu Deputy Speaker, a thu hi 13<sup>th</sup> Finance Commission nimahsela a tum hi ward tina fund sem dan anih tlat avangin chumi sem theitu chu Municipal Council a ni a, kan thuneihna a nilova. An thuneihna atana kan dah tawh hnu helaia khel sak leh vak mai hi a unconstitutional-in ka hria a, ngun taka ngaihtuah chuan constitution a kalkh a tih theihin ka hria a.

Tin, thuneihna tam zawk nei se kan duh a kan au kan au a, thuneihna engemaw chen pek an lo ni ta a, an han ti ve dawn tan chauhva, kan la pek lohte pawh hi i pekbelh ang u tihte chu niselangin, hetah kan sawi awm a ni a. Mahse kan pek tawh hnu, an kuta awm tawh, kan zuk khawih sak leh hi chu Municipal Council pawh kan hmusit niin ka hria a, kan zahlo a, kan palzut a ni.

Chuvangin admit-te alo ni a, kan sawi a ni mai a, admit loh tur pawh tih nita se a awm ve thoin ka hria, hetiang resolution hi chu.

Tin a practicable lo hrim hrim a, India sawrkar hian State tinah Budget angkhat vekin min pe rawh se, ti ta ngawt ila, UP chan angte, Mizoram chan ang te inan tir tum ila, an nuih a za khawpin ka ring, thil tih chi a ni lo a. Tin, district kan awma, district te leh lian te a thar deuh leh alo ngel nghet tawh te, mamawh dan inang lo te alo awm a, district sum kha a inang vekin pek tur a ni thei ngai lo a, Block te pawh a awma, khua a awm a, khaw lian leh khaw te a awm a, thenkhatin tui te an mamawh em em laiin, khaw thenkhat chuan tuite an lo mamawh tawh lo a, thenkhatin electric connection an neih laiin thenkhatin an lo nei lo a, need base a kal mai tur kha a ni a, tupawh roreltu lo nise. Chuvangin kan mamawh dan a zira kan enkawl tur mipuite ngaihtuahna tello a, a pawng a puia in thei sem ringawt ang hi chu khawvel kalphung a nilo hrim hrim a ni. Chuvangin MNF sawrkar lai pawh khan hemi sum hi engemaw zat an lo dawng tawh a, an lo hmang teuh tawh a, tiang hian an lo ti bik chuang lo a, a tul hunah khan a tul dan angin an lo ti ve mai tho kha a ni a, tuna taka heti zawnga han ngaihtuah that kha a mak ka ti angreng a. Need base-a kal tur anih avangin thenkhat chu a Ward chhunga mi chauhin an hman tur nilo, Aizawl pumpuiin kan intawm turte a awm a ni. Entirnan Vanapa Hall hi lo sa tha dawn ta ni ila, helai bial, helai ward emaw, helai constituency emaw in duhsak bik in tihna chi a nilo a, Aizawl khawpuuin a mamawh kha kan zavaia intawm theih tur hmun khatah kan dah a ni mai a. Chuvangin, Ward mal te te a ngaihtuahna zimte kha neilo, ward-in a mamawh kan ngaihtuah bawk anga, kan zavaia kan intawm turte kha khawiah emaw kan dah anga, kan dahna kha khawi ward emaw ber kha a ni dawn a, kha ward khan a chang tam ti a, kan itsik zel dawn a nih chuan, thil tih chi kha a nilo hrim hrim a. Tin, sawrkar hian MLA bial wise-in Budget hi a siam ngailo hrim hrim a, Municipal a nih avanga ward wise-a, counselor bial wise-a khatianga budget dah kha a nihna tur bik hi a awm lo reng reng a, constituency wise-in budget hi kan siam lo a, tunah pawh Budget Session kan nei meka, Demand kan sawi meka, tuman MLA bial zawng zawng hi a inzatin min pe rawh u kan ti lo reng reng. Chuvangin heng hi thil tih chi a ni pawhin ka hrelo a, han withdraw leh maite kha a zahawm zawk awm mang e aw ka ti hial a.

Tin, Budget allocation leh Sectoral allocation-te pawh hi executive-a awmten an ti mai thin a ni, Official-te leh changtu Minister-ten an ngaihtuah thin a, Plan-te an siam thin a, Budget-te an siam thin a. Ruling MLA-te pawh Budget siamah khan an han tel ngai lo, Opposition MLA-te phei chu kan han tel ngai lo reng reng a, hei tunah pawh Demand kan Minister-ten an rawn phawrh a, an demand phawrh turah hian ruling pawh ruling lo pawh MLA te kan han inhnamhnawih ve lo. Tu sawrkarnaah mah kha kha kan ti ngai lo. A executive post-a awmte khan hei hi chu an rawn siam fel mai a ni a.

Tin, an sem dan kha kumkhat chhung sem dante chauh tuna mi kha a han sawi a ni a, kan ngaihthlak tawh ang khan a hma kumah pawh khan sem a ni tawh a, engmah kan sawisel lova, kan vuipui lova, kumina mite chauh avang khan kan rilru kha a na ta riau mai ni te khan a lang a. Chuti chung chung chuan nuai 20 tih leh nuai 30 tih inkarakhan an tla vek mai, a rual phian mai a ka ti zawk a ni. Mizoram pum hi han ngaihtuah ta ila, constituency wise-a sum kan hmuh dan hi han chhut chhuak ve ta ila, a rual lo zawk fein ka ring a. Kan ward-ten an dawn thliah thliah hi a va rual angreng phian em! a tihzia viau zawk hi maw le

ka ti a, tin, kan ngaihthlak tawh ang khan nikumah te an sem tawh a, kuminah te an sem tawh a, an la sem leh zel dawn a. Chumi anih avang chuan need base-a kal tur anih avangin kumina dawng tam khan nakumah a dawng tam dawn tihna kher pawh a kawk lova, a mamawh ang zel khan a thuneituten an rawn ti ang a. An kuta kan dah tawh chuan vawikhatmah helaiah hian sawipui tawh lo ila, sawi sak tawh lo ila a thani kei chu ka hria a ni.

Tin, kan bial chhung theuha LAD atanga sum lokal emaw, UD &PA atanga lokal emaw, RD atanga lokal emaw eng department atang pawha plan leh project leh sum lokal hrim hrim hi MLA ten kan sem ngai lo reng reng, kan khawih ngai lo reng reng. Municipal Council a nih vanga a councillor ten sum kha sem tur anga ngaihna rilrute hi a awm anih phei chuan hei hi chu sawrkar kalmang a ni lo reng reng a. Amaherawhchu, kha sawrkar emaw, council-in emaw sum neihah khan sawrkar neitute erawh chu an tlangnel nge nge ang tih chu a chiang a ni. Hei sawrkar tam tak kan hrawn tawh, PC sawrkar atang te, Mizo Union atang khan a ni vek a, vawiin thlengin sawrkar hmasaah phei kha chuan a ni lehzual a, Opposition MLA-te hian kan bial chhunga eng hna nge an rawn thawh pawh hi kan hre ngai lo reng reng a, a copy tal hi chu min rawn pe ve teh u kan ti ngam tawk a ni.

Khatiang kha a ni a, he Municipal inthlan dawnah pawh hian kan sawi a, Municipal inthlan hian Aizawl inawpna chauh a khawih a, State sawrkar a piang tawh a. Chuvangin, MLA inthlan a ni lova, State rorelna a nghawng dawn chuang si lova, State sawrkar awm tawh sa hnuaia inthlang tur kan nih avangin sawrkar laka tlangnel tur councilor kan thlan chhuahte hi kan veng kan hmangaih anih chuan a tha anga kan ti a, kha kha a lo thleng dik ta a nih pawhin Democracy kalphung a ni mai a, chu chu thil awmdan a ni a. Chuvangin a sem danah hian a rualkhai aiin a opposite chiah hi ka duh kei chu, an mamawh dan a zirin sem ni rawh se tih hi chu nise a ziawm khawpin ka hria a. Keini lam bialah pawh ward 2 kan awm a, ka bialah khuan, a thlang ta zawkah phei khu chuan Local Council tamtak kan awm a ni. Councillor bial ward pakhatah hian local council 3 chauh awmnate a awm a. Keiniah chuan 8/9 a awm a. Inang theuhin lo inseem ta ila, keini a bial zau leh changkang lo kha chu kan rethei bik ngawt ang. Chuvang chuan ala changkang lo deuh ward tan kha chuan he kan resolution hi a hlauhawm hle a ni. Inang tlang ni lovin, mamawh dan azirin sem ni zawk selangan a tha hle in ka hria a.

Kan thil vei hi a te lutuk mah mah a., Congress leh ZNP councilor-te chauh an kalkhawm bik tihte hi kan vei em em mai a. Party khat chu a hrangin kan meeting fova, rulling-te phei chu a bika han insawm khawm tul change pawh a awm anga, opposition-te pawh chutiang chu a ni anga. Pawl hrang na na na, sorkar lam leh opposition lam a awm na na na chuan zavaia kal khawm dum dum theih kha a ni seng lova, a hrang a hraia thil rel ngaite pawh kha a awm ve bawk a. Chung ang han khawlkawm change pawh chu a awm anga, ala awm zel turah pawh ngai ila. Chutiang te te chu kan vei em em mai a nih chuan a fel lo vang.

Hetiang tur hi a ni lova, chuvangin tuna kan resolution ang nilo hian kan council hi rawn kal chho zawk selangan, bial tin khawtin leh mipuite an tlem leh an tam te an mamawh dan azirte, khatiang ang zawng zawk khan sum hi pek ni se a lawmawm viau zawkin ka ringa. Chuvang chuan he resolution hi han support chi niin ka hre lova ni.

**DEPUTY SPEAKER :** Aw le, tunge la sawi leh dawn le ?  
 Pu. B. Lalthlengiana i lo sawm ang.

**Pu B. LALTHLENGLIANA :** Pu Deputy Speaker, kan member zahawm takin vawiina 13<sup>th</sup> commissionin khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se tih hi ka rawn support a. Hei hi democracy Mizoram a reorelna hmunah chuan kan tih ngei tur niin ka hria a. Nikum hmasa lama an pawisa sem dan kha kan Minister zahawmtak, Pu Thanliana khan a rawn sawi a, kha kha ka lo hre ve chiah lova, kumina an sem dan erawh hi chu hei a rawn lang a. Need base-a sem anilo tih a chiang em em mai a ni. Sem a nih danah hian enge an criteria chiah ka hre lova, lal dan indawtin an inpe mai niin a lang a. Hmannia ka zawk chuan ‘bial zau dan azir te a ni e’ an ti a. Amaherawhchu bial zau dan azira impek tam chu nisela nuai 34 hmu aia bial zau zawk fe fe hmu tam zawk tur chu an ni ngei mai a. Tin, population test pawh ti ta sela, population-ah phei chuan a rualkhai zawk viau maithei a. Chuvang chuan an sem dan criteria hi hriat a har khawp mai a.

Hetia han en thuakah chuan lal dan indawt, rulling leh rulling lo kha a ni deuh berin alanga. Chulai tak chu municipal-ah te chuan state reorelna nen khaikhin rual a nilova, Aizawl khawpui chhung chauh enkawl tur an nih avangin. Kan mamawh dan han en hian tlema Aizawl khawpui daifem deuhte hi chuan an mamawh tam zawk ang tih hi chu a chianga, chuan an sem bawk si lo laiah hianin, keini chuan rualkhai deuh hian sem nisela, a rual khai tak tak kha theih lem lo anih pawhin tlema a daifem deuh, Mizoram sawrkar pawhin tlema kan han hma lohna lai deuhah te hi chuan in pek tam ni thei sela a tha awm mang e aw tih kha kan rilru-a awm dan a ni a. Kan UD&PA Minister zahawmtakin ULB Grant sem hi a inzaha sem kher tur a ni lo tih Local Council Seminar, Chanmary YMA hall-a neih-ah khan alo sawi tawh a, kan Minister-in a sawi zulzui khan kan councillor awm ho khan an sem mai niin a lang zawk a, chuvang chuan need based-a sem nisela chuan kei chuan ka hrethiam thlap a, amaherawh chu need-based-a sem ni silova, chairman-in nuai 34 chuang lai hmua bial rethei leh harsa zawk anga lang nuai 20 leh 21 bawr vela an tla keuh te kha chu a dik lovin a lang a, a democracy lova, tin, a lan dan hrim hrimah pawh khan a mawi lova.

Tin, Pu Duhoma, Member zahawm tak khan hetiang thil han sawi fote hi a unconstitutional a ni a ti a, ka lo ngaihdan chuan House-a Anti-Defection Law hmanni lawka kan passed-te kha a unconstitutional zawk dahi a ni lawm ni, chuvang chuan Aizawl khawpui chei tura Councillor kan thlan tlinte hian rualkhai deuhin bial mamawh dan azirin fund hi sem sela a thain ka hria a. Tin, an thil tih danah hian inbumna a awm emni aw tih theihin a awm a, hemi grant sem chungchangah hian MNF, MPC te ZNP leh Congress councilor-te chu cheng nuai 20 vel theuh action plan siam tura hriattir an ni a, chutiang chuan in thlahrung takin nuai 20 pel lovin ruahmanna an siam a, an han sem taa hetiang nuaih hi an sem dan chu a nita a ni. Mamawh thuah chuan MNF, MPC bialte chuan mamawh teh reng e, Aizawl khawpui daifem deuh deuha dingte an ni deuh fur zawk a. Chutiang anih laia reorelna hleih nei tak maia an kal hi keini ngaih danah chuan kan ram reorelna kal zelah House a ni emaw, Municipality a ni emawah hian awm lo sela, Kristian ram kan nihna angin rual

khai takin, han en pawha anih tak hi mawle, a mawi alawm mawle tih theih tur hian kal sela tih hi kan duh dan a ni a. Tun hnuah chuan heng bial tana pawisa an ruahman dawn chuan rualkhai taka tih nise. Pawisa petu chu sawrkar ruling lam an ni a, chuvang chuan Councillor bial chhungah hetiang lo deuh hian pawisa hi pe ve tawh sela, ruling bial nen inang tlang deuh se bialah pawh a rethei leh a harsa zawk bialte an ni si a tih kha an ngaihtuahnah awm sela, chu chu need base kan tih kha a ni. Amaherawh chu tuna an inseem danah hi chuan need base ni lovin ruling nihna atanga thil tih ni a alan avangin hei hi chu Pu Deputy Speaker, kan House pawh hian a engemaw zawnga sawi lovin rualkhai taka sem ni rawh se tihte chu mizo rilruah chuan thumawi tak a ni a, Bible thu nen pawh a in hmeh em em a, chuvang chuan ngaihtuahnah han kawih pen danglama han sawi chhiat tur vak a awmin ka hre lo. Fate zingah thil kan sema rualkhai deuha kan pe ang hian pek ni se sorkar rorelna tih awm tak a ni. Chuvang chuan Municipal Council lo ding hi atir atangin kan buaipui em em a, tun hun hi kan thleng a. A pian tirh atang hian a sawgnawi zawng hian kan khawih ang tih a hlauhawm khawp mai, chuvang chuan vawiina member zahawmtak, Pu C. Ramhluna'n "13<sup>th</sup> Finance Commission-in khawpui cheina atana pawisa a pek thin Urban Local Body Grant hi Municipal Ward tinah rualkhai taka pek ni rawh se" tih Resolution a rawn putluh hi kan zavaia lungrial taka kan puuh a, kan pass hi he House zahawmtak tih awm takah ka ngai a, chu chu ka rawn support a, ka rawn sawi a ni. Ka lawm e.

**DEPUTY SPEAKER** : Chawhma, chawlh lawk hmain minute 5 kan la nei a, pakhatin inla sawi thei chiah chiah a nih chu. Sawi tur kan la awm em? Aw Pu P.P. Thawla.

**Pu P.P. THAWLA** : Pu Deputy Speaker, member zahawmtak Pu C. Ramhluna, Lawnglai bialtuin Resolution tha tak mai "13<sup>th</sup> Finance Commission-in khawpui cheina atana a pek thin Urban Local Body Grant hi Aizawl Municipal Ward tinah rualkhai taka pek thin ni rawh se" tih resolution hi resolution tha tak niin ka hria a, hei hi kan House zahawm takah hian lungrial taka pass ni thei selang chuan thil tha tak mai a ni ang tih ka ring a, chuvang chuan hei hi lungrial taka pass atan ka thlawp em em a ni tih kha ka han tarlang hmasa duh a ni.

He ram leh hnam Pathianin a zawn chhuah hi Pathianin min hruai chho zel a, tunah hian politics-a dinhmun sang ber dawtah kan thleng ve tawh a. Chutiang angah pawh chuan kum 25 vel dawn lai Peace Accord uapna boruak hnuaih ram mipuite kan leng za a, chumai chu tawk lovin Pathianin kan khawpui bik Aizawl hi chei chhoh a tul tawh a ni tiin roreltute thinlungah Municipal Council neih tulna thute hi alo hriattir zel a, chungte pawh chu sorkar hmasaah khan lungrial takin Municipal Council hi neih ngei turin a lo remti thlap a, he Sorkarna thar a lo pian hian nikum November thla khan Municipal Council hmasaber chu felfai takin inthlanna kan lo nei ta a ni. Kan inthlanna boruak kan sawi let vak lovang a, a tha thawkhat a, mipui pawh Council thar kan nei ta chu kan lawm tlang hlein a hriat a. Hetah hian member, State Party thah party 4-in he election-ah hian kan contest a, chuta kan tlin dante kan ngaihtuah chuan party tin atangin 5 theuh deuhthaw an tling a. Ward 20

phei chu nisela MPC atang pawhin 5 an tlin ka ring that that a ni. Chutiang chuan rual tlang takin Member Councillor party tin hian kan nei tlang a, chuvang chuan, Pathianin he Municipal Council hi kan khawpui cheina atan bul felfai tha takin min tan sakah ka ngai a. Chuvang chuan, kan Council hmasa ber kum 5 chhunga rorel turte pawh hian a bul tantu an nih avang hian thil hi politics lutuka ngaihtuah lova Pathianin he ram leh hnam min din chhan leh min hruaina ang rilru hi zawma hemi rilru hre reng chunga he term hmasa ber rorelna leh rawngbawl hna hi an kalpui hi tul ka ti hle a, tha ka ti a. Anni Council hmasa berte thil an tih that leh that loh, thil bul an tan that leh that loh hian kan ram awm dan tur, kan khawpui awm dan tur, hi thui tak a hril dawn a ni tih hi thufing awmsa a ni.

Chuvangin, Pu Deputy Speaker, vawiina kan Councillor hmasa berte ho hian rilru thiaghlim tak pua State Politics-te, tin, Union Politics-te, Autonomous District Council Politics-te a, politics kan inchuh dan ang lo deuhva he city pakhat bik Aizawl khawpui bik enkawlna rawngbawl hna hi chu rilru thiaghlim danglam bik pu chunga an kal hi kan ram mipui tan khawpui chhunga mi chengte tan malsawmna hnar a ni ngei ang tih ka ring a ni. Kan khawpui mawi leh mawi lohna turte, Tourist tam tak lo thleng turte, Foreigners tam tak lo thleng turte mit hmuha kan awm dan tur lanchhuah tirtu turte an nih avangin vawiinah hian he resolution hi House hian lungreal takin han pass thei ila chuan kan Councillor ho pawh hian zah takin an zawm ngei pawhin ka ring a. Chuvang chuan, he 13<sup>th</sup> Finance Commission atanga sum kan hmuh hmasak ber nuai 457 lai mai kan Aizawl khawpui bik cheina tur atana sum awm hi chu kil tina awmte, veng tina awmte pawhin rualkhai taka a rah kan seng theih nan rualkhaia sem nisela tih resolution, Member zahawm tak Pu C. Ramhluna rawn putluh hi chu dinglam leh veilam rilru pu lem lova kan khawpui cheina tur a ni tih hria a, lungreal taka kan pass dial mai hi a tha hlein ka hria a. Chu chuan kan ram mipui thinlungah thui takin thu a sawi ang a, kan Councillor hmasa ber, term hmasa ber changtute nun leh chet phung pawh nasa takin a control-in a kaihruai ngei ang a, chu chuan kan ram tan malsawmna a siam dawn a ni tih kha ka rilruah a lang lian hle a ni. Chuvang chuan hei hi politics-ah chuan ti ang u, kan tih chuan thil theih loh hulhual a niin ka hre chuang lo, chuvang chuan, Pu Deputy Speaker, House-in kan pass a, Councillor zawng zawngten an zawm anih chuan he crore 5 vel sum hi chu Aizawl khawpui chei nan hian rualkhaiin sem theih thil a ni tih hi hria a, chutiang taka lungreala kan pass hi tha ka ti a. Chuvang chuan, he resolution hi thinlung thiaghlim takin sawitu tur apiangin sawi ila, lungreal takin a tha a ni ti hian pawm ila pass dial ila, tih ka thlawp thu ka'n sawilang ve a ni e. Ka lawm e.

**DEPUTY SPEAKER** : I ti tha hle mai, hun i vawng dik chiah chiah e, dar 1 a ri a, kan chawl ang a, dar 2-ah kan chhunzawm leh dawn nia.

Recess 1:00p.m.

**2:00 PM**

**DEPUTY SPEAKER** : Kan Resolution kan sawi chhunzawm leh ang a. Pu C. Ramhluna Resolution, “13<sup>th</sup> Finance Commission-in khawpui cheina atana pek thin Urban Local Body Grant hi Aizawl Municipal Ward tinah rualkhai takin pek thin ni rawh se” tih kha kan sawiho lai mek kha a ni a. Chawhma lamah khan mi pasarihin kan sawi tawh a. Sawi leh tur kan awm em le ? Tunge ni han sawi chhunzawm leh ang ? Sawi tur in awm tawh loh chuan Dr. R. Lalthangliana i lo sawm ang.

**Dr. R. LALTHANGLIANA** : Pu Speaker, ka lawm e. Kan Member zahawm- tak Pu C. Ramhluna’n Resolution a rawn putluh hi ngun deuha kan thlira kan bih chian a pawimawhin ka hria a. 13<sup>th</sup> Finance Commission tih kha a ni tih kha hriat reng a thain ka hria a. “13<sup>th</sup> Finance Commission-in khawpui cheina atana a pek thin Urban Local Body Grant hi Aizawl Municipal Ward tinah rualkhai takin pek thin ni rawh se” tih Resolution tha tak mai a rawn pulut a, congratulation ka’n pe nghal a ni. Thil awm tak niin ka hria a, tin, a relevant a. Tunhnai lawk, nikum November maiah he kan Aizawl khawpui, Mizorama kan khawpui pawimawhah hetiang inthlanna hi kum nga term atan khan kan han nei a. Kan Councillor-te pawh hi kan zah a thain ka hria a, zah pawh an phuin ka hria a. Pu Deputy Speaker, kum nga chhung atana democratic process dik taka thlan an ni tlat mai a. An zahawmna hi vawn a tha hlein ka hria a. An dinhmunte pawh hi chiang lehzuala mipuite pawhin an hriat chhoh zelna atan nakinah ruahmannate pawh la insiam turah te pawh ngai ila. Thurawnte pawh kan pek a ngai dawnin ka ring a. Hengah hian facilities neuh neuhte leh thildang neuh neuhte pawh keimahni MLA te ang chiah a nih loh pawhin elected body an nihna ang hian hnathawk thei tura kan buatsaih hi tul leh thain ka hria a, ka’n tarlang lawk duh a ni.

Inthlan hma khan sawi neuh neuh chu a tam mai a, thenkhat chuan kan AMC inthlang turte hi Village Council u awrh tihte tawngkam kha a tam khawp mai a. Amaherawhchu, ti hian a’n ni tak tak ta a, an pawimawh zia hi, leh Village Council u awrh chu an lo ni lo hle maia tihte mipuiin kan hre chho zel a, a lawmawm hlein ka hria a ni. AMC-a kan ruling nih dante leh Assembly lama kan ruling nih dante pawh hi a inang chiah lova. AMC lamah chuan kan bul hnai lawka mite pawh kha an sorkar ve tlat mai a, a lawmawm khawp a. Ni chu tlem chuan a chhuak hlek a ni, nia, suk chen velin a chhuak a ti. Amaherawhchu, thim khan tlemin a han khuh deuh dawn emaw ka ti a, engemaw a hlimthla hi chu a lang ve deuh hrim hrimin ka hria a, a lawmawm ka ti a, a pil leh ang tih chu a hlauhawm viau a, duhsakna, hun lo la kal zel tur atan ka’n hlan tho a ni tih kha ka sawi duh a. Chutihlaiin, helai, a hnung lampang deuhah kha chuan AMC lama keini lama han awm te kha kan awm ve bawk a. Chuvangin, vawiina kan thusawi tlema han inpersan lek lek lai kha a insu buai lutuk lo naa, thil danglam tak he House-ah hian a thleng ve hrim hrim a ni tih kha Pu Deputy Speaker, ka’n sawi duh reng reng a ni. Hei hi Democracy ropuina riaute pawh niin ka hria a. Engpawh ni sela, zalen taka kan ngaihdan kan han sawi nawk nawk kha thil lawmawm tak niin ka hria a. Hei, sum hi a inzat chiah chiah, nuai 20 te insem thliah thliah zawng khan kan Resolution hi alo lutlo tih kan hriat a thain ka hria. Tin, he sum hi Fund pakhat lo kal 13<sup>th</sup> Finance Commission atanga chutah pawh chuan award an tia, pawisa ropui tak pawh a ni em em lo maithei. Amaherawchu bul kan tan nan Good beginning, bul tha taka kan tanna atan hei hi hmang ila tiin a puluttu pawh hian ngaihtuahna fel tak neiin a rawn pulut a ni tih hi ka sawi duh a. Chuvang chuan bul kan tannaah hian right direction-ah kal dan dik tak maia kan kal hi Pu

Deputy Speaker, a tulin ka hria a, chumi avang chuan he Resolution hi kan pass pawh a thain ka hria a.

Tin, thenkhatin India ram State-ah Andra Pradesh-te, Uttar Pradesh MP 80 chuang chuang neite nen leh Mizoramte leh Meghalaya-te sum zawng zawng insemina nen khan khaikhin chi a ni lova, hei chu 13<sup>th</sup> Finance Commission Award mai ania, a sum hi a inzat chiah chiaha insemin tih lampang kha resolution hian a kawk lova. Mizopa tena kan pi leh pu hun lai pawha sem sem dam dam ei bil thi thi an tih ang patern ka hriat chhuah chu Pu Deputy Speaker, hmani ni 30 khan Vanapa Hall-ah khan Remna ni Silver Jubilee Celebration kha MKHC ten an huaihawt a, chuta Pastor pakhatin thu a sawi kha ka hre reng a, ka rilruah chumiin a sawi chu, Salamis Society Mizoramah hian kan neih a ngai a ni a ti. Chumi awmzia chu intluktlanna, a neiin a nei bik tia mi dang zuk suppress-na ni lo, inang khat tlanga kan chen dial dialna hi a pathian thu a ni tih ang zawngin a rawn sawi a ni. Kha a thu sawi khan ka rilru a hneh hle mai a, chutiang zawng chuan vawiinah hian need base ni thosi, rual khai deuhin, entirnan, hetah tuna a landana an han inpek danah hi chuan a Chairman-in nuai 34 bawr vel anih lai khan hetah tlin dan inang tho Councillor chuan nuai 20 bawr vel em em kha chu a inthlauhna percent, a gab kha a thui ve lutuk deuh a, engpawh nisela, a inang chu a ni thlap theilo ang, mahse rualkhai taka thil tihdan need base ni bawk si kha vawiinah hian Resolution puluttuin a tum a ni tih kha kan hriat a thain ka hria a. Chuvang chuan kan han sawi hnuah hi chuan i dinglama mite pawh hian awm an ti leh thar riauin ka hria a, chawlh chhung pawh khan. Tin, hemi chungchangah hian chawlh chhung lawkte pawh khan Message ka dawng ka dawng mai a mobile-ah, mak deuh mai chu Pu Deputy Speaker, hei Aizawl khawpuiah Ruling lampang kan ti mai ang a, ngaihloh lamah lo ngai lo ula, kha lama Councillor thenkhat khanin message kha kan hotu thenkhat hnenah khan an lo thawn nasa mai a, a lawmawm angreng khawp mai a, e, vawiin resolution chu tha kan ti khawp mai an ti ve ania. Chuvang chuan helam i dinglam ami hian an naute AMC lama mawhphurhna latute rilru hi an hria em ni chu aw tih turin thilte pawh hi a awm ang a, tih kha ka hlau deuh a, chu chu ka'n sawi leh duh a ni.

A dang lehah chuan Pu Deputy Speaker, thil hi bul kan tannaa kan tih fuh chuan tha deuhin he elected body hi a kal thei ang tih ka ring a, bul kan tan that loh a, engemawti zawnga thalo deuha kan tan chuan precedence chhia kan siam chuan nakin zelah entirnan kan District Headquarter dangah hetiang ang chi hi kan la inthlana kan la dinte pawh hi a tulin ka ring a, chung a lo thlen hunah chuan Aizawl tih hi kan khawpui ber, kan hmun pawimawha kan tihdan hi min entawn fo tur anihna chin a awm dawn a, chuvang chuan kan bul tanna chin a awm dawn a, chuvang chuan kan bul tanna-ah hian fimkhur takin 'Justice' awmin, Democracy ram kan nihna anga inrualkhai leh rual tlang taka thil kan tih hi a tha awm mang e tih kha ka sawi duh a.

Tin, MLA biala tangka insemin, kan bialah pawh a inanglo tih hi chu thil dik lutuk a ni, kha lampang nena tangka helaia kan sawi hi a inanglo tihte pawh kha kan hriat a tha a. Amaherawhchu, a tum ber chu equitable inang khat tlanga development sum tlem kan han dawnte hian bul han tan ila, a tak tak lamah te chuan Councillor-te khan kha tangka kha anmahni pocket-a lut tur a nilo, anmahni Ward chhunga an hman tur, development an kalpui tur a ni tih kha kan hriatsa a ni a. Chuvang chuan, khati zawnga ngaihtuahna nen khan kan

Resolution hi kan ngaihtuah hi kan tihtur pawimawh tak niin ka hria a, chu chu vawiinah hian kan pass ngeite pawh hi a thain ka hria a.

He House-ah hian kum engemaw zat kan lo awm ve tawh a, thil thaah hi chuan Pu Deputy Speaker, ruling kan nih avang hian opposition lampanga thuten Resolution an putluh hi kan hnawl ngailo khawp mai. Chuvang chuan, thil tha duh tak tak annih ka ring vek a, a mal mal phei chuan inzawt ila chuan tha an tih vek ka ring. Amaherawhchu, a huhova thil han sawi hian kaldan phung hi politics-ah chuan a awm a, chumi avang mai mai chuan mi hi an han chhaih kual vel chauhah ka ngai a. A tak tak ramah erawh chuan vawiinah hian a tha a ni tih hi an pawm ve hian ka ring tlat a, tin, pass loh hi an duh pawh ka ring phal lo a ni. Chuvang chuan vawiinah hian he Resolution hi tlang ngei sela tih kha ka duh a.

Tin, kan inrawlh lutuk a, an thuneihna chhuhsak tih ang zawng khan ti reng reng lo ila. He House-a kan pass avang hian an thuneihna kan va chhuh ang zawng kha a kawk lo hrim hrim tih kha sawi duh a. A chhan chu, tih tak emah chuan kar hmasa lawkah eng bill nge kan putluh kan tih chuan Anti-Defection Bill kan tih ang tluk kha vawiinah hian Municipal chungchangah pawh khan kan han passed kha a ni a. Chuvang chuan, kan tihtur ve chin lai helaiah rorelna sang ber amite hian kan nei ve a ni tih kan hriat avangin kan MLA zahawmtak hian vawiinah hian hei hi a pulut mai a ni tih hi kan hriat a thain ka hria a. Chuvang chuan, MLA zahawmtak Pu C. Ramhluna putluh 13<sup>th</sup> Finance Commission chauh a la ni nghe nghe a, mahse hetu bul kan tan that chuan, thildang scheme dang lo kal ang chiah pawh hian mumal takin rorelna feltak mitinin he Aizawl khawpui bik angte pawha kan chanvo kan dawn tur ang rualkhai taka kan hmuhna ang chi hi hei hian a hring chhuak ang tih ka beisei a, chuvang chuan a pawimawh hlein ka hria a, pass ngei turin vawiinah hian abikin i dinglama mite pawh hi ka beisei in ka'n sawm a ni e, ka lawm e.

**DEPUTY SPEAKER :** Pu K.S. Thanga kan ko ang a, chumi dawtah Pu T.T.Zothansanga, chumi dawtah Pu R. Selthuama, chumi dawtah Pu Lalsawta, tiang chuan i ti phawt ang.

**Pu K.S. THANGA :** Pu Deputy Speaker, ka lawm e. Kan Resolution “13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se” a ti a. Vawiinah hian hei hi engeni a rawn putluh chhan ni ang aw tih ka ngaihtuah a, tunah hian hetiang aia rualkhaia kalpui dan hi a awm tawh chuang pawhin ka hre lova. Chuvang chuan eng ngaihtuahnain nge heng hi a rawn putluh ang aw tih ka ngaihtuah a, keini ang tan chuan a thu hrim hrim pawh hian min tibuai zawk a ni. Pu Deputy Speaker, i veilama thu pawl then khat (group) tun tum atan chuan a then kan lama mi an ni tlat mai a, an thu tawngkam mawilo ni lo sela, an thu leh Ui benga hlin tur a awm lo ti ang deuh mai hian, tuna Local Council kan inthlan dawn hian kei hi Mizoram pawnah reitak ka awm a, ka lo hawng a, Aizawla thu inchuh ropui ber chu- he Local Council, he MNF leh MPC tang dunin a zavai hian thuneihna pumhlum nei tur a ni a, sorkar hian engmah inrawlh theihna a nei lova, sum pawh direct-in a lokal a nga, chutiang khatiang chu a ni ang tih kha an lo sawi a. Congress leh ZNP khan chutiang a ni ngawt love, sorkarte pawh hian a la

enpui ve a ngai anga, sorkar kaihruaina nena tih tur a ni ang tih kha a ni thung a. Vawiinah hian khamia an au hla kha, an rulling zo ta lova, MNF leh MPC te kha mipuiin an ring lo zawk a niang, keini lampang kha kan thusawi kan campaign au hla kha min ring zawk a niang hei kan lo tling ta a. Mahse, kan lo tling ta a, Municipal-ah pawh chuan Majority kan lo la a, Executive Body-te pawh kan lo form ta a. Vawiinah hian chu an duh, an aupui vak vak kha an duh aia power kan pek tlai, kan pek chak hma deuh kha chuan, an au an au a, helai Session-ah te pawh khan an sawi kha a ni a. Tunah kan han pe dawn tan a, ka pu pe leh suh u, hetiang hi chuan a tha lo tih vel ang kha a thu hi a rawn ni leh ta hi mak ka ti em em mai a. Hei vang hi emawni le, anni ho hi tun inthlan MLA general election-ah pawh mipui khan kum sawm chhunga an thu leh hla kha an thlir let thin a, rin tur leh man fak tur kha an hmuh loh vang emawni le? Heti em em maia an tlak nasat, Mizoram inthlana an tlak nasat tih hi ka ngaihtuah rum rum a ni. Thil kal tawh kum hnih leh a chanve liam tawh mah nisela, ka zuk ngaihtuah chhuak leh lo thei lova. Tin, vawiina a la inham tang hram hramte pawh hi khang ang boruak khan an thinlung hi a la hnuk hnawk hle nite hian Pu Deputy Speaker, ka hria a. Chuvang chuan kan thu inchuh kha tlem tlemin an au hla leh an sawi kha kan han tihsak dawn a, tunah hian anmahni ngei hian ti leh su an ti ni deuh ber te hian a lang a. Anmahni Councilor-te tan ngei ngei pawh hian a ngeiawm duh awm mang e, helai rorel khawlah te hian han thu ve ta sela, an pu te hi kan hmuh loh lam hnung lamah te hian an inbauh viau mai awm mang e, an chet dante hi an au hla nen a inmil lote an ti mai awm mange tihte ka ngaihtuah a. Chu chu vawiinah hian ka rilruah a awm a ni, Pu Deputy Speaker.

Tin, tun LADC ah nichinah Minister zahawm tak changtu khan a sawi tawh a, thu inchuh pakhat kan nei a, keini chuan Congress sorkar District Council-a min pek chuan equal share hi kan ti loveng. Development hnathawh a ngai emaw, ngailo emaw, pawisa hman hnem a ngai emaw, ngailo emaw, MDC ten inzat theuh maia development fund an hman hi he bial hian in tuar a, hmasawnna in tichhia a ni tiin kan au va. Lehlamin an thu ngai party dangin an dinpui a, mahse mipuiin kan au hla an pawm zawk a. Chuvangin Congress Lai District Council-ah min sorkar tir a, tichuan equal share kan tibo a ni. Kan Member zahawmtak vawiina rawn puluttu hi he District atanga lo chhuak a ni a, kha ramhlui zia, equal share thlarauah khan ala cheng deuh em ni, hmasawnna, sawlai mipuiin an duh tawh loh, an hnawl kha Aizawl khawpuiah hian rawn lakluh a tum em ni? tih hi ka ngaihtuah deuh a. Pu Deputy Speaker, helai hi kan ram siamthat kan tumna dan nen hian chhim leh hmar angin a inhlut tawh a. Chuvang chuan, helai hi he House-ah hian a buaipui tlak loh hle niin ka hria tih ka'n sawi duh a ni.

Tin, kan Member zahawmtak Pu Lalthansanga (Chatea) kan ti mai a, tuna a'n sawiah pawh khan chiang reng chu sawlai Dawrpui, Chhinga Veng, Saron tih velah saw chuan Zarkawtah te, nuai 800 chuang kan hmuh lain West lamah chuan nuai 600 vel emaw an hmu a a'n tiyah pawh khan a cheina mamawh lai a ang a, a tul anga State sorkar pawhin pawisa nuai 100 telin a dah inthlau a ni tih kha a rawn sawi chiang em em mai a. Amaherawhchu ka ngaihtuah chu MLA anih mek lai hian Zarkawt a kherh danah hian Local Council-a let a tum nge ni tihte ka ngaihtuah a, Pu Rosiamngheta a awm lova, he House-ah hian, a bial a ni a, Councillor vel saw va chuh buai a tum em ni ? engatinge bialah a ding ngam dawn tawh lo em ni ? tihte ka ngaihtuah deuh

rum rum a ni vawiin chu. A thu han sawi hi, a politics hi rampum thu emaw kan sawi dawn ka ti a, Zarkawtah kan lut leh a, Local Council lam hi alo tum ve ta mai nge ni a, Municipal Council zawk hi tihte ka ngaihtuah deuh a. Pu Speaker, mahse min kalsan bik lovang chu tiin ka'n sawm anih chu.

Pu Deputy Speaker, tuna programme vawiina kal hi nichinah khan kan ngaithla a, kan Member zahawmtakte khan kumin ami chauh an sawi lui tlat a, kumin ami an hmu theih chuan nikum ami an hmu thei reng an duh chuan. Nikumah a lang reng a, nichinah Minister zahawmtakte pawhin an rawn sawi tawh a, Member dangte pawhin, nikumah heng chang tam ho hian an lo chang tlem a ni, kuminah hian nikuma chang tlem hoin an chang tam a ni leh mai. Chu chu vawiina House-a han putluh vel a han tih kha a puitling lo em em mai a. Ram rorel khawla roreltute rel atan chuan a theuneu lutuk deuh a ni lo maw ka ti a ni, Pu Deputy Speaker.

A tawp lamah chuan point hnih khat lek ka'n sawi duh chu keini bial angte saw Council-ah hian, Municipal-ah hian khaw pathum kan nei ve a, Hlimen, Melthum, Saikhamakawn an ni. Aizawl khawpui an lo ni ve reng thin a, mahse Pu Chatea te ho Zarkawtin tui, shower nen, bathroom-a duhtawka septic tank nen duhtawka engkim mai an tih theih lai khan keini chu pit-latrine nen, mawng ek silna tur pawh awm tha lo khawpa khawpui ni ve si. Tunah kan sorkar thar chak takin, Pu Hiato, kan Minister chak takin hmanni lawka tui connection-in a hmunah te min va enpui a, alo awm reng reng lo mai leh tui pawh hi a lo la luang phei ve reng reng lo a ni. Khatiang angte kha tunah chuan haw tirin house connection pawh min siam sak dawn a ni tih min hrilh tawh a ni. Chunghoten development an ngaihzia te han ngaihtuah chuan vawiinah hian need-base an tih hi a dik em em a ni. Kan ram rorel khawlah hian, hei, vawiinah pawh kan sorkar kal ang tho a ni a, councilor zawng zawnge hnena hei hi lo chang ve ru va tihte kha kan Executive member-te, kan Chief Executive member-te pawh kha an tih loh tur thleng thlenga an tihnaah hian buainaah an inhruk hnawk mai mai niin ka hria a. Heng kan opposition-te hian keimahni ruling-te opposition MLA te hi budget leh plan an siamah hian an rawn lo, an duh ang khan an kal a, he House-ah hian kan lo rek mai a, hei, tunah pawh hian kan ti mek a ni. Chuvangin Pu Deputy Speaker, tunah hian ramin a mamawh angin an sem mai a ni. Hetiang ang laia ngaihtuahna hrang hrang, mak deuh deuh neih a thusawi thlak vel hi chu he rorel khawlah hi chuan buaipui buaipui lo teh ang tiin ka'n ngen a, he resolution hi in withdraw hram sela he House tihzahawm nan hian ka ngen a ni e, ka lawm e, Pu Deputy Speaker.

**Pu T.T. ZOTHANSANGA :** Pu Deputy Speaker, ka lawm e. Vawiina kan resolution hi a lungchhiatthlak ka ti khawp mai, Assembly tin leh India ram pumpui ang pawhin decentralisation of power hi kan buaipui lai mekin, tunah hian kum 1970 chho vel stage-ah letin, mi power chhuh kan han tum mek chu a ni a, pawi ka ti khawp mai. Hei, Dr Thangtea, kan opposition hotupa khan bih chian a pawimawh a ni, a ti a, kan bih chiang chhin a. Danin engtingnge a sawi tel tih lai tak hi tlem han chhiar ka duh a. Hei Article 234-na W ah khan- “to function as institution of self government and such law may contain provision for the devaluation of powers and responsibilities upon the municipalities,” a ti a ni. Anmahniin an kut ke a ro an lo inrel ve theihna turin, mumal fel taka an awm ve theihna turin India ramin ruahmannna a

lo siam lai karah, vawiinah Municipal thuneihna chhuh tuma resolution a rawn lut ta mai hi pawi ka ti khawp mai.

Resolution hi fimkhur ngai ka ti, pute nawrma avanga mahni chhia leh tha hriatna bo thak tawh ni awm tak a, mawi leh mawi lo pawh thliar lova an rawn pu lut hi chu ka khawngaih khawp mai, “love of a party right or wrong” tih kha a angin ka hria. Hei hi thil fuh lo tak a ni. Tunah hian kan M.P. zahawmtak Pu C.L.Ruala hian Parliament-ah khuan, Mizorama constituency 40-ah khian plan vaibelchhe 1700 khi a rual theuhin insem rawh se, tiin Parliament-ah pulut ta sela, chu nen chuan danglamna a awm miah lo a ni. Tin, India ram state-te hian India ram plan hi state tinin inang vekin insem ang u tih ang chiah a ni, a danglam reng reng lo, miin an lo khawih tur chin a awm vek a, chu chu India ram dan hian a rawn ruahman sa vek a. A tak takah chuan a rawn puluttute party hi kan sorkar veleh Chakma District Council kan thiat ang, tia Union List leh State List leh Concurrence List pawh hre hrang lo atanga lo chhuakte kha an ni ve bawk a ni, chuvangin ngaihtuah tha ka ti a. Nichina a move-tu khan a rawn move khan, hei ka lo ziak a, “an tih tur nia an hriat ve si, sum an khawih lo kha na an ti a”, a rawn ti a, a dik chiah a ni. An sum khawih loh kha na an ti ang tih hre reng siin, vawiinah House hian an pemah chingal i leih leh ang u, a zuk ti a ni, a dik lo reng reng. Chuvangin tuna a initial stage-ah hian kan tan a ngai khawp mai a, kan tihsual palh vah chuan Zoramah Municipal Council hian mipui beisei a pha ngai tawh lovang. Chu chu a pawi khawpin ka hria a.

Tunah hian kan hruitute a mi mal mal ten ka'n en a. An bio data te pawh eng eng emaw chin ka'n en a, an rintlakin ka hria a. Tin, heta ro an lo rel tawhnaah pawh hian, a copy kha kan hmu a. An mawhphurhna kha an hlen tha ka ti. Chuvangin an rinawm a, anmahni ringhlel ni awm takin leh anmahnih corruption zung zam tam tak a awm ni awm taka khatianga rawn putluh kha tha ka ti lova. Chuvangin he remna leh muanna kan neihna khawvelah hian chi tha lo hi kan tuh leh mek em? tih kha ka ngaihtuah a ni. Tin, tunlaiin mi kan fing tawh a, engtinnge dan buin a sawi tih hi an en hmasa ber zel a. Dan bu en lek lo khan an rawn khuainuai leh tawp mai thin kha a ni a, kha kha a tunlai lo a ni, kan rilruah kha kha lo awm bawk sela. Kan Opposition hotute khanin Village Council u awrh chauh tihte kha an rawn sawi a. A dik chiah chuan a nihna takah chuan anmahni hian Village Council pawh tluk lovah rawn hnuh hniam an tum a ni. Village Council sum pawh hi kan khawih duh tawh lo, tunah, kan khawih ngam tawh lo, a aia sang Municipal phei chu khawih chi hi a ni tawh lo reng reng. Khang te kha lo ngaihtuah chiang sela thain ka hria a. Right direction-ah kan kal a tul e, an ti a. MNF hun laia Silpauline pakhat pawh Opposition-in kan neih ve theih loh laiin kha rilru kha tunah he House chhungah hian an rawn pulut ta mai em ni? tih hi ka ngaihtuah a ni.

Tin, politics-ah chuan ‘ti ang u’ kan tih hi tih theih lohna chhan tur engmah a awm lo tiin kan member zahawmtak Pu Thawla khan a rawn sawi a. Keimahni kan tam avang leh ban phar tam vang ringawta dik lo pawh tidik thei tur chu kan ni lem lo a ni. Tin, Resolution tha na na na chu kan pawm tlang tur a ni, an rawn ti a. Kan member zahawmtak, Pu K. Liantlinga te, Pu Lalduhoma te pawhin heliah Opposition ni chung chunga an rawn putluh te pawh kan lo passed-pui ve tawh a ni, kha kha a tha a ni a. Vawiinah hian hemi hi kan ti a nih chuan an Budget a lo kal leh zel ang a, khatah khan inrawlh leh zelna kut kua kan va siam dawn tihna a ni. Chuvangin precedent tha lo tak vawiinah hian kan siam ang tih ka hlau khawp mai a. Tuipui East bialtu zahawmtak khan, ‘a thu hi mawi pawh a mawi a ni’, a'n ti a. A

mawiah hian kal ral hi thil hlauhawm tak a ni. A dik tak chuan zaninah hian i tawngtai tlaivar ang u hmiang ti ila, a thu hi chu a mawi a ni, mahse, a practical lo ve a ni. Khatiang deuh kha a ni a, vawiinah hian kan ngaihtuahna thuk zawk, kan inner voice i ti ang, khatiang khan ngaihtuah ila. Kan thil rel tak tak hi zoram mipuiah hian han kal tak tak dawn sela, nakinah lo la lal leh zel tur, kha deuh taka rorelte pawh lo la chhuak chho dawn ta ang ni sela, kan suasam chhe vek ang tih hi a hlauhawm ve a. Chuvang chuan tuna an kal dan hi a tawk e, ka ti a. Tin, state-in thuneihna a nei dawn chuang lo. Municipal kha chu a hrang a ni ti a kan han tan kan han tanna lai karah khan vawiinah chuan state kutkawih chu kan duh leh hle lawi si te pawh hi ka hrethiam lova, chu chu, Pu Dy. Speaker, ka'n sawi theih ni sela. Vawiina kan Resolution hi a nihna ang ang hian kan hotute khan, a puluttute khan hnuk kir leh thei sela ka duh khawp mai a, ka'n ngen zawk a ni. Ka lawm e.

**Pu R. SELTHUAMA** : Pu Deputy Speaker, ka lawm e. Hei, member zahawmtak, Pu Ramhluna Resolution, ““13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se”, tih a rawn pulut hi han en mai chuan mam pur hian a lang a. Amaherawhchu, zuk bihchian tak tak chuan sugar-coated a ni a. Damdawi kha, a ei a hrehawm avanga a pawn an tihthlum a ang riauvin ka hria. Ngun taka zuk en chet chet hian chutiang ang chu a hawi a ni. A.M.C.-in ward tin chan tur sum an ruahmanah khan Chairman bialah chuan a tam zawk a, nuai sawmthum leh pali lai a awm bik a, a thenah nuai sawmhnih chauh te, an rawn ti a, kumin bik chauh kha an en a. Amaherawhchu, an pawisa sem danah hian 13<sup>th</sup> Finance Commission-in pawisa a rawn pek hi nikum atang khan an sem a ni tih kha a hrechiang hlei hleitu an ni a. Tichuan nikum atanga an sem dan hi ka han en hian Ward No.10-ah hi chuan nuai sawmsarih leh pakhat nikum leh kumin a mi hi a ni a. No. 7-ah hian nuai sawmruk leh pahnih, No. 3-ah nuai sawmruk panga, No.1-ah hian nuai sawmnga leh pariat, tin, No. 12-ah hian nuai sawmruk pali a ni a; No. 14-ah nuai sawmnga pariat, tichuan Chairman bial ber Ward No. 15-ah chuan nuai sawmnga panga chauh a ni. Tichuan Chairman biala a tam an tih kha kumhnih chhungan bial sarihah a tam zawk a ni. Chuti anih chuan ‘Chairman bialah a tam zawk e’, an tih kha thil zahthlak tak a niin ka hria, a ti tute hian an hre tho si a. Heng a copy zawng zawng hi an nei vek a, kumina pawisa sem ban an neih theih chuan nikum ami pawh an nei ngei ngei dawn a. Khatiang ang hre duh lova kumin a mi chiah hetiang anga an rawn ti hi a fel lova, mimal te leh tute emaw a hruaitu hote tihmualpho tumna mai mai niin ka hria a. Tunah hian Pu Deputy Speaker, India Parliament hian Parliament-ah khuan rorel ta sela, ‘Mizoram state-ah chuan Plan-ah ₹ 1700 crore kan pe a tikhian khi khi MLA bial tinah khian rualkhai takin hmang rawh se’, rawn ti ta sela kan lawm ang em ? chutiang chiah chu a ni. Chuvang chuan kan duh loh tur leh anmahni pawh hian an duh loh ngei ngei tur hi vawiinah hian an rawn rawt niin ka hria a. Chuvang chuan a rawn puluttu kan Member zahawmtak hian a Resolution hi withdraw leh mai se a van tha awm em ka'n ti a ni.

Tichuan, Aizawl khawpui hi kan hre vek a, keipawh kum 1954 atangin Aizawlah ka awm ve tawh a, ka awm hnua piang hi tam tak an awm ve a ni. Chuan Aizawl khawpui chhung kan han en kan han en hian kan mamawh hi a inang lo tih hi a chiang a ni. Entirnan, ka bial saw a bik takin

Chairman bial saw ka bial a ni ve a, chuvang chuan hemi MLA bialah hian a hrechiang bertu pakhat chu ka ni ve dawn a. Kan bialte sawn mamawh kan ngah NASA mai dawn a, a bik takin kan Chairman bial sawn mamawh an nei NASA a ni. Sorkar hmasaah kha chuan bial No. 14-ah kha chuan kawng an rawn siam a, an rawn metal a, tichuan step a chhuk thla a, chu step chhuk thla lehlampang zawng saw bial No. 14-na sawn a huam a, chu step-ah chuan metal road a tawp chat mai a. Chumi piah lamah kha chuan kawng satliah mai mai kha a awm a ni. Chutiang ang atanga kan han en chuan bial No. 14-naa an rawn tih kha bial No. 15-na kan han en chuan a mamawh em em a ni tih kha a chiang sa a.

Tin, nichinah khan kan member zahawmtak Pu Chatea khan zarkawtte kha an sawi a. A dik tak chuan Zarkawt lamah sawn thawh tur chu a awm lo miah lovang, mahse Zarkawta an mamawh leh keini bial anga an mamawh chu a inang miah lo a ni. Sawta duhthala an neih theih ang kha kan bial angte chuan, 'hetiang ang hi nei ve ta ila chuan ava han lawmawm dawn em', tia an suangtuah phak bak kha Zarkawtah te chuan an nei tawh. Chutiangte chu kan nih avangin bial tinah inang reng han semte chu a tih chi lo reng reng a ni. Tichuan helaiah pawh kan thukhawma, MLA te hian Kawrchung a intiat vek ha ang u ti ngawt mai ila a remchang vak lo a ni. I veilam amite khan Municipal Inthlan dawn khan Municipal Council chu engkim ti thei, State sorkar pun ngai lo, direct funding an ti a. Keini lam sawi vete chu Village Council u awrh ang chauhin in sawi a ni an ti a. Mahse keinin a ni love engkim fund te, loan te pawh state through chauhvin alo kal dawn a ni tiin kan sawi a. Tunah engtinne an han tih leh tak si? Municipal Council thuneihna a nih si chuan ngatinge vawiinah rualkhai takin sem rawh se tih hi pass kan tum? A dik tak chuan ka tawng in huat thu suhah, Municipal-a kan thlante helaia keini MLA tam takin kan tluk lohte an ni. Thiamna lamah pawh finna lamah pawh, kan tluk loh an tam em em a ni. Chutiang angte chuan anmahn chhung, Aizawl khawpui chhung ami mutmawh hnarmawh an neih chu anmahn khan ngaihtuah ve mai, keini pawh kan ngaihtuah tur ngaihtuah ve mai ila. Biak Ina kan hla sak thinah pawh, 'nangmah mahni hmunah, kei ka hmunah', kan ti a ni. Kan tih tur ang chin kha ti mai ila, chuvang chuan Municipal Council-a Councillor fel tak tak an awm a, chungte ngaihtuah atan chuan dah mai ila helai atang hian thuneih bik kan tum kher? Aizawl khua chu kan hre theuhva tunah pawh hian Local Council-te kha an in tam hleih a ni, ward 14-ah chuan Local Council 3, mahse 15-naah hi chuan 5 lai an awm ve thung a ni. Local Council-te an awmdan a zir khan veng tin hian mamawh an nei theuh a ni, a veng a tam deuh phei chuan an mamawh pawh a tam deuh dawn a ni. Kan MLA fund-te pawh hi kan bialah kan sem rual a. Bial chhunga khaw ngah deuhte chuan an sem tlem deuhin kumin ami hi kan pe thei lo ang che u, nakumah hei hi chu in chang dawn nia pawh an ti thei ang a. Keini bialah chuan Village Council 8 a awm a, chu chu kan han chawk rual a, 25 vel kha chu nuai 3 vel angte in a chawh rual theih a ni. Amaherawh chu, Member zahawmtak Pu K.S.a bialah hi chuan Village Council 26 vel an awm a, khangang tan kha chuan nuai 1 theuh pawh kha an inchan lo a ni. Chuvang chuan a rualkhai ang khan a tih theih ta lova, an mamawh dan, Village Council an tam dan emaw khan helaia mamawh dan hi chu siam a ngai dawn. Chuvang chuan engah nge sawlaia kan hotute mifel tak, kan duh thlan, Aizawl khawpui mifing tak tak, M.A mai bakah, Doctorate degree la te pawhin an thlan an awm khawm a. Chunghoin an aiawha an thlan tawhte hian an

bialchhung mamawh, Aizawl khawpui chhunga mamawh tur ang chite hi chu an hre ve thiam phak ang tih hi ring ila a tha. Engati nge tuna i veilama thute hian chutiang ang ring lova an thiltih ang apiang hi thalo ni a an hmuh deuh tlat ka ti a. Hei kum 1-na leh kum 2-na han en hian a rualkhai lutuk lo mai thei a, a kum ang atanga a lan danah chuan. Amaherawh chu, kum 3-na te han ti leh ta se tun aia rualkhai zawk pawh hian an la siamrem ang tih hi a rinawm tlat a. Chuvang chuan Pu Deputy Speaker, tuna AMC a kan Councillors neihte hi an tha tawk a, anmahnhi hi hemi Aizawl khawpui enkawltu tura thlanchhuah an ni bawk a. Chuvang chuan he 13<sup>th</sup> Finance Commission in Aizawl khawpui chei nana sum an rawn pek pawh hi an kutah a dah ngam awm a, i dah ang u. Helai atanga lo rel bawl ve a, rualkhaiin chang rawh se tih ang chi hi chu a tih chi lo a ni. Chuvang chuan a tawp bera ka'n sawiduh chu kan resolution neitu khan khawngaih takin a resolution hi withdraw leh mai se tiin ka ngen e. Ka lawm e.

**Pu LALSAWTA, MINISTER** : Pu Deputy Speaker, vawiina kan thusawi tur hi a pawimawh em mai a, ka'n chuhhelh deuh a ni. A chhan chu Mizoram pumpui mipuite hian he ram rorel turin mi 40 min thlang a. Chungte chu Dan siam tur (Legislators) kan ni a. Vawiina kan resolution ang hian pass ta mai ila, kan inti te khawp ang, kan tih loh tawp tur ti kan ni ang a. Tin, tuna Municipal Council hi kan ti te vek bawk ang a, i inti te tlang ang u tih resolution ang hialah ka ngai a. A chhan chu engati nge kan tih chuan, he pawisa hi khawi atang lokal nge tihte emaw, bialin engzat hi nge an chan tih hi a pawimawh berin ka hre lova. A pawimawh zawk lai chu thuneihna va chhuhsak tumna lai, inseem dan hi heti hian sem rawh u, enganga tha pawh ni rawh se, heti hian sem rawh u, va tih hrim hrim lai, thuneihna va chhuhsak tum lai hi a serious-in ka hria. Tin, India ramah kan awm a, khawvel hrim hrim hian Pharoa hun atangin Nero hunah te, Mizoramah pawh Lalburha hunah te, Lal lalna a kiam tawh. Vawiinah hian Lal an awm tawhlo Mizoram-ah, an tih ang ang ringawtin mipui a kal theih tawh loh. Democracy, mipui aiawh ro kan rel lai hian keini kal khawm hian ro kan rel ringawt dawn em ni ? Pu Deputy Speaker, ni suh e. Dan hmanga ro kan rel hi democracy parchhuahna a ni, Dan hi a pawimawhna a ni. Chuvangchuan, engvangin nge vawiinah hian keini ruling lampang hian kan han hnial tak mai, an han sawi kha chuan thu tha awm tak, thlum awm tak ni si a tih kha. A chhan chu pakhatnaah chuan he Constitution, he dan bu, hei hian ram rorelna zawng zawng hi a sawifel vek avangin he Dan bu hi kan en a ngai a ni.

Tin, a pahnihnaah chuan Mizoram-a tuna Ruling hian kan Leader Pu Lal Thanhawla min kaihruainaah hian a dikloah pawh i tangkhawm tlat ang u aw tih emaw, Opposition thiltih anih chuan hnial hrim hrim tur a ni tih hi min hruai dan a nilo, hei hi kan kal tawhna chinah pawh hian a lang vek a ni. Thil tha nia kan hriat chuan khawi atang pawhin lo zichhuak se, kan pui mai a ni. Private Resolution lo kal tawhte pawh kan lo pass-pui tawh dan leh a phur ber ber kan nih dan atang khan a chiang vek a ni, Pu Deputy Speaker.

Chuvangin, rorelnaah chuan India ram sovereign a ni a. Chu sovereign ram chuan a rorel danah thuneihna inchhawng diatin Central Sorkar Parliament a awm a, chumi hnuaiah chuan State kan awm a ni. Maharashtra a ni emaw, Rajasthan a ni emaw, Mizoram kan ni emaw, Sikim kan ni emaw, mihring kan tlem emaw kan tam emaw kan intluk vek a ni, State ho zawng zawng hi, kan thuneihna hi sang tak a ni. Chuvangin, vawiina kan Resolution anga kan chuh loh loh va chuh a, inti te

vek tur hian kei chu he kan Resolution hi pass chi ziazangah ka ngai lova. Engatinge kan intih tet vek theih ang ka tihna chhan chu, State hnuaih chuan local bodies a awm a. Mizoram-ah hian local bodies kan neih chu District Council-te, Municipal-te, Village Council-te, Local Council-te an la awm leh a ni. Chumi inchhawng diatah chuan chhungkuain ro kan inrel ang chiah hian pa berin chhungkaw ei tur thawkin nilengin hna a va thawk a, nu berin inchhung sekrete khawihin rawngte a lo bawl a ni. Pa berin a tih tur aia tam “Chi kha i thlak tam lutuk ang e aw, i Antam chan dan hi a diklo” tih vel mai mai a buaipui reng hi chuan kha chhungkua kha engti kawng mahin an thang lovang. Keini hi Mizoram-ah chuan State Legislature kan ni a, Legislator kan nih avang hian kan ngaihtuah hi a hraw tur a ni. Keini aia la hraw an awm, Parliament-a M.P. te. Anni hi chuan Pakistan leh India chungchangte, America leh India chungchang te, China-in Brahmaputra hnar khu a khuah mai chuan le, Bramaputra Valley zawng zawnga, Assam-a kan buh leh kan thlai thar zawng zawng hi a chhe dawn si a tihte an ngaihtuah a ni, hraw tak tak a ni. Chuvang chuan vawiinah hian thuneihna Constitution-in a pek ang hi an ti ve tlak a ni, keini ai aiin an thiam pawh a lo ni reng maithei a sin, kan Councillor 19 te hi tih tak emah chuan. Chuvang chuan Aizawl mipuiin an rin, Councillor ni tlaka an hriat an thlante hian he Constitution-in Dan a pek ang chiah hian rorel se, hei hi AMC inthlan lai pawha kan thu inchuh kha a ni. Direct funding an tih ang em erawh chi chu a ni lova, kan hnuaih awm an ni, State sorkar hnuaih awm an ni. Mahse Pa berin Nu hnenah puan pho dan tur thleng emaw, Mai chan dan tur thleng emaw a hrilh a hrilh ngai lova an tih tur felfai taka an lo ti ve ang mai hian a chhawng diat hian mahni mawhphurhna an tih theihna tur hian ti ilangin kan kaldan tur a niin ka hria a. Chutiang nilova keini hian choka lamah te kan va awm reng mai a, Pa berin kan tih loh tur kan va tih chuan kan inti te vek anga. Tin, rawngbawltu kan tibuai ang, puan sutu kan tibuai ang, thleng siltu kan tibuai ang. Chuvang chuan an tih tawk a awm, kan tih tawk a awm, keini hian chuan Mizoram State chungchang hraw hraih hi helai Member 40 te hi chuan kan tih a ngai a, chumi ti tur chuan kan Constitution hian thuneihna min pe a ni.

Heng Municipal Councils kan tihte, Ward Committees kan tihte chungchangah hian a buah hian a inziak dup mai a, State sorkarin kan tih theih chin chu. A tlangpui thuin an kalphunga Dan siam hi kan tih theih a ni. Chhiah lak dan tur chungchangah te, an hnathawh dan tur kalphung turah khan a system-ah hian thu kan nei a ni.

Tin, thenkhatin Bangalore-ah chuan nuai 50 diat diat an ti nge ni vaibelchhe 50 diat diatin an sem tihte pawh an sawi a. Diat diata sem chi ah chuan MLA zawng zawngte hi kum khatah nuai 25 vekin kan insem thap mai a ni, a ruala sem chi hi a awm a ni. M.P. te pawh tunah phei chuan nuai 500 theuh an insem diat diat a ni, a rual thep thepa sem chi.

Tin, Aizawl khawpui kan ngaihtuah chuan sawng ka bial ve Aizawl ‘E’ – II te ngat phei saw chu (interruption) miin Lengpui atangin, America atangin emaw Italy atangin emaw an lokal a, Aizawl an kal a, New Market an kal a, Mizoram ka hmu an ti mai. Khatiang anih si chuan sawng laite saw kan cheimawia pawisate pawh hautak zawka kan sen a ngai dawn a sin. Rual pet peta sem chi a nilo. Dawrpui an kal anga, New Market an kal anga Mizoram ka hmu an ti mai dawn si a, sawlaite saw tun aia nalh taka

kan siam dawn chuan insemrual lampang kha a chi loh hrim hrim, chu chu member zahawmtak Pu K. Liantlinga khan tukin zing khan chiang takin a sawi tawh a.

Tin, hemi ti tur hian kan Municipal Councillor-te hi an fel tawk, anni hi Aizawl mipuiin he Aizawl khawpui enkawl tur na na chuan mi 19 an thlante an ni. Chutah chuan keinin heti hian lo sem deuh rawh u, lo va tih hi chu Constitutionally pawha kan tih loh tawp tur, kan tih tur miah loh ultra-constitutional-a hma kan lak theihna a ni a. Tin, he Resolution hi a rawn pulut-tute an zahawm viau nain hetiang hi a tirah chuan awm awm taka rawn lang, tha awm taka lang hi thil hlauhawm tak a ni thin a. Setana'n Evi a thlem pawh khan tha awm tak khan a rawn thlem ve a ni, thei it awm em em mai kha a rawn ti a, 'I ei te chuan i chuti dawn asin, chu chu ani hian a phal lo alawm' a ti a, a pawi thui dan kha namen lo a ni. Vawiinah hian kan rah sual chuan a dawt lehah chuan a pawi thui tawlh tawlh ang, a pawi zual tual tual bawk anga. Vawiinah hi chuan Pu Dy.Speaker, rah sual chi a ni lo, chuvangin a rawn puluttu hi ka ngen a. Khawngaihtakin kan Resolution hi kan member-te kan zahawmna kan humhim zelna nipahfawm leh Counselors-te an zahawmna leh an thuneihna kan vawnhim zelna nipahfawmin he Constitution Buin a sawi kan ven himna nipahfawm hian withdraw hram se tih hi kan ngen a ni. Ka lawm e.

**DEPUTY SPEAKER** : Pu Nirupam Chakma.

**Pu NIRUPAM CHAKMA :** Pu Deputy Speaker, ka lawm e. Member zahawmtak Pu C.Ramhluna Resolution hi ka'n chhiar anga, '13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se.' tih hi a wording hi ngun taka chhiar chuan , hei authority-te hnenah he Resolution hi thlen tur tih kha a awm lo a ni. 'Pek thin ni rawh se' tuin nge pe ang. Mizoram sawrkar hian autonomy an cross thei si lo. Tin, keimahni tih tur pawh a nilo, sawrkarin a ti theilo, Central sawrkar pawhin a ti theilo. A ti thei awm chhun chu Municipal Council te an ni, an mahni power chhunga mi a ni a. Annual action plan hi 2011-2012 action plan an ti a ni, Aizawl Municipal Council-in an buatsaih a, Directorate & Secretariat of UD&PA te kaltlangin Finance Department FC&MC Mizoramah thehluh tawh a ni a, hei hi kan pawm tur a ni. An Plan chu anmahniin an siam anga, Mizoram sawrkarah an thehlut anga, Mizoram sawrkarin Delhi-ah an thehlut dawn a ni. Chuvangin anmahni tih dan tur kha Mizoram sawrkarin direction pek ngawt kha a ti thei lo a ni. Chuvangin he Resolution hi technically defective a ni a. Tin, nichina member zahawmtak takte sawi ang khan Autonomy engrossment tih zawngin hei hi Assembly rorelna khawlin Resolution zawngin kan nawr hi a thalo anga, nakinah precedent thalo tak a awm ang. He Resolution aiin MLA Fund hi nuai 50 ni rawh se ti sela chuan, kan support vek tur a ni a. Aizawl Municipal Ward tinah rualkhai taka pek ni thin rawh se tih ai pawh a Aizawl Municipal Ward tinah rualkhai taka pek turin kan ngen a ni ti sela chuan a la ziaawm tur a ni. Ni rawh se ti a, tunge nih tir ang. Keimahnin power kan nei si lova, anmahniin an tih duh loh phawt chuan State leh AMC-in fight mai dawn a, keimahnin pass ringawt mah ila, an mahniin an tih duh miah loh chuan engtin nge kan tih ang ban hial an ngai dawn a, chuvang chuan technically defective a nih avangin tlawmngaihah la lo sela, lo withdraw thei se ka duh khawp mai.

MLA party –in sawtah chhimlamah member ding turin deputation-in a thawn a ni a, chuti lo chuan keini Autonomous Area rilru kha hre lovin he resolution hi pulut mai mai a ni a. Autonomous District Council-ah, Lai Council-ah, Bial tinah development fund hi rualkhai taka pek ni rawh se tih chuan Aizawl leh Lawnglai pawh kal ngam a ni lova. Chuvang chuan hei chu Autonomy cross zawngin hmalak chu district council area mi tih turah ka ngai lova, chuvangin deputation-ah thawn a ni tih kha ka sawi duh a.

Ngun taka ngaihtuah a ngai a ni, member zahawmtak Pu C. Ramhluna hei kan in thenawma bialah te pawh. Heta tanga rorel tur chu a ni lo a ni, Autonomous-a nih miau vangin, chuvangin tlawmah la lo se la. Thanga in chhungkuah hei mi 19 in awm a, kg 5 vawksa ka lei sak che a, inzat theuhin ei rawh u aw ti sela, a resolution hi riltam an awm anga, ril tam lote pawh an awm anga, inzat theuhin a ei theih loh a, mamawh pawh an mamawh vek lovanga, chuvangin Pu Deputy Speaker, he resolution hi ka thlawp thei lo.

**DEPUTY SPEAKER** : Tu nge sawi leh dawn le ? Sawi tur kan la awm em ? Pu P.C. Zoram Sangliana, tunge dawt leh dawn, Pu P.C. Zoram Sangliana sawi phawt mai rawh.

**Pu P.C. ZORAM SANGLIANA, MINISTER** : Pu Deputy Speaker, Member zahawmtak Pu C. Ramhluna, resolution “13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se” tih han chhiar thuaka tha tak maia lang, mahse puluttu ngei pawh hian he thuneihna ti thei turin awm dawn sela, hman ngaihna a hriat miah loh tur khawvel kalphung leh Pathianin mihringte a siam chhoh dan reng rengah khawvel a siam tan tirh leh a siam tan dan pawh a inang lo, he khawvela thunei tura a ruat, mipa a siamna atanga nak ruh atanga lak chhuah hmeichhia a tih tak danglam dante atanga thu bul atanga han chhut hrim hrim pawh hian thil nithei lo, Mizoram rorelna sang ber meuh maia pass tura han innawrna ang hi pawi tak niin kei ka hria a. Hei member-ten kan sawi tawh thina, chawhma lamah te leh chawhnua te pawh India ramah hun rei tak, keini ang kan pian hma atang tawh te pawhin aniang chu, chutatang daihte pawh chuan Municipal Corporation-te pawh hi an lo nei tawh thin a, khawpui lianah te chuan. Chungah chuan changtlung tak tak an nei a, keini kan han nei ve dawn tan a, kan han ti ve dawn tan a, campaign lai atangin, chung nei changtlung tawh tena an inthuam famkim tawh dan ang kha, nu pum chhunga awm nausen nih mek laia patling kum 50 dinhmun nena khaikhin tlat ang khan election campaign lai pawh khan a ri nasa em em maia. Chuvang chuan vawiin-ah hian zirtirna diklo zirtirna hian kan hnam tan hian pawi a khawih leh dawn a ni tiin Municipal inthlan dawn lai campaign lai vel khan ka thusawinaah phei chuan ka sawi thin a ni. A chhan chu zirtirna diklo lunglen thlak em em si han ngaihthlak mai te, lunglen thlak em em mai si, a tak ram thleng tur erawh chuan beih fet ngaihna tur zawngin sawi mai ila, a dik mai awm e.

Beih fetna tur atana inzirtirna diklo Ochuan kan ram hi tah leh hathialna a thlen ang tih ka hlau a, Mizo leh Mizote ngei pawh inhmelmakna hmunah kum engemaw zat min lo hruai tawh a. Mahse Pathianin a remruatna avangin leh roreltute

ngei ngei atangin tlawm ngamna Pathianin min pekna atangin he kan ramah hian muanna, remna, hmasawnna alo kal chho mek a. Chuta an kal chhoh mek laia kan khawpui ber enkawltu turte kan han inthlannaa mipuite hnena duhthusam ram samna, lungleng tak maia, mipuite vote duh vang ringawt maia inzirtirna atang hian ka hlauthawng em em mai a. Chu ka hlauthawn chu khatih laia zirtirna petute bench atangin he resolution hi chumi tidik tur chuan i ti mai ang, a rawn lut ta chiah mai a ni, a pawi khawpin ka hria. Pathian leh kan hotute zarah hmun hrang hrangah India ram chhungah heng Municipal Corporation neihna angah te hian thiante kan lo nei ve thin a.

Opposition leh rulling lampangte pawh thiante engemaw zat kan nei ve a, an dinhmun inthlauh ziate pawh kan sawi thin a ni. Rulling nih hlawk ziate pawh campaign lai khan vote duh vang ringawta sawi ni lovin bial changkan duh vangte, khawpui changkan duh vangtein kan sawi thin a. Tichuan mipuiten a tam berin i ti mai ang, ti hian an rawn pawm ta a. Chutih lai kara mipuite thutlukna tiphet mai han tum leh tlat maite hi thil nuihzat thlak tak ni telin ka hria a. Heng Municipal Corporation changtlung tawh angah te chuan. (Nichinah SMS pakhat ka dawnga). Hemi Corporation pakhat atang hian chuta ka dawn atang chuan India rama khawpui pakhatah chuan heng angah hian Ward tinah 5 crore zel an nei tih hi min rawn thawn a. AMC a an zin pui zinga mi ngei kha ka'n zawt ve leh a, chumiin min rawn chhan ve leh dan thung erawh chu hengte chu intodelh tawh tak tak state-te an ni a. MLA pakhat pawhin MLA Local Area Development fund atan pawh a crore tel an nei. Tin, fund atan pawh a crore bi an neih tawhna hmunah te a ni a.

Mizoramah hian ti zawngin khaikhin ve ta ila Pu Deputy Speaker, MLA tinte hian vawiinah kan Finance Minister Budget rawn pharhah pawh lang chu, kan bial chhunga kan hman tura fund kan neih chu nuai 25 a ni. Nuai 25 kumkhat atan kan nei a, chutih rual chuan nikum lam hman tawnate en ta ila, Ward nei tlem ber anga langah pawh hian nikumah khan nuai 15 vel an nei a, MLA bial khatah ward hnih an awm bawk si a, chumi awmzia chu, MLA aia tam zawk nuai sawmthum chu a nei tlem ber pawhin an nei daih tihna a ni, MLA local fund aia tam zawk. Chutiang khawp chuan sawrkar hian hma an laksakin a bul tantirhna a tang hian khingbaiin an kal ang tih hlauin a lo kalpui tawh a, chutiang anih mek laia hetianga han tih hian ngaihtuahna ka nei a, kan thlir dante pawh hi a hrang hrangte a awm ve thei a Pu Deputy Speaker, he House-ah pawh roreltu zahawmtak lo ni thin a hming pawh sawi ri tawh mai ilangin, Pu Joe Ngurdawla, chatuan ram pana a kal khan anmahni raliturin a inah kan leng ve a, a bial hlui atanga pa pakhat a ipte pui nghahna thinin chu mi hunah chuan raliturin a lo kal vein thusawina a nei a, chuta a thusawiah chuan, ti hian a sawi a. Hmanni chu Ramhlun vengah ka va inkawm ve a, chawlhi zan hian, electriict bulb pakhatmah inkhai awm si lovin a eng ut mai a, chuta ka ngaih tuah chu vanram hi ava han nuam dawn tak em !! hei, Ramhlun veng biakinah chuan electriict bulb pakhat pawh khai awm lovin a eng ut mai a, mi zawng zawng kan inhmu thei mai a, ka ti a, chungang aia nuamah chuan kan Pu Ngurdawla hi a awm tawh a ni” a ti a ni. Chutiang chuan kan awmna hmun a zir hian kan thil thlir dan pawh a dang thin a, duhthusam ram ringawta party inzirtir thinte hian an sim hi a hun tawh a ni, he ramah hian. A tak ram thleng thei tur nilo, duhthusam ram ringawt maia inzirtirna atanga mipui inzirtir- na hi kan sim a hun tawh, a tak ram thleng tur kan hmuh zat zat hi vawiin chuan a hun tawh a ni. Kan dinhmun a zir zela, chu ani chuan vanram nawm tur zia a ngaihtuahnaah khan Ramhlun veng Biakin-a electriict bulb pakhatmah awm lo eng, khang angah khan Pu Ngurdawla kha a kal dawn tih a ngaihtuah a ni. Aizawl

tlangval tan chuan a nuihzatthlak maitei a ni. Amaherawh chu ani chuan an khaw dinhmun atanga chhut chuan a nuihzatthlak lo tawp ang.

Chumi ka'n sawi chhuah duhna chhan chu Pu Deputy Speaker, heng resolution-te pawh hi pawnha han chhiara tha awm deuha lang, hman dawn tak taka hman theih der siloh ang chi hi chu he rorelna sang takah hian kan tih loh hi a thain ka hria. Kan dan hremiten an sawi a, kan ngaithla tawh a, India Constitution vawng him turah he House-a member zawng zawngte hian chhe chham vek kan ni a, chumi nihna atang pawh chuan he resolution hian kan constitution-tena Municipal-te thuneihna turah a pek kan violet-na tur resolution anih avangin, kan thutiam kan zah avang tal pawhin kan pass loh hi a dik dawn a, a withdraw siloh chuan, buk a ngai dawn a. Chuvang tak chuan buk ngai lo hian Pu Deputy Speaker, he resolution neitu hian khawngaih takin withdraw leh turin ka'n ngen duh a, chumi anih loh chuan he resolution 13<sup>th</sup> Finance Commission-in khawpui cheina atana pek thin chumi anih loh chuan, he resolution "13<sup>th</sup> Finance Commission-in khawpui cheina atana a pek thin Urban Local Body Grant hi Aizawl Minucipal Ward tinah rualkhai taka pek thin ni rawh se" tihi ka support theilo a ni tihi ka sawi a ni. Ka lawm e.

**DEPUTY SPEAKER** : Pu R. Lalrinawma, chumi zawah  
Pu Zothangliana

**Pu R. LALRINAWMA** : Pu Deputy Speaker, ka lawm e, ka hmaa Member zahawmtak takte khan an sawi chiang viau tawh a, he resolution hi putluh awmlo a nih ziate, he resolution hi putluh chi anih loh zia, pass-pui chi anih loh dan te, withdraw mai chi anih dante fiah takin an sawi tawh a. Sawi ve tul loin ka'n hre deuh hlek a. Amaherawhchu Pu Deputy Speaker, a dawtah hian ka resolution a awm a—"Infiamna lama Mizo thalaite hmasawnna atana Pu Lal Thanhawla hruai Sorkar hmalakna hi lawmawm kan ti" tihi a awm a, hei hi kan sawihman ka beisei avangin a chiang tawh viauin ka hria a. Amaherawhchu hun ka'n en a, kan sawi hman dawnin ka hre lova, chuvangin, he resolution pass chi anih loh dan kha han sawi ve zawk ka duh a, a move-tu pawh khan a resolution ber ai hian a Mizo History kha a rawn sawi tam mah mah a, chuvang chuan a resolution-in a tum pawh hi a chiango niin ka hria a.

Tin, Pu Deputy Speaker, Municipal Council hian sum an neih hma khan Dawr ruak nghak ang kan nite an ti a, an intehkhin a, tunah Dawr tak awm an han nghak dawn a, Dawr tak nghak tlak pawh hi an nilo em ni tihi a ngaihtuah theih a, hetiang anga thil kalhmang lo tak mai an han phut a, an pute he House zahawm taka tullo tak mai an han sawi tir hi Dawr tak awm hi nghaktlak an ni dawnlo hlein a lang a, Village Council u kan tihte kha tun thlengin sawichhuah a ni a, House-ah ngei pawh hian kan sawi tawh a. Rorelna inkhaidiatah Village Council atangin Legislative Assembly a awm dawrh a, a karah hian alo enkawltu tur Village Council-te, Local Council-te lo enkawltu tur hi an ngai a ni tihi kha ram rorelna kalphung inkhaidiatah a tul a ni. An u tur hi siam a ngai a ni tihi kha a ni a, an u u leh Legislature-a kal daih ngai lovin an u chiah tur kha siam a ni tihi kha a ni mai a, chungte chu vawiin tlenga la sawi chhuah a ni a.

A move-tu khan Pu Chairman, Autonomous pawh nise, Autonomous Body pawh nise State-in kan siam a ni a, kan thu chu an zawm anga a ti a. Kan thu zawm a ngaihna chin chu Danin a bithliah vek mai a. Amaherawhchu sum hman chungchangah an thuneihna chinah erawh chuan Autonomy an ni a, Autonomous Body an ni a, State Sorkar pawh Pu Chairman, Parliament-in a siam a ni a, Constitution Article 2-ah Parliamentin State Sorkar a siam a ni a. Mizoram State ngei pawh a lo pian dawnin Parliament Constitution Amendment Act hmangin alo piang a ni a. Parliament-in Mizoram State khi kan siam a ni a tiin kan thuneihna huangchhungah kan sum hman turte an duh anga an rawn rel kha tum ta se a dik lova, rel pawh an rel bawk loveng a, keini pawhin kan duh bawk loveng a. Anni pawh kan siam annih avanga an sum hman dan turte thlenga kan va rel kha kan tih tur a ni lo a ni. Tin, Need Base-a kal a tul dante chu hriat vek a ni a. Member thenkhatten nichinah Aizawl khawpui laili laiah mamawh kan nei tho pawh an ti a. Amaherawhchu, kan mamawh hi a inchan lova. Chuvang chuan mamawh zual Aizawl chhehvel sawng Zemabawk, Falkland, Thuampui te pawh saw hei tuna sum an han insemahi chuan a chang tam deuh an ni a, sawngte pawh saw mamawhna a nasa em em a ni a. An sum sem hi a resolution neituin a putluh ang deuh hian rualkhai deuha sem ni rawh se tih hi Municipal Council hian an lo tihhawtling der tawh nite pawhin a ngaih theih a. Nuai 20 aia tlem chang an awm miah lova, nuai 20 leh 30 bawr inkarakhan an semrual vek mai a, rualkhai takin an lo sem der tawh a tih theih hial zawk a.

Tichuan, resolution puluttu hian withdraw a tulna chhante, dan hmanga a dikloh dante ka hmalamah an sawi tawh a. Tin, Anti-defection Law-te pawh kan va siamsak a tih te kha. Dan chu Legislature-ten kan siam tur a ni a. Amaherawhchu, tuna rel tura an rawn chhawpchuah erawh hi chu an thuneihna chin a an hnathawhna kha a ni a, a inang lova ni. Act siam reng reng chu Legislature thuneihna chinah tih tur a ni a. Chuvangin Anti-defection Law-te kan va siamsak e tih nen kha chuan thil hrang daih a ni tihte kha ka'n sawilang ve duh a. Resolution awm leh awmlo chungchangah hian vawiinah awmlo tak mai an putluh chungchangah hian hei tukin Chanchinbuah MNF in resolution pass an zahpui tih alo chhuak a, Pu Chairman, i phalnain ka'n chhiar deuh nual anga-Eptu member-te tellova Private Members' Resolution pass a ni chu zahpuiawm an tih thu leh lungchhiat tlak an tih thu an tarlang a. Resolution chu Chief Minister laka mimal tlaklum duhna avanga an ngaihthu an sawi. MNF chuan Congress MLA R. Lalrinawma'n, House-a resolution a putluh Power lama Lal Thanhawla sorkar hmalakna avanga lawmthu sawina chu awmlo an tih thu an tarlang a, a ti a. Lawmthu sawina tur resolution-te hi an nei ve anih chuan an pute hun kal tawha an hnathawhne kha an nei anih chuan rawn pulut sela, lawm tlak anih chuan kan lo ngaihtuahpui ngei ngei ang tih ka ring a. Lawmthu sawina lam tur nilo a, mahni huang lova resolution te putluh an ni hi a awmlo zawkin, a lungchhiat tlak zawkin, a zahpuiawm zawk niin ka hria a. Tin Resolution putluhte hi Pute laka tlaklum tumna a nih ngai chuan vawiinah hian ka Resolution pahnihna a awm a, ka tlaklum phah hle tawh turah ka'n ngai bawk a.

Tichuan kha kan Resolution lawmthu sawinaah Congress sorkain Power lama intodelh nana hma a lo laknaah Small Hydel Project 18 laiah 14 a hmalakna lo ni te, tuna a hmachhawp tam tak Tuirial Hydel Project 60 Mw an thanthawh leh tur, anni lo sawp chhiat tawh, tin, Tuivai 210 Mw bul tan mai turte, khang zawng zawng kha a lawmawm em em a, lawmthu he rorelna sangah pawh hian ka sawi a ngai. Vawiinah pawh infiamna lama hmalakna Pu Lal Thanhawla kaihruaina, sorkar hmalakna leh kan Sports Minister chak takin a hmalakna hi sawi tur tam tak a awm a, thalaite an lawm a, mipui an lawm a. Chu chu Sports

Infrastructure-ah te hma kan sawn em em a, hei hi sawi hman lovin kan awm ta hi pawi ka ti em em a. Henga lawmthu sawite hi mipuiin pawn lamah an lawm em em a, Rorelna sang berah hian chu chu kan sawi ve a tul a ni tih kha ka'n sawi ve duh a ni. Ka lawm e.

**C H A I R M A N** : A dawtah Pu H. Zothangliana, a duh tawka a thluk sei kan phal dawn nia.

**Pu H. ZOTHANGLIANA** : Pu Chairman, ka lawm e. “13<sup>th</sup> Finance Commission-in khawpui cheina tur atan a pek thin Urban Local Body Grant hi Aizawl Municipal Council Ward tinah rualkhai tako pek thin ni rawh se” ti a Member zahawmtak Pu C. Ramhluna’n Private Members’ Resolution tura a rawn putluh hi ka thlawp lo tawp a, a chhan pakhat chu he thil hian hmanlai thil deuh han ti ila keini tan chuan hmanlai thilte pawh a chang ti tih tawh a. MNF leh India Sorkar laipuiin remna leh muanna tura inbiakna an neih lai velte kha min ti hrechhuak a, khatih lai khan kan u te'n min hrilh dan chuan MNF Party hian Autonomous District Council ho zawng zawng khi nuaibo tur a ni tiin an demand tel a. Khang thilte kha vawiinah hian he Resolution tura rawt hian min ti hrechhuak thar hle a, he Party ngaihdan hi chu a lo la ngai reng anih hi, keini minority ho tan phei hi chuan an hlauhawm ngaiin an la hlauhawm reng a. Chuvangin, nichina kan Member zahawmtak Pu Nirupama’n ‘deputation-a rawn tirh a ni’ a han tih mai pawh kha kan pute, kan pate rual mah nisela he resolution atana rawn rawttu nihna tak takte pawh hi a pho emaw ni ta le, amah hi mimal tak chuan mi tha tak a nih tehreng nen, a party hian a lo chhum khawlo ta emaw ni aw tihte kha min ngaihtuah tir hial a ni. Hetianga Local Body kan neihte thuneihna chhuhsak leh tihdal emaw nuaibo tumna ang chi hi anni party hian an thih san tak tak thei lova, engkim mai duh huam huama mahni angchhungah pawh luh vek mai kha an sorkar hun chhung pawh khan an kaldan thin kha a ni a. Vawiinah pawh hian an tih theih tawh dek chinah chuan chutianga kal zel chu an duh tihna nite pawh hian a hriat theih hialin ka hria a ni. Chuvangin, he resolution hi a thlawpa thlawp chi rualah ka ruat lo a ni.

Kan hotu thenkhatte khan Lai Autonomous District Council-ah leh saw lamahte equal share chungchangte kha sawilan thuak thuak a ni a, khangte kha helai House zahawmtakah hian hnuhluk tumna rilru a ni hial mai lawm ni tia an rilrua zawhna awm theite pawh kha an sawilang a, a dik viau a ni. Equal share chungchang hi kan sawi nual tawh a hun hmasa lamah khan, han sawi nawn leh lawk ta ila, sawi rik anih takah chuan. Kan hriathiam theihna tur chuan equal share system-ah chuan kuttualleichham emaw pianphunga rualbanlote tanpuina emaw fund a lo awm a, pawisa lo awm a, chu chu MDC bialtinah khan a rualtlang pet petin an inse a, bial thenkhatte chuan hetianga tanpui ngai rualbanlote, vanduaite an awm lemlo thei a, thenkhatte an awm tam deuh palh thei a, chu system an kalpui lai chuan khaw pakhatah phei chuan sawi ta ila, thil liam tawh a ni a, a zahthlak tho nachungin tihfel a, bansan a ni tawh bawk a, han sawi ta mai ila. Khaw pakhatah phei chuan kha pianphunga rualbanlo vanduaite tanpuina tura an tih ang chi kha, an khuua palian leh sek tha sen tel tul mai khan a dawng ve a, an ti nghe nghe a, chu chu tunthleng pawh hian mi tam takin an sawi ban hleih theihloh a ni a. Chutiang ang chuan equal

share system hi chuan thilthalo tam tak a pai tel tul mai a ni. Chu chu ramhlui zia a ni tih kan hotuten an hriatchian avangin Autonomous District Council Lai bik MDC inthlanna hnuhnung berah khan he system hi kan sorkar hunah chuan kan titawp dawn a ni an tih ang chiahin vawiinah hian kan roreltuten an titawp ta hmak bawk a, thil lawmawm tak a ni ka ti a. Chutiang ang miten an duh loh an kalsana kan kalsan mek laia chu thiltha lo bawk mai chu he Mizoram Rorelna sang bera hnuhluk tum a han ni ang tak maia thil a lo ri chhuak leh hi pawi ka ti kawp mai, heng equal share system angte pawh hi a bul tan anih leh, nasa taka fel lo tak maia kalpui anih hunte pawh kha han ngaihtuah chian deuhte phei chuan vawiina hetiang sytem rawn thanthawhna tumtu party nia puh loh theih loh MNF ten rorelna an chan hun lai kha a ni nghe tih kha thu belh a ni e.

Tin, he resolution hrim hrim hi a... keini aia mithiam leh puitling zawkte chherchhuah mah nisela, a naupang kut chhuak deuh mange aw kan ti veleh chhawng khanglang a, kan han uar tak tak hi chuan a thluk deuh loh theih loh a ni, kan lo tihdan pangngai kha a ni ve a.

**C H A I R M A N** : Phalsak i nih kha .....

**Pu H. ZOTHANGLIANA** : Pu Chairman, min phalsak bawk a ka lawm khawp mai. A Resolution hi sawisel tur chang hrim hrimin, zir chiang tawh chuang lem hlei lova, a..hei le, hei, helaiah hian sawisel tur ka hmu e ti a, hmanhmawh taka buatsaih a ang ka ti a. Vawiinah hian sawiho hun lai khan Pu Chairman, i vei lama thute mit hmaia kha (saw lam tawng bawk a nih chu) an hmel put zia kha ka lo chik ve rauh rauh reng a, kan hotuten an han sawi an han sawi a, in han sawi chian takah chuan aw....he resolution hi chu kan lo ti mai pawh a, nikum lama an pawisa insem dante tal kha chu lo thlir tel zauh ila chuan putluh ngam awm loh tak a nih hi maw le tih hmel kha an pu niin ka hria a, a ti chiangtu pakhat chu kan Chiarman ber bial hi kumhnih chhung 2010-2011 leh 2011-2012 chhunga an pawisa insem danah hian a dawng tam lamah a pakuana (9)-na a ni phak ngawr ngawr a ni. Lal dan indawta insem chu an ni ringawt hauh lo a ni tih hi a chiang em em a ni. Chuvang chuan, Pu Chairman, 13<sup>th</sup> Finance Commission-in khawpui chei nana a hriat thin Urban Local Body Grant hi Aizawl Municipal Council Ward tinah rualkhai taka pek thin ni rawh se tih hi resolution atana rawn puluttu kan Member zahawmtak hian tlawmah pawh la lo mai rawh se. Tihsual palh a ni e, tiin tlawmgai takin hnuk let sel a tiin ka'n ngen a ni. Ka lawm e.

**C H A I R M A N** : Pu Chawngtinthanga ilo sawm ang.

**Pu CHAWNGTINTHANGA** : Pu Chairman, resolution tha tak "Mizo thalaite tana Pu Lal Thanhawla sorkar hmalakna hi lawmawm kan ti" hi sawi hman turah kan ngai a, ka han insum hram hram a, amaherawhchu, kan hman dawn tawh lo hrim hrim chuan din tawh loh ka tuma mahse ka'n ding leh hram a ni. 13 Finance Commision-in a pek thin khawpui cheina Local Body Grant hi Aizawl Municipal Ward-in rual khai taka pek ni rawhse an ti a, rualkhai tak tih hian ka rilru a lo lang nghal chu, tuntuma saw lama District Council thlan dawn khan Pu K.S. Thanga te nen kan phei ve a. Kan thu ken lian tak zinga mite chu, 'Lai Ram politics hi siamthat a

ngai a ni', kan hotuten an ti, kan siamna tur zingah chuan a tul, tul lo pawh ngaihtuah loa MDC ten equal share ti a, engkim mai insem leh thin ringawtte hi, corruption chance lian tak siamtuh leh development tithuanthtu a nih avangin, hetiang hi tihtawp kan ngam dawn a ni. Keimahni hi sawrkara min dah ngam chuan, kan thil tum hi kan tihiawtling ngei anga, amaherawhchu chung chu in la ui deuh anih chuan, min vote lo mai ula opposition-ah hian kan thu ngam a ni. Party dangte nena zuang lawra sawrkar siam hi kan hotuten an tum lo, tiin chang langin kan va hrilh a. Chuvangchuan an harh chhuak ta aniang chu kan ti maia, kan Lai Ram unaute pawh, tichuan tiangawn Council-ah sawrkarna min lo pe a, kan hotuten an lo tiam ang ngeiin, equal share hi zawng corruption invite-tu leh corruption siamtuh lian tak a nih avang leh ram development tithuanthtu anih avangin leh sum leh pai tam tak engmah loa luanral tir maitu anih avangin an titawp ta a, a lawmawm khawpin ka hria a. Chung zinga lawm ve ngei ngei tura ka ngaih sawlam pang atanga lo chhuak ve ngei mai, kan member zahawm tak Pu C. Ramhluna'n hetiang Resolution a rawn pulut mai hi a ngaihtuah chianglo deuh em ni aw, ka ti a. Tin, an sawi ang khan hetiang te i tih chuan sawlamah chuan i kal ngam dawn emni aw an tikhka a dikna chin a awm mai awm mange ka ti a. Ka khawngaih angreng viau nghe nghe a ni.

Tichuan, nichinah khan ka rirlua lo awm lian ber mai chu a legal point zawk hi a ni a. Kan Law Minister zahawmtak khan chiang takin a rawn sawi tawh a. Kan zavaiin he House-ah hian India Constitution venghim turin thutiamna nena lakluh kan ni tih kha kan hre theuh awm e. Chutiang chung si a Constitution, Provision engkim enfel lem lova hetiang Resolution a lo lut mai hi a pawi khawp a, tun hnu-ah chuan kan zavai hian kan fimkhur a ngai tawh hlein ka hria. Kan hriat theuh angin India Constitution hian Social Republic Democratic Government-a siam a ni a. He mi hian a tum ber chu Power Centralization a ni tih hi kan hria a. Federal Power a awm a, State Power a awm a, State hnuiah Local Body Power a awm a, kan hria a. Nichinah khan member zahawmtak Pu C. Ramhluna'n hetiang Resolution a rawn pulut mai hi a ngaihtuah chiang lo em maw ni aw ka ti a. Nichina kan thianten an sawi ang khan hetiangte hi an tih chuan saw lamah chuan i kal ngam dawn emmaw ni le an tih kha a dikna chin a awm mai awm mang e ka ti a, ka khawngaih angreng viau nghe nghe a ni. Tichuan nichinah khan ka rirlua lo awm lian ber mai chu a legal point zawk hi a ni a. Kan Law Minister zahawmtak khan chiang takin a rawn sawi tawh a, kan zavaiin he House zahawmtakah hian India Constitution venghim turin thu tiamna nena lakluh kan ni tih kha kan hre theuh awm e. Chutiang chung si a Constitution Provision engkim enfel lem lova hetiang resolution a lo lut mai hi a pawi khawp a, hetiang hi tun hnuah chuan kan zavai hian kan fimkhur a ngai tawh hlein ka hria.

Kan hriat theuh angin India Constitution hian Social, Republic, Democratic Government a siam a ni a, hemi hian a tum ber chu power centralization nilovin power decentralization a ni tih hi kan hria a. Federal power a awm a, state power a awm a, state hnuiah local body power a awm a, khatiang khan a in pe thliah thliah a ni an ti a kan hria. Nichinah khan kan member zahawm tak Dr. R. Lalhanglana khan hmanni lawkah khan resolution kan pass a, Anti Defection bill-te pawh kan han siam sak a, kha nen khan danglamna a nei lo ve a rawn ti a, kei chu ni thei lovin ka hria a. Legislative power keimahni constitution min pek ang thlapin State Legislature hian kan nei a, chutiang tak chuan Constitution-in min phal angin dan kan siam a, tichuan

Aizawl Municipal Council pawh hi alo piang a ni tih kan hai lova. Amaherawh- chu a inenkawlna atan erawh chuan an mahniin legislative function an neih loh avang leh power nei lo an nih avangin kan siam sak a ngai a ni tiin kan siam sak leh a. Member-te hi engemaw tiin zuan lawr palhte leh khami atana inphatsante a awm mai palh takte in, ammahniah te hian buaina a awm palh tak tein chuvangin helam hawite hian dan siam sak a tha a nge tiin an dan hman tur kha kan siam sak a ni mai a. Tuna 13<sup>th</sup> Finance Ward chung- changah hi chuan central atanga lokal State-in dan kan siam anga a hlawma an hnena kan pek chhawn tawh, khami sem tura keimahniin kan va zen leh kher kher kha chu Constitution Provision violation lian tak a niin ka hria a. 74<sup>th</sup> Constitution Amendment Provision a kalkh liau liau a nih avangin vawiina India Constitution venghim tura intiamna nei thlap Legislators hoten hetiang hi kan pass chuan mahni inti te kan ni mai lovin mahni thutiamma ding lo Legislator kan nih dawn avangin resolution hlauhawm tak a ni dawnin ka hria a, chuvang chuan he resolution hi chu pass theih rual a niin ka hre lo a, chuvangin a neitupa member zahawmtak Pu C. Ramhluna hian tlawmngai loin hnuuk dawk mai se tih ka han ngen ve nghal a ni e. Ka lawm e.

**DEPUTY SPEAKER** : Sawi leh tur kan la awm em le. Tunge sawi leh dawn, a mover kan ko leh mai dawn em ni. Kan duh tawk maw, anih leh kan sawihona kan duhtawk ang a, resolution neitu i va tuan muang ve.

**PU JOHN SIAMKUNGA** : Pu Deputy Speaker, kan sawi ve leh lawk ang e, tawi tein, a laklawh zo bawk si a, han sawi loh ka tum nain ka'n sawi veleh lawk ang e. Awle, hei kan hotu hrang hrangten an sawi tawha, engvanga he resolution hi rawn pulut mai nge tih chu vawiina SMS dawngtu ho kha chuan a chhan kan hriain ka hria, engvangin nge he resolution hi rawn putluh anih. SMS-ah khan kan dawng tliar tliar hlawmin ka hria a, khami khan a tichiang khawp mai. Kha pressure avanga he resolution hi rawn lut a niin ka hria a, a zahthlak ka ti, thil zahthlak tak a ni. A vang chu helaia kan hotu, kan Member zahawmtak, kan resolution neitu pawhin a chhia leh tha hriatna uluk tak seng a, he resolution hi buatsaih a niin a lang lo tlat a ni, a pawi takzet. Tin, kan hre veka, helaia thu ho chuan Autonomy an ni, mahni a ro inrel an ni a, an rorelna kut zuk phuar emaw, an rorelna thu zuk tihdanglam emaw, an rorelna chhunga zuk inrawlh tuma vawiina he rorelna sang zawka ro rel an rawn rawt hi a pawi takzet. Aizawl Municipal Council hmuhsitna niin ka hria, Local Council hmuhsitna niin ka hria, a pawi a ni.

Tin, a dang lehah chuan Aizawl Municipal Council kha a lo din khan sum bawmruak min hnutchhiah, engmah min pe lo, a bawm ruak chauh a ni. Sum a rawn awm leh a, sumah bawk kan buai leh a. An sem rual lo, sem rual rawh se kan ti leh. Engatinge sumah ringawt hian kan buai? A rorelna zawk leh a kalphung zawkah khan duhthawhna te a awm a nih chuan kha lampang kha kan rilru senna tur a ni dawn zawk lo'm ni?

He 13<sup>th</sup> Finance Commission-in sum a rawn pek hi Councillors area development fund a ni lo tih kan hriat a ngai. Area development fund, a bikin MLA

fund ang a ni lo. Rualkhaia insem mai chi a ni lo. Mamawh dan mila Aizawl Municipal Council Executive Body-in an rel a, chumi atanga hnathawh tur lo chhuak tur atan he fund hi dah tur a ni. Khami kan zu chuhpui kha a dik lo. Anti-defection Law kha kan sawi pawlh nuai thin a, a pawi a ni. Anti-defection Law engatinge kan pass kan tih chuan, tunhmaa thil awm thin kan hria a, mahni pumpui hmangaih vang te, sum leh pai duh vang te, nihna duh vang tein mahni party ticket kalsanin min thlangtute pahtsanin party dang kan bel thin a, a tenawm a, sorkar a ngelng het thei lo a ni. Chumi a nih avang chuan he AMC pawh hi India ram puma kan lo hman tawh thin ang hian an duh duha mimalin an zalenna an hman lohna turin leh Aizawl Municipal Council hi nghet taka a dinna turin, hnathawk theia a dinna turin Anti-defection Law hi i siam sak ang u kan ti a, kan siam sak a ni. Tuna mi nen hi chuan sawi pawlh chi a ni lo. Tuna mi hi chu a dangdai tlat, a lo chhuahna pawh hi a dangdai tlat. Chuvangin, he House zahawm tak maia hetiang Resolution sawi ngaia awmte hi a zahthlak. He House zahawmtak hi a tibawrhbangin ka hria a, a pawi ka ti takzet a ni.

A tawp bera ka sawi duh chu, anni AMC te hi mahnia ro inrel, mahni thua awm tawh, Aizawl khawchhung cheibawlna tur leh develop dan turah pawh anmahni kuta tal tawh, anmahnina an rel tur a ni. Hei hi chu i chuhpui lul loveng u, i zu sawi ve loveng u. Aizawl khawpui an duh dana an chei theihna tur leh Aizawl khawpui an duh dana an duana mipuite tana chenna tlaka an siam theihna turin therhlo duh vang emaw engemaw rilru kawih vangin rilru tha tak pua an rorelna hi tihdanglam tumin i khawih hauh loveng u. Chuvangin tuna an kaldan hi a tha e. An kaldan pangngai hian kal sela. Keini pawhin ram tana thil pawimawh kan relna lamah hian i kal zawk ang u. Mahni khawih chinah hian i inti buai loveng u tih kha ka han sawi duh a. Awle, he resolution hi alo chhuah dan fuhin kei chuan ka hre thei lova. Chuvangin he resolution neitu hian khawngaih takin, hei thil tamtak a hre tawh a, a resolution hi hnukdawk sela ka duh a. A hnukdawk lo anih chuan kei chuan thlawp theih chiah ka ngai love. Pu Deputy Speaker, ka lawm e.

**Pu R.L. PIANMAWIA** : Pu Deputy Speaker, hei ring turin massage-te ka dawng ve lem lova, amaherawhchu keima chhia leh tha hriatna atang ringawt pawh hian he resolution, Pu C.Ramhluna, member zahawmtakin “13<sup>th</sup> Finance commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se,” tih a rawn tih hi pawm chiah ka ngai lo phawt maia. Hei lehlam zawng tak chuan thingtlang bialtu tan chuan khawpui tih lungrual loha an administration-te chhe vek sela tihna tur resolution a ni a. Han thlawp ve mai awm tak a ni a. Amaherawhchu ram tana roreltu turté kan nih avang hian ram tana thalo tur anih na na na chuan a thalo tur chu kan sawia, kan dan a tulin ka hria a. Chuvang chuan he resolution hi pawm tlak niin ka hre lova. A chhan chu ram leh hnam tana thil tha ngaiantuah tura roreltute chuan he thiltha lo hi kan hnial ngama, kan block ngam tur a ni tih hi ka ngaihdan a ni a.

Tin, hetianga semrualna hna rualkhai zawka tih duhna rilrute hi a pu tih hi kan lo hre har lutuk a. Sorkara a awm lai khan division hrang hrangte a enkawl a, Forest-ah. Darlawn division-te khi plantation area thawh tur an pek hi a theuneu bik em em a. Division dangte chu zau deuh deuh te an pe a, chuvang chuan hetiang anga semzaina rilru lo pu a ni tih kan lo hre loa, lo hria ni ilang chuan, lo inpuang seng chuan Darlawn Division-te pawh kha plantation-te pawh kha kan ngah ve deuh tur a ni a, a pawi ka ti khawp mai a, a lo inpuang har lutuk hi waviinah hian. Chuvang

chuan hetiang anga kan ram leh hnam thatna tur ngaituahtute zinga awm bawk si ina hetiang a rawn sawi ta mai hi a pawi ka ti a. Tin, a kohhran rilru anga ka ngaiantuah pawh hian communist lampang kha a rawn hnaih riau maiin ka hria a. Communist rinnate pawh hi a rilru chhungrilah alo hmin ta viau em maw ni dawn aw tih kha ka ngaiantuah a, CPM candidate-ah te min la tan san mai ang tihte hi ka hlau deuh rum rum a.

Chuvang chuan he thil hi tuna a ngaiantuah chin bak hi chu kan chhuah atang hi chuan theihngihlh hmak tawh se a tha ka ti a. Ka duhsak em em a ni tih kha ka sawi duh a, chuvangin he resolution a tih ngawt mai hi thil pawi tak a ni thei a ni tih pawh hi entirna pakhat ka'n tarlan leh duh chu, helaia roreltu ho MLA ho zawng zawngte hi an nupuite hi an pawnfen fen fual dan kha inrual tlang thei ang bera fen tir ni rawh se ti dawn ta sela, kan nupui thenkhatte an lo tawi ang a, thenkhatte an lo sang ang a, a inrualkhai tur ang zawnga khai kha thil theih a nilo tawp mai a. Lehlamah chuan kan thuneihna awm tak a ni kan nupuite hi. AMC pawh hi khatianga han tih mai theih awma ngaihna/thuneihna hnuia awm niawm tak kha a ni pawh ti ila a dik theihna lai a awm ang a, kan nupuite pawh kan thuhnuaiah an awm a ni kan ti thei thova. Amaherawhchu, an pawnfen fen chhin chin tur kha inrualkhai zawngti dawn ta i la, a ni thei ngawt lo a ni. Anmahni taksa pianzia te, an awmdan atang khan a kal hrang lo thei lova. Chuvang chuan, nguntaka ngaiantuahna hmanga Resolution te hi putluh thin a tulin ka hria a. Mifing leh ropui, kan ram leh hnam pawhin kan lo chhawr hrep tawh a ni a, keini an nau zawkte, a mawl zawkte hi kawng thalo-ah min zirtir ang a, Resolution thalo pui pui kan pulut zel mai ang tihte pawh a hlauhawmin ka hria a. Chuvangin, zirtirtu tha kohhrana a nih ang bawk hian ram tan pawh hian zirtirtu tha nizel turin ka duhsak a. Chuvangin, he Resolution hi hnukdawk mai se tih hi hmangaihna tawngkamin thurawn ka'n pe a ni. Chuvangin, he thil hi chu hnukdawk sela, tun atang chuan ani pawhin theihngihlh hmak se tih kha ka duhsakna a ni a, chu chu ka han duhtawk mai ang e. Pu Deputy Speaker, ka lawm e.

**DEPUTY SPEAKER** : Awle, Member 20 lain Resolution hi kan sawi a, kan tui tlang kan ti dawn nge, kan tuilo tlang, sawi dante pawh a inang lova. Engpawhnise, Resolution neitu kha kan sawm tawh ang a, sawifiah ngai a tih leh tul atih angte rawn sawiin adopt-te pawh rawn dil nghal sela a tha awm e.

**Pu C. RAMHLUNA** : Pu Deputy Speaker, ka lawm e. Tunah hian ka Private Resolution pawimawh tak, abik takin Aizawl khawpui tan thil tha nia ka hriat, “13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se” tih ka rawn putluh nguntaka ka lo ngaiantuah ve, ka thiam ang anga kan rawn moved ve, kan House Member-pui ten ngaiantuahna seng tak maia in rawn sawi hi a lawmawm ka ti khawp mai a, in vaia chungah a hmasa berin lawmthu ka rawn sawi a.

Hei, kan han sawi map map atang hian Municipal chhunga Sorkarin thu a neih loh zia, AMC inthlan dawn pawha kan sawi thin kha vawiinah hian a dik zia kan hriain ka hria a. Ruling Party lampangin ‘thu kan nei

love, hei chu Municipal Council ho thu a ni e' an rawn ti tak dap dap atang hian inthlan dawna kan thu lo chhakchhuah thin kha engemaw chen chu in lo pawm ta niin kan hria a. Chuvang chuan, Sorkar dinhmun diktak pawh vawiinah hian a langin ka hria a ni. Nimahsela thil pakhat ka'n sawi duh chu he Municipal Council hi Autonomous body a ni a, mahse, kan Act kha han en ilangin Full Autonomy hi a nih lohna chin a awm a, State sorkarin dan kan siam sak theih chinte pawh hi a tam mai a hei erawh hi chu kan hriat tel atan a thain ka ring a. Section 301-ah te pawh khan Power to make rules a awm a, tin, chubakah chuan Section 286-ah te pawh khan Power to make rules kan nei tlat a ni. State sorkar hian Municipal Council-in a tihtur hi tihsak, siamsak theih dan kan nei a ni tih kha kan hria a. Chumi ka sawi lai chuan hmannya kan lo pass tak Anti Defection Law nen kha chuan kei chu ka kaih pawlh ve hauh lo. A chhan chu ka dinhmunah hian ka la ding reng thova, High Court Order kha ka nei a, chu High Court order-ah chuan District Council-te phei chuan thuneihna an nei lo hrim hrim, Anti Defection Law siam tur khan tih kha ka la dinpui reng a ni tih kha ka han sawi duh a ni. Engpawhnisela, Autonomous Council hi Village Council u awrh a ni e ti a, inthlan laia kan lo sawi thin kha chu a lo ni lo deuh a nih hi mawle, tih hi chu vawiinah hian kan chiang tlang niin ka hria a.

Hei sum sem chungchangthuah a ni tlangpui a, tuna kan han move hi, chutiang zawng pawh chuan a ngaih theih reng a. Sum sem hmasak kha kan lo hriat atan ka duh chu kha sum sem lai khan Elected Body hi a la ding lo hrim hrim a, State sorkar khan tha leh dik a tih ang khan a sem a ni mai a, a pawt chak khan an pawt tam deuh a, a chak lo deuh khan an pawt chaklo a ni mai a. Tikhan inang lo nuaih khan sem a ni ta reng a, tichuan vui an awm a, lawm an awm a, chu chu a dinhmun a ni a. Chuan Elected Body kan han neih chinah pawh hian khawngaih takin Pu Deputy Speaker, min lo ngaithiam la, pawi ka tih chu UD & PA Minister zahawmtakin Chanmari YMA Hall-a Municipal Council Seminar an neih tumah 'Urban Local Body Grant hi inzaha sem kher tur a ni lo' ti hi a lo chhak chhuak tlat a ni. Hemi zaizui hian vawiinah hian hemi sum hi an sem a ni tih a chiang reng a, chuvang chuan he sorkar hian thuneihna kan nei lo tih nimahse, engemaw chenah chuan sum inseum chungchangthuah hian influence an nei aniang tih hi kei chuan ka ring tlat, hei hi mitam tak rindan pawh a ni. Chumi lai tak chu a nia kan duh loh reng ni. Chuvang chuan vawiinah kan hmu a, a tam ber leh a tlem ber inthlauhna kha chhut ta ilangin a tam berin Nuai 34 something a hmu a, chu chu a ni a. Chuvangin vawiina kan sawi tam ber hi chu equal treatment hman tur a ni, equal treatment among the equals tih a ni. Vawiinah hian MPC Councillor a ni emaw, MNF Councillor anih vang emaw, a te bik leh nep bik emaw a ngaih he sorkar hian a tum dawn a nih chuan, a tih loh tur a ti ang tih ka ring tlat a ni. Aiawh an nei, mipui an nei ve vek tho, mipuiah te pawh khan khami an ward chhungah khan kan sawi tak ang khan party hrang hrang an awm ve vek tho a ni.

Tin, chubakah chuan, need-based kan han tih hi mamawh chu an mamawh theuh a ni. Nimahsela kan han sawi tak ang khan Plan lo siam rawh u an tih khan MPC leh MNF kha chu 20 lakhs in cross tur a ni love an ti a. Mahse lehlampang erawh kha chuan 30 te a aia tam te pawh an lo siam ta a, khalaiah khan inbumna kha a tel niin kan hria a. Chumi lai tak chu vawiinah hian hrehawm kan tih leh kan sawi chhuah duh lai a ni a.

Pu Deputy Speaker, vawiina ka'n sawi duh chu ZNP unaute pawh an awm a, Pu Duha, a hming han sawi ta ilangin, MLA zahawmtak, kan senior member a ni a. Ani hi thil tha duh ni a ka ngaih a ni a, PAC ah te pawh kan thu dun a, a thusawi leh thil tih hi ka ngaisang riau va, tin chubakah intelligence a thain ka hria a, kan tluk lo hlein ka hria. Thil tha duh ni a ka hriat hi vawiinah hian a thil tha duh dan hi a danglam ta deuh hlek ni a hriatna ka nei tlat mai a, hei hi chu pawi ka ti khawp mai. Chuvang chuan a inngaiantuah chian atan tha ka ti viau mai a, chu chu Pu Deputy Speaker ka han sawi duh nghe nghe a ni.

Tin, thil pakhat ka han sawi leh duh chu LADC sum chungchang thuah khan keini chu hmanni lawkah politic-ah kan lut a ni ve mai a, in hria a. Tunhma zawng zawngte chuan pute thu kan awih a, ka pu kan ti reng a, tunah pawh kan tih a la tam tho va, mahse kan pu dan a dang ta deuh hlek a, a field-ah kan lut lova, kan hre chiang lo. Nimahsela, LADC chungchang thuah te chuan, CADC leh MADC chungchang chu thuk tak ka hre lo. Sum insem chungchang thuah hian equal taka an insem hi kei chuan ka hre tak tak lo. Vawiinah sawi tur in hria anih chuan sawi rawh se. Va en mahsela, equal taka an sem hi a awm ka hre tlat lo. A chhan chu, opposition party MDC ho ka kawm tam, min lo kawm tam ve tho, an lungawi loh thu bak hi sawi tur an hre bik hauh lo. Chuvang chuan vawiinah khami kha an sawi dawn anih chuan CADC chu ka hre lo ka tih kha, an lo ti anih chuan a tha, ka lawmpui. Nimahsela LADC ah chuan khatiang khan an sem lo tih ka hria a. Tichuan an sawi tak ang khan tun MDC ithlan dawnah khan khatiang ang khan mipui hnenah promises an han siam ta a, an promise an han kalpui ta chiah a, vawiinah hian equal distribution anih loh chiah hi kan buaipui ta a ni, vawiinah hian. Va kal mah ula in hmu ang, an Council-ah sawn tuin nge engzatnge a hmuh. Vawiinah hian kan CEM khian engzatnge a chan in hria ang, chu chu ka sawi duh a ni, kha kha na ka ti, kei chuan. Chuvang chuan equal distribution hi an duh lova, an duh lohna chhan party interest an en vang aniang ka ring tlat a ni. Vawiinah hian en mah rawh u, anmahni Congress party, MDC lamah pawh sawn an lungawi chuang tawh lo anih hi, chu chuan alawm he thil tha lo hi tireh ang u kan tih ni. Hei hi Aizawl khawpui atangin i tan ang u kan ti a ni. Aizawl hi Mizoram a ni, Aizawlin a tih chu Mizoramin an hre vek a ni. Vawiinah hian Aizawla Municipal Council hian hetiang ang tak hian equal distribution of Fund hi mipuiin an siam a ni tih hi an hria anih ngai chuan Mizoram boruak hi engngemaw chenin a dang ngei ngei ang, Village Council level-ah pawh a dang ang, chu chu a ni vawiinah hian keini chuan kan thlir ni.

Hemi MLA Fund chu thu dang daih a ni, a chhan chu hei hi chu ULB grant a ni a, hei hi thil dang a ni a. Chuvang chuan MLA te leh keimahni Grant-te nen chuan khaikhin chi a niin ka hre lo; Aizawl Zokhawpui cheina tur atan anih tlat chuan, a tum chu kha kha a ni a. Chuvang chuan kei chu hei hi thil tih chi loh niah ka hre lova, tin, thil theih loh hi a awm lovah ka ngai deuh thin a, tih theih loh tih hi kan tawngkamah pawh hian hman chiah ka ngai lova kei chuan, Nepolean a tawngkam ka hawh lawk teh ang, "Impossible is the word found in the dictionary of fools", a ti a. Chuvang chuan thil tha hi chu thil thaah i ngai ang u, tih hi kei chu ka ngaihdan a ni a. Aizawl khawpui mihring hi i dah hrang lovah u, tih hi ka duh a. A Ward

hrang hrang hi chu a number a inzat chiah lovang, nimahsela kan interest chu thuhmun vek a ni. Keimahni area theuhah khan Aizawl khawpui chei kan tum a ni mai. Chuvang chuan chance i pe ang u, nuai sawmthum pali changtu leh nuai sawmhnih changtu chuan tih tak tak emah chuan Aizawl khawpui an cheina chu a dang daih ang. Chuvang chuan a inang tlangin chei rawh se tih hi vawiinah hian keini chuan na deuh hleka kan rawn sawi duh chu a ni a.

Tin, kum 2010 leh 2011 an han sawi chungchangah khan han sawi ka'n duh leh chu heihi a ni phawt a Pu Dy. Speaker, (Pu Lalsawta : Pu Dy. Speaker, vawiinna ka thu sawi hi a sem dan chungchang leh a sem zat chungchang a ni lova, an thuneihna hi i tibawrhbang lovang u, an thu neihna hi constitution dan anga an thu neihna a ni e, keini hian hetah hian va inrawlh theihna kan nei lo. Constitution-in hei hi a sawi dan a ni kan ti mai a ni) Constitution lam khanin Pu Dy. Speaker, sum sem chungchang thuah khan inrawlh suh u a tih kan hre lo. (Pu Lalsawta : a ti thei kan ti lo. Article 243-ah hian chu pawh chu dan siam hmangin kan ti thei a ni, chu chu pasarih pariat a awm. Anti-defection Law-te kha kan tih theih a ni, kan ti reng. Hei hi Legislators Law-ah hian kan hriat a ngai tlat) nia , kan hriain kan hria. Chuvang chuan kan dinhmunah khan keini chu kan ding reng tho a ni. Chuvang chuan vawiinah hian kan sawi chu a dan ai mah mah khan a pawisa sem hi inrualkhai rawh se kan ti kha a ni mai a, tichuan hei entirnan, kum 2010-2011 semna chungchang thuah te khan hetiang angin work order-te pawh kan hmu, constitution of RCC culvert at Falkland te hi a ni a, construct of RCC culvert of jeepable road in Salem han tih ringawt ang chite kha work order an hmuh dan ang te alo ni a. A hnathawh turte pawh kha Municipal Council hote pawhin an han zawng thin a an hmu hlei thei lo tih te a ni a, chutiangte chu an dinhmun kha a ni ve a, annmahni kha an sem tir a, a hna kha zawn hmuh theih lohvin a awm reng a nih chu.

**Pu ZODINTLUANGA MINISTER :** Pu Deputy Speaker, He House-ah hian kan Leader zahawmtakin a sawi tawh a, he House hi thudik sawina tur a ni a ti a, Salem vengah pawh Village Council-te nen tha takin kan en a, zawn hmuh zawh loh anga a sawi kha cancel leh teh se.

**Pu LALDUHOMA :** Pu Deputy Speaker, party tin mipuite hian Chief Minister bial nih an duh a, Minister bial nih te an duh a, Ruling MLA bial nihte an duh a. Chutih laiin Opposition-ah kan lo awm fat fat thin a, vawiina kan resolution neitu hi term khat pawh opposition-ah a la awm lova, han tuar ve phawt rawh se.

**Pu C. RAMHLUNA :** Pu Speaker, a tul anih chuan kan tuar ve phawt ang chu. Mahse vawiinah hian MLA kan han nih ve duhna chhante chu Mizoram tana thil tha tih kan duh vang a ni a. Tin, chubakah chuan a lehlamah chuan thuneihna kan nei lo kan han ti tak na a, thuneihna kan nei a ni tih ang hian kal kan tum amaw ni aw ka ti a, hmanniah khan Local Council hi engtikahnge thlan a nih ang tih ka zawh khan, State Election Commission nen kan inbia anga, a hun kan la sawi ang tih kha min chhanna a

ni a, kan rules 15-ah hi chuan Local Council hovin a inhlante pawh hi State Election Commission-te nena an ngaihtuah tlanna, an remruat tur a ni. Chuvang chuan kan duhna laiah hian an thuneihna kan lak sak a, kan duhna laiah hian thu kan nei lo kan ti leh si a nih chuan engtinng he Municipal Council naupang te hi a kal tak ang. Local Council kha chuan State Election Council-ah an refer tawh nghe nghe a ni. Chuvangin hetiang anga thu an neihna kan chhuh sak lai leh thil tul anga kan ngaih thu neihna kan nei lo kan tih leh si hi thil diklo niin ka hria a, chuvangin hetiangte hi awm tawh lo sela a thain ka hria a. Tichuan vawiinah hian ka resolution hi kal tlang sela ka duh a, khawngaih takin member-te ho hian min adopt sak ula tiin ka ngenin ka han sawm che u a ni e. Ka lawm e.

**Pu LAL THANHAWLA, CHIEF MINISTER :** Pu Deputy Speaker, tuna a thusawi zawng zawng kha a bul atangin ka lo ngaithla a ngun takin. Tun hma khan State Sorkar-in thuneihna an nei lo. Chuvangin, ruling party nghen chhan leh an ni lampang hawi zawnga vote pawh a ngailo. Funding pawh Central atanga direct funding a ni an tih kha mipui an buai hle a ni. Nimahsela, khang zawng zawngah khan thu diklo kan lo sawi a ni, an duh chuan State Sorkar hi an inrawlh thei nameuh mai a rawn ti leh a, a lawmawm angreng zawk hle a. Inthlan laia diklo taka kan pek kha, kan lo tidiklo a ni, State Sorkar hi a duh chuan a inrawlh thei a, dan pawh a siamsak thei ngei a, a rawn ti leh hi a lawmawm ka ti a. Chuvangin, a Resolution hi pass-pui tlakah ka ngai lo.

**DEPUTY SPEAKER :** Awle, khi dar 4 a ni a, kan hun a tawp chiah chiah a. Amaherawhchu, hei kan la buk lova, i buk fel law law mai ang aw. Member zahawmtak Pu C. Ramhluna, a resolution pawmpui turin adopt turin a rawn move a. Pawmpui remti apiangin ‘remti’ ti rawh u le. A tlem naa rin chu a ring khawp mai. Tunah remtilovin ‘remtilo’ ti rawh u le. A thawm a lian zawk a ni e.

Awle, Pu C. Ramhluna Resolution “13<sup>th</sup> Finance Commission-in khawpui cheina atana a pek thin, Urban Local Body Grant hi Aizawl Municipal Ward tinah rualkhai taka pek thin ni rawh se” tih chu House-in kan hnawl ta a ni.

**Pu C. RAMHLUNA :** Pu Deputy Speaker, engpawnise, House-a duh tawka thusawi theihna hun min pe a ka lawm a. Nakinah hun remchangah Aizawl mipuite hian hei hi thudik a ni tih hi an la hria ang a.

**DEPUTY SPEAKER :** Awle, vawiinah chuan kan Business kan zo ta a. Naktuk Inrinni a ni a, Chawlhni nen, kan chawl ang a, Thawtanni Ni 25.7.2011 zing dar 10:30 ah kan thukhawm leh dawn nia.

Sitting is adjourned at 4:00 P.M.